

HAHNIBO

Criston raantibaan hahnibo

Jahuen yoshin noque hinantijani

1 ¹Mihqui huishamenoxon tah hen Jesusen hahni jatihibi mia yohiniqui, señor Teófilon, jan honanmani rihbi mia yohiquin. ²Hinahihnanoxon caman jan hahpahoni jatihibi tah hen mia yohiniqui. Hinahihnarifyamaxon ta jan caismi jahuen raantibo jaan yohiniqui jascahahbo. Dios Yoshiman shinamhma jato yohiquin. ³Jihui qui hueonahbo mahuatipish bi cahen jaabaan jisíbo hihquish jato qui sanareneni jahui, jan hahquirihbi jihuetai honanahbo. Cuarenta neten cahen jato betan hihcanahi. Jato nihquihinxon jenquetsahaquin Papan noque jihuemayaxihquin jato honanmaquin.

⁴Jato betan pixon cahen jato yohiquin: —Jerusalen jema potabahinaxma janobinahue, Papan yohini nocoyaxahnon caman janobi mananahue. Jaa ta Papan hinanyaxihquique hah ta hen mato janiqui. ⁵Juanaman mato jenen nashimani bi ta Papan mato jahuen Yoshin hinanyaxihquique nashimaquin hahcajaquin hicha hinanresquin. Jan jascajati nete ta nea pishca sca jaonahiqui —jato jaquin.

Naiho Jesus hinahihntatai

⁶Jaatian hahqui tsinquirihbixon Jesus yocacanquin:

—¿Noquen caibobi sca hahquirihbi noquen hapo janon min rahmabi noquen nahuabo camatihin, Hihbon?
—hahcanquin. ⁷Yocacahbo jato yohiquin:
—Jaabi hihbo hihxon ta jayaxihquibo Papan yohiniqui. ¿Jahuentian jaticaniquin? ¿Jahua neten jayaxihcaniquin? Man tah man honantimahi. ⁸Jaa man honantimahi bi ta Dios Yoshiman mato coshi hinanyaxihquique mato qui botopaquexon. Coshi bichish tah man hehqui chanicoinyaxihqui Jerusalen jema janin, Judea mai jatihibinco rihbi, Samaria mai janin rihbi, jano nai chibechijaquehtancahuanaiton rihbi —jato jaquin.

⁹Jascahiton cahen Papan jaa bilihiniquin jaton jisnonbi. Nai cohiman pantehah cahen jisyamascacanquin. ¹⁰Jan cahiya nai bejisihnihi nih nichaibaan bi joxo chopaya rabe jato patax nihreneni jahui. ¹¹Nihrenexon yocacanquin:

—¿Jahua jenquetsahim man naihoh jisichain, Galilea mai mehabaan? Maton jisnon bi jan naihoh hinahihntatai quescaquihrani ta joribiyaxihquique, Jesus, jaabi, huetsama —hahcanquin.

Judas xahbanen Matías caisaibo

¹²Jasca jaabo jaiya cahen Olivo janeya mahchin mehax Jerusalen janin

boribicani. Jaa mahchi ta Jerusalen hochoma qui noquen xobo janinhax noquen huai tihixon.¹³ Nocotax rabe tapoyahpa xoboho bocani bochiquiha chique janin, jano jaabo jihuetai janin. Pedro, Juan, Jacobo, Andres, Felipe, Tomas, Bartolomé, Mateo, Alfeon baque Jacobo, Simon Celador, Jacobon baque Judas.¹⁴ Jaabo rahsichin Papa jaayocacanquin jaa shinan huestiya hihxon. Jato betan haibobaan rihbi yocaquin. Jesusen jochicabaan rihbi, jahuen mama Maríán rihbi yocacanquin.

¹⁵ Jano cahen noque huetsabo tsiniquicani, ciento veinte rah. Jato tocan mehax huenihhnaxon Pedronen yohiquin:

¹⁶ —Papan huishamani joi jai quescari ta jahoxqui, noque huetsabaan. Judasen jascajayaxihqui ta Davidinin huishanishqui, Dios Yoshiman shinamahah. Jesus bihmanoxon ta Judasen Jesus qui jonibo hihuehoxqui.

¹⁷ Jaa Judas ta noque betan hihpahonishqui, jaa rihbi nea tee hihbomahah.¹⁸ Jan hohchaquin cananai coriquinin ta mai marohoxqui. Marohax paqueti behoracareneni

pohtoshihcahinax jahuen pocobo napaquehreneni.¹⁹ Jan jascajahi jatihixonbi honanxon ta Jerusalen janin jihuetaibaan jaa mai janenishqui Acéldama, jaton join. Jimiyahpa mai hihcatishqui.²⁰ Salmos quirica janin ta nea joi huishá jaiqui:

Jahuen xobo xahbansanon tsoabi
jano jihueyamasanon
hihqui jaa quirica janin.

Jahuen tee rihbi huetsan hihbojanon hihqui huetsa quirica janin rihbi.

²¹⁻²² Jascabi sca janon huetsa sca caisnahue. Noque betan huetsa sca yohinica caisti ta jaiqui. Juaman noquen Hihbo nashimani tian noque betan nihni joni huesti. Noquen Hihbaan noque

nihquihinpahoni tian noque betan nihxon rahma caman noque manapahoni joni huesti caisnahue, noquen jisnonbi noquen Hihbo hinahihnnan caman noque manapahoni joni. Jaan ta noque betan noquen Hihbo Jesus retehahbo bi hahquirihbi jihuetai yohicointihiqui —jato jaquin Pedronen.

²³ Jaatian cahen rabe joni naponbi nihmacanquin. Huetsa cahen Matías. Huetsa cahen José, Barsabas hahcaibo. Justo jahuen jane huetsa.²⁴⁻²⁵ Jaatian cahen Papa yocacanquin:

—Hihbon, mian tah min jatihibi joniaba shinan honanai. Criston raantibaan tee ta Judasen potabahinhoxqui jano jan cacatsihquiton canoxon. Rabe joni tah non naponbi nihmahi. ¿Jahuemeha min caisain Judasen tee jan hihbojanon? Noque jismahue non honannon —hahcanquin.

²⁶ Jascajaquin yocaxon jahuemeha hin honannoxon macan bero borasa qui nanexon chicoxon jiscanquin. Jisxon Matías honanscacanquin. Criston once raantibo betan sca hihnon jaton hahbe raanti janecanquin.

Dios yoshin jahui

2 ¹Pentecostes fiesta nete nocotaiya cahen jaabo jatihibi huesti xoboho tsiniquiti. ²Jano tsahotaibaan bi nihuehhuan corotihcamahi naihoh quehax jahuex jaa xoboho coshin corotai nincacanquin jatihibichin. ³Jascascaiyah cahen chihi perehiquicamahi romishin jato qui paquereneni. Chihi perehiquicamahi joni tihibi maracahreneni. ⁴Dios Yoshiman sca jato jatihibi hihbojaquin. Jaan hihbojaxon shinanmaha huetsa join sca yohuancani.

⁵Jerusalen janin ta jatihibi mai janinhax jahuex Papahon shinanai judiobo jihuecanishqui. ⁶Yohuanaibo nincacax cahen jato qui hicha

tsinquiqaqueti. Yohuanaiboya jathihxonbi jahuenahbi jahuen joi nincaquin.
Huetsan jahuen joi nincaquin. Huetsan rihbi jahuela nincaquin. Jascayaquin jaton joibi nincacanquin jathihxonbi. Jascayaquin jahua copi jascarihquin honanyamacanquin. ⁷Rahte rahtexon yocacanquin:

—¿Yohuanaibo Galilea janinhahbo rahsima hin? ⁸Jascaraiboya
¿jenquetsahaxon non noquen mai meha joibi non nincacain jathibichin? ⁹Neno tah non jai partobo, medobo, elamitabo, Mesopotamia janinhahbo, Judea janinhahbo, Capadocia janinhahbo, Ponto janinhahbo, Asia janinhahbo,
¹⁰Frigia janinhahbo, Panfilia janinhahbo, Egipto janinhahbo, Cirene hochoma Africa mai janinhahbo, Roma janinhax pasijahi jahuibo, ¹¹noquen caibo, nahua hihpahonish bi noquen caiboscaibo rihbi, cretensebo, árabebo. Papan coshin hahcái joi yohuanai tah non nincacai, noquen joinbi —hahcanquin. ¹²Rahtetax jahua copi jascarihquin honanyamacahax yocacahnancani jathibí:

—¿Jahuatohon yohuanihquin non jascayaquin nincanon? —hihcáni.
¹³Jascayaibi yohuanxon sca caibaan hosanquin:
—Pahenax ta jascari yohuancaniqui —hahcanquin.

Pedro yohuanni

¹⁴Jascaraibaan bi hahbe raantibo betan nihrenenxon Pedronen jato coshin yohiquin:

—Judea mai mehabon, Jerusalen janin jihuetaibaan. Man honannon hihxon tah hen mato yohihi. Hea nincanahue.
¹⁵Noque pahenai shinan man jai bi tah non pahenyamahi. Bari ta queyarihyamahi. Nescaran ta tsoabi pahenyamahi. ¹⁶Pahenaxma bi tah non Papan joi yohinica Joelinin yohini

quesca noque jai. Joelinin ta nescajaquin huishaxon yohinishqui:

¹⁷Papan ta yohihihqui: Nete queyoti hochomascaiyá tah hen jatihibi jonibo heen Yoshin hinanrestihi. Hinanah sca ta maton baque bebobo, maton baque haibobo rihbi hean shinamaha yohuanyaxihqui. Maton beronanbaan ta namaquen hahcayaquin hahan honantibo jisyaxihqui. Maton yosibobaan rihbi ta namayaxihqui hean jismaha jisquin.

¹⁸Jaa neten tah hen heen teexonnicalahbo bebobo, heen teexonnicalahbo haibobo rihbi heen Yoshin hinanrestihi. Hinanah ta hean jismahah yohuanyaxihqui. ¹⁹Naihoxon tah hen hahan rahtetibo cainmatihi. Main rihbi hahan honantibo sca cainmaribiquin. Jimi, chihi rihbi, chihi cohin rihbi jato jismaquin.

²⁰Bari ta bahquishihcainscatihi. Hoxne ta joshincahaintihi, jimi quescacahini. Jascapahbo ta jatihi qui Hihbo joriyamanon. Jahuén joti nete nocotaiya ta jato casticaní jotihi qui jahuen coshi jato jismanoxon.

²¹Hea hihbojahue Hihbon, hihqui jatihibi ta Hihbaan teehihmatihi. ²²Jascayaquin ta Joelinin huishanishqui.

²²Hen mato yohihi nincanahue, heen caibaan. Jesus ta Nazaret janinha joni hihnishqui. Papan raanai joni jaa hihqui man honannon hihxon ta jahuen coshi Papan hinannishqui tsoan jascajani que ma bi jaa coshiyaxon jan hahnon. Jisish hahan rahtetibojamaquin. Hahan honantibojamaquin. Maton jisnonbi ta jascajanishqui man tah man honanai. ²³Man rehteyaxihqui honanxon Papan

yohini quescabijaxon ta Judasen mato jaa Jesus hinanhoxqui. Hinahah tah man rehtehohqui nincayosmabo jaa jihui qui hueonmaquin. ²⁴Rehtehipibaan bi ta Papan huenirihbihoxqui teehihmaxon. Jaa ta jascabi mahuatai jatimahiqui. ²⁵Hahqui yohanxon ta Davidinin rihbi huishanishqui:

Netetihibi noquen Hihbaan hea manahi ta hen honanai. Hea pataxxon ta hea yanapaniqui, hen masa shinanyamanon.

²⁶Jaa copi tah hen coin coinax siripi yohanai, mahuatax bi hen hahquirihbi jihuetahi honanax.

²⁷Hea jascabibi mahuatai hihyamanon tah min hea potabahintimahi. Minabi miin joni tah min pisimatimahi.

²⁸Hea jahuentianbi queyoyamanox manati tah min hea honanmahi. Hea manaxon tah min hea hihti jenimamatih.

Jascajquin ta Davidinin huishanishqui.

²⁹Honanquin sirijaxon tah hen mato yohihi, heen caibaan. Neateman jihuenu noquen xeni Davidi ta mahuatai tsahoncannishqui. Jahuen tsahon ta rahma caman jaiqui. Jatihixonbi tah non jaa honanai. ³⁰⁻³¹Miin jihuetaho jan yononon hihxon tah hen miin xohta quiquin hapomayaxihqui hah ta Papan janishqui, jahuentianbi jahuen joi huetsajayosmaxon. Jan jascani honanxon Papan jismaha yohinica rihbi hihxon ta Cristo hihquipi bi Papan huenirihbitihi jaan honannishqui. Jaa yohihi ta jan jascabibi mahuatai hihyamanon potabahintimahi, jahuen yora rihbi pisimatimahi hihnishqui David. ³²Jaa Jesus hihquipi bi Papan huenirihbihi jisoxon ta non mato yohicoinai jatihixonbi. ³³Quiquin Hihboscahue Papan jaah ta jaa mecayahlo sca Jesus tsahotihqui. Papan noque Dios Yoshin

hinantijanixon ta nea man jisxon nincacai jaan hinanresiqui. ³⁴David ta naihoh nihinahyamanishqui. Jaanbi ta yohnishqui:

Noquen Hihbaan ta heen Hihbo yohnishqui, Hea mecayahlo tsahotihue.

³⁵Miin rahuibo hen mia namanjaxonnon caman tsahotihue, hahquin.

³⁶Jaa copi honanquin sirijanahue, heen caibaan jatihixonbi. Jaa man jihui qui hueonmaho Jesus ta Papan yohiscaiqui jaa huesti Hihbo hinon, jan caisaí joni —jato jaquin Pedronen.

³⁷Jan jascahi nincaxon masa shinanxon Pedro, jahuen hahbe raantibo rihbi vocacanquin:

—¿Jahueja sca non jatihin, noque huetsaba? —hahcanquin.

³⁸Maton shinan pontenahue. Cristo sca maton Hihbo hihnon hihxon non mato nashimanon yohinahue maton hohcha jan sohuanon. Jascajahiton ta mato Dios Yoshin hinanrestihqui. ³⁹Mato ta hinantijanishqui, jahuen yoshin mato hinanti, maton baquebo rihbi, jatihibi hocho quehabo rihbi, noquen Papan quenahiro rabsibi —jato jaquin Pedronen.

⁴⁰Basi yohanxon cahen jato yohiquin sirijaquin:

—Nea tiromabo qui nocoyaxihqui casticanti mato xahbanjamanahue —jato jaquin.

⁴¹Jaatian sca jan yohihah nincacoinaibo nashimacanquin. Jaa netenbi ta tres mil jonibaan Cristo bahnishqui. ⁴²Criston raantibaan honanmaha cahen nincaquin jeneyamacanquin. Jato manacanquin. Noquen hohcha copi Cristo mahuaho shinanhahnan picanquin. Papa yocaquin jeneyamacanquin.

Nincamamenonibo

⁴³Hicha hahan rahtetibo jahuen raantibaan hahcái jisish rahtecani. Hahan

honantibo rihbi hahcaibo jisish raquecani jatihibi.⁴⁴ Hahmerihbi cahen jihuecani nincacoinaibo rahsi. Jaabo jai jaton jahuaborabo jatihixonbi hihbojacanquin.⁴⁵ Jaton jahuaborabo, jaton mai rihbi maromaxon cahen coriqui hinanpaquecanquin jaabo pishinai tihi jato hinanquin.⁴⁶ Jatihibi neten huesti shinanyahax Papan xoboho nocohihnaacani. Jenimaxon shinanquin sirijaxon jaton xobohonox sca picanquin.⁴⁷ Papa qui siripi yohuani jihuecani. Janohahbaan rihbi jato sirijaquin yohuanquihnnquin. Jato betan nocohihnnataibo caicananon jan teehihmahibo noquen Hihbaan rihbi jato nocohihnamaquin jatihibi neten.

Chanto rohajahibo

3 ¹Bari racapaquescaya cahen jaabo hihqui quescari jascaran Papa yohihi tsinuitaiboya Pedro betan Juan Papan xoboho mapeti cahi.² Jano rihbi cahen huesti joni chanto jahuen maman bihni jascabi sca caibaan hioxon xehqui patax racanquin jaa neten tihibi. Siri Xehqui hahcaibo patax racaxon Papan xoboho mapetaibo coriqui yocauquin chanton.³ Pedro betan Juan jaa xoboho mapecatsihscai jisxon jahuen mequen mehanahxon coriqui pishca jato yocauquin.⁴ Yocaca jaa jisquin sirijaxon sca:

—Noque jise —hahcanquin.

⁵ Jascahahbo coriqui pishca bihti shinanxon jato jisquin.

⁶ —Heen coriqui yamahi bi tah hen hen huetsa jai pishca mia hinanai. Jesucristo Nazarenon janen ta hen mia yohihi. Nihrescahue —hahquin Pedronen.⁷ Jascajaxon mecayaho mehuetanxon huenihihniquin. Huenihihniha jahuen tahebo jahuen tapoxcobo jahuen ponobo coschicahinax cayatani nihrenenscrai.⁸ Nihaquehtanscrai. Nihaquehtanax jato

betan sca Papan xoboho mapescai. Nichish cayacanahax:

—Papan ta hea hahxonihqui —hihqui.

⁹ Nichish jascari Papa qui siripi jaa yohuanai jisxon cahen jano hihquibo rahsichin jaa honanquin.¹⁰ Siri Xehqui hahcaibo patax jaabi tsahoxon Papan xoboho mapetaibo coriqui yocarahsihi honancanquin. Jan siriscai honanax hihti rahtecani. Rahte rahtecani.

Pedro yohuanai

¹¹ Pedroya Juan jaa jomin xecohiya jano hihquibo rabsibi rahtetax Salomonen xobo hahcaibo jato qui tsinuijaqueti, xobo rechiho.¹² Tsinuijaquetaibo jisxon Pedronen sca jato yohiquin:

—Heen caibon. ¿Jahua copi man nea jisish rahtetain? ¿Jahua copi man noquen coshinbi noquen shinamanbi non nea joni nihmahi quesa man noque jisin?

¹³ Noquen xenibo hihpahoni ta Abraham qui, Isaaque rihbi, Jacobo rihbi. Jaton Papa Dios ta noquenah qui. Jaa noquen Papan ta jahuen joni Jesus shinanya hih mato jismahihqui, Pilato jaa Jesus hinanax man queenyamahoh que bi. Pilaton jaa picocatsiqui bi tah man queenyamahohqui, noque jihuemanicahma tah qui hihquish.¹⁴ Jaa ponte joni que bi tah man queenyamahohqui, jaa Papan baque que bi. Queenyamaxon tah man rehitemis joni mato picoxonti man yocahohqui.

¹⁵ Noque jihuemanicah tah man matonbi rehitemahoqui. Rehtehipibaan bi ta Papan teehihmarihbihoxqui. Jan teehihmahi jisxon tah non mato yohiscrai.¹⁶ Cristo honancoinxon tah non jahuen janen nea joni rohajahaqui, nea man jisi man honanai jonibi. Jan noque hinanai shinaman tah non nea coshijahaqui, maton jisnonbi.

¹⁷ Honanyamaxon tah man rehitemahoqui, noque huetsabaan. Maton

tinintibaan rihbi honanyamaxon rehetequin. Hen tah hen honanai.¹⁸ Cristo ta hohmis hohmisyaxihquihihxon Papan joi yohinicabaan jatihixonbi janí quescaja ta Papan jahoxqui jascayahbo.¹⁹ Jaa copi maton shinan pontenahue, maton hohcha Papan sohuanon.²⁰ Sohuaxon hahan maton shinan behnajati netebo Papan mato hinannon. Pontejaquin shinanax sca jihuenaahue. Jan mato hinanai jahuen Cristo ta Jesus qui. Jaa jan raannon pontejaquin shinannahue.²¹ Jahuen joi yohinon hihxon ta jahuen joi yohinicabo Papan caismishqui. Jaabaan yohini jatihibi quesa janon caman ta noquen Jesus naihoh banetahbiqui.²² Moisesmin ta yohinishqui: Maton huetsabi ta joi yohinica Papa Diosen mato qui raanyaxihqui qui jaa maton huetsabi hea quescapa joni. Jan yohihi jatihibi tah man nincatihi.²³ Jaa joni nincayamahi jatihibi tah man Papan baqueboma qui picomaxon queyobahintihi, hahquin huishaquin.

²⁴ Samuel jaa pecaho joxon yohinicabo rihbi jatihibi ta jascarihbibi yohuannishqui, nea netebo yohihi.²⁵ Mato tah man hoa yohinicabaan baquebo qui. Main jihuetaibo jatihibi jato shinan siri hinanon tah hen miin baquebo sirijaquin shinamathih, hah ta Papa Diosen Abraham janishqui. Jaanbi mato hahxonnoxon ta maton xenibo rihbi jascajati yohinishqui. Jaa copi ta jaa joi matonah rihbi qui, Papan jisnonbi man jascanon.²⁶ Jahuen baque raanxon ta mato qui pari Papan jaa raannishqui. Maton hohcha potamaxon mato jatihibi sirijaquin shinamahi jonon hihxon mato qui jaa raanquin —jato jaquin.

Quenamahabo Pedro betan Juan cahi

4 ¹Sacerdotebo betan Papan xobo coiranai sontarobaan hapo sca becani. Saduceobo rihbi jato betan jahui.

Joxon sca tsinuitaibo yohihiton meracanquin.² Jan Jesus hueniho quescajaquin mahuanib Papan hueniyaxihqui hihxon cahen janon jai jahui Pedro betan Juaman nincamaquin. Jato honanmahia merahax sinaxon jato bihecanquin.³ Bihxon bepiscai copi bahquish pari jato casticanyakahpan hihxon sipo xoboho jato tsahoncanquin.⁴ Jaabi ta Criston joi siri nincacaibaan hichaxon nincacoinnishqui, cinco mil jahui.

⁵Hoxashinahax mohiyahtax jaton hapobo jatihibi jaton hanibo betan tsinquisai. Huishani honanbo rihbi jato betan Jerusalen jema janin tsinquit becanai.⁶ Jaton quiquin sacerdote Anas, Caifas, Juan, Alejandro, jaabo, quiquin sacerdotebaan jenabo jatihibi rihbi jato betan tsinquit.⁷ Pedro, Juan naponbi nichinxon yocacanquin:

—¿Jahua coshin man hahquipiquin?
¿Jahua janen man jascjahipiquin? —jato jaquin.

⁸Dios Yoshiman hihbojaha sca Pedronen jato yohiquin:

—Jema hihbobon, noquen hapobon.⁹ ¿Jenquetsahaquin man nea chanto rohajahipiquin? ¿Jahuatohon man jaa rohajahipiquin? hah man noque jaiya tah hen mato yohihi, man honanon hihxon.¹⁰ Jatihibi noquen caibaan honanon hihxon tah hen mato yohihi. Maton tah man Jesus Nazareno jihui qui hueonmaxon rehtehohqui. Jaa man rehtehipi bi ta Papan hahquirihbi teehihmahoxqui. Jahuen janen tah non nea rohajahipiqui, rahma siri sca mato bebonbi nihnon.

¹¹ Jaa Jesus ta hahqui xobojati jihui quescapah qui, tiroma tah qui hihxon man xobojahibaan potanih que bi.¹² Jaa huestichin ta noque teehihmati hatipahiqui. Huetsa noque teehihmanica ta yamahihqui ni jahuenbi. Jaa

huestichin jonibo teeihmanon ta Papan jaa yohihiqui —jato jaquin.

¹³Raquetaxma Pedro betan Juan yohuanai jisxon, escuela janin hihpahonima bi jemama qui hanini rabe jato honanax rahtecani. Jesus betan nihpahonibo sca jato honancanquin.
¹⁴Rohajahipi joni jato patax nichi jisxon joi bichincatsihxon bi jahua yohiti hahtipahyamacanquin. ¹⁵Tsinquitaiboma qui jato picomahax res sca yohinannanscacani:

—¿Jahueja non jato jatihin? Hahan honanti hani ta hahquipicanaxqui. Jatihixonbi ta Jerusalen janinhahaan honanahqui. Hahyama ta jaipicananaxqui, hih tah non jatimahi. ¹⁷Jaabi, jaa joi huetsabo janin caícanayamanon jato yohinon benahue. Jaa janen yohuanyamascanahue, non mato rishquimis jistahi man tan, hahquin jato yohinahue —hihcani. ¹⁸Quenamaxon sca jato hihti yohicanquin:

—Jesusen janen yohuanyamascanahue tsoh. Jahuen janen tsoabi yohiyamanahue —jato jacanquin.
¹⁹Jascalahbo Pedro betan Juaman jato yohiquin:

—¿Papan jisi jahuemeha ponte quin? ¿Mato noquen nincati nan? ¿Noquen Papabi non nincati nan? Shinannahue. ²⁰Noque tah non non jisnibo chaniti jai, non nincanahbo rihbi yohiti jai.

²¹Jascaratón jato tahtijaribicanquin. Jema janin jato nincacatsihquibo hicha jai quen jenquetsahaxon casticanti honanyamaxon tahtijaribixon jato Boresscatannahue hahrescanquin. Jaa rohajahipi honanaxon texe jatihixonbi, Hahxon tah min jaa jai Papan, jaiboya, casticanti hahtipahyamacanquin.

²²Hahan honantijaquin jaabaan rohajahipi joni ta cuarenta bari janishqui, hashoan rihbi. Jaa copi cahen jatihixonbi jaa honancanquin.

Papan coshi yocacaibo

²³Boresscatannahue hahcabo sca jaton hahberabetibo qui caxon jaton sacerdote hapobo betan jaton hanibaan jato tahtijahi yohicanquin. ²⁴Yohiha jatihixonbi Papa yocacanquin:

—Hihbon, naiyahpa mai, hian, janobo jai jatihibi rihbi tah min hahniqui. ²⁵Miin Yoshin siri mian hinanah ta noquen xenibo David miin jonixon miin joi yohinishqui:

¿Jahua copi noquen nahuabo sina sinatihquin? ¿Jahua copi noquen caibaan honanma jai joibo yohiti shinanihquin?

²⁶Mai meha quiquin hapobaan ta jaton sotarobo nichinahqui rehtemanoxon. Jaton hapobo tsinquecani, noquen Papa rehtecatsihqui, jan caisai joni rihbi rehtecatsihqui

hah ta Davidinin janishqui huishaquin.

²⁷Jascacoini. Herodes, Poncio Pilato, nahuabo, noquen caibo, jaabo jatihibi ta nea jema janin tsinquecanhoxqui. Minabi miin joni qui sinatax ta tsinquecanhoxqui. Min caisai miin Jesus qui ta sinacanhoxqui. ²⁸Mian shinanxon miin mequeman hahmaha jayaxihquibo min yohini quescabija ta jaabaan jahoxqui. ²⁹Rahma jaabaan hahan noque tahtijahi joibo jise, Hihbon. Raquexonma non miin joi yohinon noque coshi hinanhue, noque miin jonibo. ³⁰Miin mequeman mehexon jonibo rohajahue. Miin baque Jesusen janen non hahan honantibo hahnon hahan rahtetibo rihbi non hahnon jahue —hahcanquin. ³¹Papa yocaquin janquenja sca jaiboya jaabo janos tsinquitai xobo xayascai. Dios Yoshiman jato jatihibi hihbojaha sca raquexonma Papan joi yohicanquin.

**Jaabo jai jatihibi hinancanquin,
jatihibichina sca janon**

³²Jaatian cahen nincacoinaibo jaa shinan huestiya hihcani. Jatihixonbi jaa

hesti shinancanquin. Jan jaibo yohihi, jaa ta hena res qui, hih tsoabi jayamahi. Jatihibi jaya hihqui.³³Papan coshiyaxon hahxon cahen noquen Hihbo Jesus hahquirihbi teehihscai yohicanquin jahuen raantibaan. Jato jatihibi ta hicha shinan Papan hinannishqui.³⁴Jato tocan tsoabi jahuabi pishinyamahi. Xobo jaxon maromacanquin. Mai jaxon jaa rihbi maromacanquin.³⁵Maromaxon coriqui bihxon caxon Criston raantibo hinancanquin. Jaabaan sca pishinaibo hinapanquenon.³⁶José janeya huesti ta Criston raantibaan Bernabé janenishqui. Bernabé cahen sirijaquin shinanai baquebo hihcatsihqui. Jaa cahen Chipre janinhax joní, levito joni.³⁷Mai hihbo hihxon cahen jahuen mai maromaxon coriqui bichish jaya caxon Criston raantibo hinanscaquin.

Ananías betan Safira

5 ¹Ananías janeya jonin sca jahuen haibo Safira betan jaton mai maromaquin. ²Coriqui bihxon, Jascajahue jahuen haibaan rihbi jaah, texe mequecanquin. Texe mequexon texe boxon Criston raantibo taracanquin. ³Pedronen sca yocaquin:

—Ananin. ¿Jenquetsahaxon Satanasnem miin jointi hihbojahanxquin, min maromahi texe yohuashihxon Dios Yoshin paranti min shinannon?
⁴¿Maroyamaha minabi hihyamahipishquin? ¿Maromaxon sca jaa coriqui hihboxon quesayamaxon min queenai quescajati min hahtipahyamahin? ¿Jahua copi sca min jascajaquin paranain? Jonima bi tah min noquen Papabi parancatsihqui.

⁵Jan yohihah nincacax Ananías racareneni mahuascasi. Jaa chanishi joi nincacaibo rahsi sca hihti raquecani.
⁶Beronanbaan sca huénixon Ananías rahcoxon boxon tsahoncanquin.

⁷Quimisha horabo huinohax jahuen haibo sca hihcohi. Jaan cahen jahuen bene jascarax mahuatah honanyamaquin.

⁸Jaa sca Pedronen yocaquin:

—Hea yohihue. ¿Man noque hinanah tihī copitai min mai maromahaquin?
—hahquin.

—Jatihi copitai rahan —hahquin.

⁹Pedronen sca:

—¿Jenquetsahaphin man rabexonbi Dios Yoshin tanati shinanahquin? Nincahue. Miin bene tsahontanaibo ta mapescαιqui. Mia rihbi sca ta hioxihcanihqui —hahquin.

¹⁰Jaatian cahen Pedro taracahrenex haibo mahuati. Hihcoxon cahen haibo mahuascasi meraxon beronanbaan boresscaquin. Boxon jahuen bene janin tsahonscacanquin.¹¹Jaatian ta nincacoinaibo jatihibi hihti raquenishqui. Jaa joi nincacaibo rahsi raqueti.

Papan rahtetibojahi

¹²Jaa jema janinxon ta Criston raantibaan hicha hahan honantibo hahnishqui, hahan rahtetibo rihbi hahquin. Salomonen rechí xoboho sca jatihibi tsinquicani.¹³Tsinquitaiboya caibo tsoabi jato betan tsinquiyamahi raquetax. Raquexon bi jema janinhahaan jato hihti siri jisquin.¹⁴Nincacoinaibo cahen caícanascasi. Bebobo, haibobo rihbi tsamascai.¹⁵Hihti caiboscaiya cahen jema bahinbi jaton pishinbo, jaton cacajatibo racanxonxon jaton hisinyahpabo janoracanquin, Pedro jahuiya jahuen bari yoshiman bocabi jato huinonon hihxon.¹⁶Jerusalem hochoma jemabo janinhax sca hicha jomibo jahui. Jaton hisinyahpabo hihuecanquin. Tiroma yoshinyahpabo rihbi hihuecanquin. Jato jatihibi ta Criston raantibaan rohajanishqui.

Pedroya Juan bichibo

¹⁷Jasca sca jaiboya jaton quiquin sacerdote jahuen hahbe saduceobo betan

notsi notsciai.¹⁸ Notsi notsixon porisiabo bihmaxon Criston raantibo sipo xoboho tsahoncanquin.¹⁹ Tsahonahbaan bi yame noquen Hihbaan naihoh queha yonoti joxon sipo xobo xehpoti quehpenxonxon jato picoquin. Picoxon:

²⁰—Botannahue. Papan xoboho mapexon jonibo nea hahan jihueta joi jatihibi yohitannahue —jato jaquin.²¹ Jan yohihi quescabijascacanquin. Xaba paquetaiya bi Papan xoboho mapexon jonibo haxemascacanquin.

Jaatian cahen quiquin sacerdote, jaabo, jahuen hihti janin nocoxon hahbe hapobo tsinquimaquin israelibaan hanibon rasi. Jato tsinquimaxon porisia sca sipo xobo janin raancanquin jato hiluhenon hihxon.²² Sipo xobo janin nocoxon sca porisiabaan jato xahbanjaquin. Joribixon sca jan xahbanjatanai yohicanquin:

²³—Xehpoti jascabi xehpohah tah non meratanai, hihti xehpohah. Sipo xobo coirannicah rihbi tah non jahuen xehqui xehnichai jistanai. Non quehpenxon jisí bi ta tsoabi yamahaxqui —hahcanquin.

²⁴Chanihibo nincacax Papan xobo coiranai sonarto hapo betan quiquin sacerdotebo rahtecani, ¿Jahua sca janoxihquiquin? hihcami.²⁵ Jato yohihi sca huetsa jahui.

—Man sipo xoboho tsahonipibaan ta Papan xobohoxon jonibo haxemahiqui —hahquin.²⁶ Jahuen sontarobo betan caxon jaa xobo coiranai hapon sca jato hiluequin. Jan hapo qui hihuehi copi jonibaan jato macaman tsacapaho hihxon coshixonma jato hihuequin honaxonbi.²⁷ Hihuexon hapobo tsinquitai naponbi sca jato nichinquin. Quiquin sacerdotenin sca jato yohiquin:

²⁸—Jaa janen yohiyamascanahue hah tah non mato jaipiqui, sirijaquin yohiquin. Yohihah bi tah man Jerusalen jatihibi maton honanmati joi jato nincamahi. Jaa joni rehtehoh quen tah

man jaa hohcha noque hihbomacatsihqui —jato jaquin.

²⁹Hahbe raantibo betan Pedronen sca yohiquin:

—Joni mentan tah non hashoan noquen Papa nincati non jai.³⁰ Noquen xenibaan Papa Diosen ta Jesus teehihmarihbihoxqui, jihuini hueonxon man rehtehipi que bi.³¹ Jaa ta noquen Papa Diosen huenihihnihoxqui, jaa mecayaho tsahonon quiquin hapo sca jonibo teehihmanicah. Noque israeli baquebo ponte shinan hinanxon noquen hohcha sohanan ta noquen Papa jaa huenihihnihoxqui.³² Noquenbi jisoxon tah non yohiscai. Noque ta jahuen Yoshin siri rihbi Papan hinanihqui jahuen joi nincacoinaibo rahsibi. Noque ta yanapanihqui —hihqui Pedro.

³³Jascahahbo nincaxon cahen hihti sinaxon jato rehtecatsihscacani.³⁴ Jano rihbi huesti fariseo tsahoti, Moisesnin huishani joi honan, Gamaliel janeya. Jatihibi jonibaan siri jisi joni. Hapobo tocan nihrenenxon Criston raantibo jatoma qui picomatahtahxon jaan jato yohiquin:

³⁵—Heen caibaan. ¿Jahueja man jaabo jacatsihquin? Sirijaquin shinannahue.

³⁶Neateman ta Teudas jonishqui.

Hapohihi shinanax yohuanaiton sca ta hicha tahní jonibaan jaa chibannishqui hahbetan nihcatsihquiaan.

Cuatrocientosbo. Jaabi hihbocatsihqui bi ta rehtexon jaa chibanaibo rihbi

jabamacannishqui, jahuabi sca yamanon.

³⁷Jaa pecaho ta Galilea janinhax Judas jonishqui jonibo toponpaquehibo tian.

Caibo hiohiton bi ta jaa rihbi rehtexon hahbe cahibo rihbi jabamacannishqui.

³⁸Jaa copi tah hen mato rahma yohiscai. Jaabo jenenahue, jenebahinquin. Jaabaan bi shinanax hahcaiya cahen jahuabi jatimahi.³⁹Papa Diosen shinanmaha hahcaiboya cah man jenquetsahaxon bi

jato pantetimahi. Dios betanbi man rehtenanai man meramis —jato jaquin.

⁴⁰Nincacaxx jeenihicani. Criston raantibo quenamaxon sca rishqui rishquimaxon Jesusen janen yohuanyamascaabo hihxon tahtijaxon jato camascacanquin. ⁴¹Picohabho hapobo janinhax jenimacanahi bocani. Criston jonibo copi ta mato tiromajacaniqui. Tenescaibo tah man qui Papan jaiya jenimacani. ⁴²Jatihibi neten Papan xoboho yohuanca jaton xoboho rihbi yohuanca. Jesus ta Papan caisai joni qui hihcani. Honanahbo nete tihibi nincamahi tantiyamacani.

Siete hahxonnicabo

6 ¹Nincacoinaibo caícanahiya sca ta hebreobo qui helenistabo rerer rerencanishqui. Nete tihibi piti hinanpaquehibaan jaton yonommabo hinanyamahiya rerer rerenscacani. ²Nincacoinaibo tsinquiemaxon sca Criston raantibaan jato yohiquin:

—Non Papan joi yohiquin jenebahinxon piti metexxon ta tiroma qui. ³Jaa copi man honanai siri jonibo caisnahué. Siete caisnahué, Dios Yoshiman hihbojahi rahsi. Shinan siriya rahsi caisnui, piti hinanpaqueti tee non jato hinannon. ⁴Noque cah non yocaxonxon Papan joi yohinicabo sca jatihu —jato jacanquin.

⁵—Jascahah ta siri qui —hihxon sca jatihixonbi caiscanquin. Huetsa cahen Esteban, shinanya siri, Dios Yoshiman hihbojahi joni. Huetsa cahen Felipe. Texe cahen Prócoro, Nicanor, Timon, Parmenas, Nicolas, jaton nahua hihpahonish bi judioni Antioquia janinhah. Jaa rahsi caiscanquin. ⁶Criston raantibo bebon jato nichinxon mehexon jato yocaxoncanquin.

⁷Hashoan sca cahen Papan joi caícanascai. Jerusalen janin

nincacoinaibo rihbi hashoan caícanahi. Sacerdotebaan rihbi cahen hichaxon nincacoincanquin.

Esteban bichibo

⁸Hicha Papan shinanyaxon sca Estebanen hihti hahan rahtetibojquin. Jonibo rohajaquin. Hahan honantijaquin Papan coshiyahpaxon. ⁹Jaatian sca judiobaan Esteban joi bichincanquin. Hinaboma sca hahcaibo, cirenobo, alejandrino, Cilicia janinhahbo, Asia janinhahbo. Jaabo rahsichin Esteban joi bichincanquin. ¹⁰Dios Yoshiman yanapana hashoan honanax Esteban yohuanaiya sca hahbetan yohinanti hahtipahyamacanquin. ¹¹Yohinanti hahtipahyamacaxon jonexon coriqui hinanxon caibo sca yohuanmacanquin, quesahahbo hihxon.

—Moises qui tiromahi yohuanai tah non jaa nincaquipiqui. Noquen Papa qui tiromahi yohuanai rihbi tah non jaa nincaquipiqui —hihcani quesahi.

¹²Esteban qui sinatax coro corotahbo cahen jonibo rihbi judiobaan coro coromaquin. Jaton hanibo rihbi, huishani honanbo rihbi sinamacanquin. Jaabaan sca Esteban panterenexon bihxon jaton hapo tsinquitai janin boquani.

¹³Quesamisbo sca yohuanmacanquin hahqui yohuanahbo.

—Jaa joni ta nea Papan xobo qui tiromahi yohuanahqui. Noquen Moisesnin huishani joi qui rihbi tiromahi yohuanai. Tiromahi yohuanai ta tantiyamahihqui.

¹⁴Joxon ta nea xobo Jesus Nazarenon potojaquetanxon noquen hihti quescayamascai non jihuemon Moisesnin joi rihbi huetsajayaxihqui hah ta jaipishqui noquen nincanonbi —hihcani.

¹⁵Jano tsinquitai hapobaan sca Esteban bejisquin sirijaxon jahuen bemanan naihoh queha Papan yonoti bemanan quescasca sca jiscanquin jatihixonbi.

Estebanen jato yohihi

7 ¹—¿Jascama hin? —hahquin quiquin sacerdotenin sca.
²Esteban sca yohuani:
 —Hea huetsabaan, heen papabaan, hea nincanahue. Xaba Hihbo noquen Papa ta noquen xohta Abraham qui cainnishqui, Haran jema janin jihueta cariyamahax, Mesopotamia mai janin jihuetaiaya. ³Miin mai, miin jenabo rihbi potabahini catanhue, hen mia jismatihi main sca cahi catanhue hah ca noquen xohta janish noquen Papan. ⁴Papan Cahue hahca cahen Caldeo mai potabahinax Haran janin sca jihuetai. Jahuen papa mahuatipi pecaho ta neno sca Papan jaa hihuensisqui. Nea main man neno rahma jihuetai mai janinbi ta hihuensisqui.
⁵Jaabi ta nea mai jaa hihbomayamanishqui. Ni huesti tamanehcahinti hihbomayamaquin. Hihbomayamaxon bi hinantijaquin, jahuen hihyaxahn non jahuen baque yamahi que bi jahuen baquebaana, jahuen chini baquebaana rihbi hihyaxahn non jato hinantijaquin. ⁶Jahuen chini baquebo sca jaton nahuabaan main cahiton jaton nahuabaan jato hihbojaxon cuatrocientos bari jato tiromajayaxihqui ta yohirihbinishqui. ⁷Jaabi ta jato hinajahi jonibo hean casticanyaxihqui. Jaatian ta picóscaxon nenoxon sca hehon shinanyaxihcanihqui hih ta Papa janishqui. ⁸Miin baquebo caijaxon jato jano jihueta hinanah ta heen jonibo hihyaxihcanihqui hea nincacoinaibo hah ta Papan janishqui, Abraham yohiquin. Jaabo honantiyahpabo jayaxahn non hihxon sca ta Honantiyahpa jahue Papan jaa janishqui. Jaa pecaho ta Abrahanen baquejanishqui. Jahuen baquexo Isaaque cainipi huesti semanan huinoxon ta jahuen ocho neten sca Abrahanen jaa jahuen baquexo honantijanishqui.

Isaaquen baque sca ta Jacobo janeya janishqui. Jacobonen baquebo rihbi sca ta noquen doce xohtabo janishqui, noquen xeniboa. ⁹José qui notsi notsixon ta noquen xenibaan jaa maromaxon hinancannishqui, Egipto mai janin bohábo. ¹⁰Jaabi ta noquen Papa Dios hahbetanbi nihxon jan yomanahyamscanon yomanahai tihibi jaa yanapannishqui. Egipto mai janin quiquin hapon José siri joni hihqui shinannon ta José honan joni hihqui jismanishqui. Quiquin hapon sca ta Egipto mai jatihobi jaa José hihbomishqui. Jahuen xobo hihbomaxon, jahuen xoboho jihuetaibo rihbi jatihobi hihbomaquin.

¹¹Jaatian ta Egipto mai janin Canaan mai janin rihbi jahuenbi piti yamascaiyai pihan hihcannishqui. Hihti hohmis hohmescani. Piti merayamabirescanquin noquen xenibaan. ¹²Egipto mai janin tsinquinibho bimi bero tsama jai joi nincaxon ta Jacobonen noquen xeniboa raannishqui marohi cahábo. ¹³Jato raanhohxon raanrihbiquin. Jaatian pari ta Hea teh hen qui, Josepan jahuen huetsabo janishqui. Jaatian pari ta Tsoabo Josepan jenabo quin jaa mai meha quiquin hapon honanscanishqui. ¹⁴Jahuen huetsabo raanxon cahen jahuen papa Jacobo, jahuen jenabo jatihobi Josepan quenamaquin jano bohábo setenta y cinco jonibo. ¹⁵Jahuen baquen quenamaha sca Egipto main Jacobo cahi. Canish cahen janohaxbi mahuati. Noquen xeniboa rihbi yosibohax janohaxbi mahuati. ¹⁶Mahuataiton cahen Siquem janin jato boxon jano Abrahanen jahuen coriquinin maroni jano tsahonti main sca jato tsahoncanquin Siquem janinbi. Hamoren baquebo jan maronni tsahon janinbi.

¹⁷Papan Abraham yohini quesca sca jaonahiya ta Egipto janin noquen caibo

caípahonishqui. Hichascai, jaabo.
¹⁸Huetsa quiquin hapo sca ta
 jaresscanishqui, José honannihma joni
 sca. ¹⁹Jaan cahen noquen caibo paranxon
 jato tiromajaquin. Jaton baquexobo
 mahuanon hihxon jato nihi naman
 potabahinmaquin. ²⁰Jaatian ta Moises
 baquexo jahuen maman bahnishqui.
 Noquen Papa Diosen jisi, baquexo siri
 pishca. Quimisha hoxne xobohoxon jaa
 coirancanquin jahuen papan jahuen
 maman. ²¹Tahua naman sca
 jonebahinscancanquin. Jano racanahbo
 sca jaton quiquin hapon baque haibaan
 jaa meraquin. Meraxon cahen jahuen
 baquebi hahcajascaquin hanijauquin.
²²Haniscaiton cahen Egiplobaan quirica
 jatihibi jaa honanmacanquin. Haniscaxon
 hicha honanquin. Jan hahcai hochoxon
 joi nincacanquin.

²³Cuarenta bari jaresscaxon ta jahuen
 huetsabo pasijahi cati shinannishqui
 jahuen caibo pasijacatsihquin. ²⁴Jahuen
 caibo tiromajahiton egipo joni meraxon
 cahen jahuen caibo yanapanquin. Jaa
 tiromajahi joni copiquin rehtequin.
²⁵Noque piconon Papan yanapanai joni
 tah qui hih ta hea yohihi janoxihcaniqui
 hihqui shinamehti. Hihcax bi
 jascayamahi. ²⁶Hoxashinahax
 mohiyahxon sca noquen caibo rabe
 sinacanecanaiton meraxon cahen jato sina
 tantimacatsihquin yohiquin: ¿Jahua
 jenquetsahin man maton huetsabo
 betanbi tiromahananain? jato jaquin.
²⁷Jascayah bi jahuen caibo tiromajahi
 jonin sca Moises hueranbohanxon:
 ¿Tsoan yohihah min noquen hapo
 jacatsihquin? ¿Noque pontenica hihnon
 tsoan mia yohihiquin? ²⁸¿Hoa egipo joni
 min hahquipi quescajaquin min hea rihbi
 sca rehtecatsihquin? hahquin. ²⁹Jascarai
 nincacax ta Moises jabascanishqui.
 Madian mai janin sca jahuen nahua tocan
 jihuexon rabe baquejaquin.

³⁰Cuarenta bari huinorihbi sca jaiya ta
 Sinaí nihi namanxon sca jihui naman tiha
 pishca mapohihcamahi janin Papan
 yonoti jisnishqui. ³¹Jascapa merahax
 rahteti. Jisquin sirijacatsihquish ta
 hochoma pishca caxon noquen Hihbo
 yohuanai nincanishqui. ³²Hea tah hen
 miin papabaan Papa Dios qui. Abraham,
 Isaaque, Jacobo jaton Papa Dios ta hea
 qui hihqui nincaquin. Nincacax
 tastahihqui. Jisti raquescai. ³³Noquen
 Hihbo sca yohuanribihi: Hea janin tah
 min nichí. Miin tahe xaca potasacahue.
³⁴Egipto janin heen jonibo hohmis
 hohmisai tah hen jisi. Jaabo sai
 saihihcanahi tah hen nincacai. Jaa copi
 tah hen jato picohi sca botopaquetai.
 Johue hihcahisen hen mia Egipto mai
 janin raannon hahquin.

³⁵Egipto janin jihuetahbaiton, Tsoan
 yohihah min noquen hapo jacatsihquin,
 pontenica mia hihnon tsoan mia
 yohihiquin hah jaabaan Moises janí que
 bi ta jaamama jaabi Papan raannishqui
 jaton hapo sca hihnon. Jato piconica sca
 hihnon raanquin. Naman tiha jihui
 mapohi janin jahuen yonoti raanxon ta
 Papan jascajaxon Moises sca raannishqui.
³⁶Egipto mai janinxon sca cahen hahan
 rahtetibojaxon hahan honantibojaxon
 rihbi Moisesnin jato picoquin. Hian
 Joshini janinxon rihbi jascajaquin. Nihi
 namanxon sca cuarenta bari rihbi
 jascajaribiquin hahan rahtetibojaquein.
 Hahan honantibojaribiquin. ³⁷Jaa
 Moisesnin ta noque israeli baquebo
 yohinshqui:

Mato tocan ta hea quescapa jahuen joi
 yohinica Papan cainmatihqui maton
 huetsabo janinhahbi, hahquin. ³⁸Jaa
 Moises ta noquen caibo xenibo tsinquitai
 tocan nihnishqui. Papan naihoh queha
 yonoti betan ta nihnishqui. Sinaí mahchi
 janin rihbi ta Papan yonoti betan
 yohuannishqui. Noquen xenibo betan

yohuanni Papan yonoti betan rihbi ta jaa nihnishqui. Hahan jihueta joi ta Papan jaa hinannishqui, mato sca jaan rihbi nincamanon hihxon.

³⁹Jaabi ta noquen xenibaan nincacatsihyamanishqui. Jaa potabahinxon cahen jaton jointinin Egipto shinanrihbicanquin. ⁴⁰Aaron sca yohicanquin: ¿Hoa Moises, Egipto mai janinhah noque picoho Moises, jahuen cahipishquin? Non tah non honanyamahi. Noque bebon jaabo sca canon santobo noque hahxonhue jaabo sca noquen diosbo hihnon hahcanquin. ⁴¹Jascajaxon toro quescapa santojacanquin. Jascajaxon jaton hinábo jaa santo rehtexoncanquin. Jaton mequemanbi jascapahahax hahan jenimacani. ⁴²Jaa copi ta noquen Papan jato potabahinnishqui. Jahuen joi yohinicabaan huishaxon yohini quescajaquin jato potabahinquin, huishi, bari, jaabo jaton dios sca hihnon.

¿Man cuarenta bari nihi namanxon hinábo rehtexonxon hea mapojaxonpahonihquin; israeli baquebaan?

⁴³Hea queenyamaxon tah man Moloquet chopá xobo bihniqui. Huishi rihbi tah man chibandanpahonihqui, Renfan janeya maton dios jai quen. Santojarihbi tah man janiqui jaa sca yocanoxon. Jaa copi tah hen Babilonia hoque tocan mato potatibi hah ta Papan jato janishqui jahuen joi yohinicabo huishamaxon.

⁴⁴Noquen Papan jato yohini jahan honanti chopá xobo ta noquen xenibo tocan janishqui jaabo nihi naman nihnipahoni tian. Hen mia jismaha quescapahahue hahxon ta Papan Moises yohinishqui jascajaquin jan jaa xobojanon. Jaa copi ta Papan Moises jismani quescapajanishqui. ⁴⁵Josué betan noquen papabaan jaton mai hihbojanon

sca ta neno jihuelpahoni nahuabo Papan camaxonnishqui jaton mai bichinahbo. Jan camaxona ta Papan chopá xoboyabi becannishqui nea mai hihbojahi sca. David quiquin hapo hihnon caman ta jaa xobo janishqui. ⁴⁶Jaa David cahen Papan jisquin siri joni. Jascapahxon ta Papa Dios xobojaxoncatsihxon Davidinin noquen Papa yocanishqui, jahuen xohta Jacobo yamanicaton Papa Dios.

⁴⁷Queenxon bi ta Davidinin jaa xobojayamanishqui. Salomonen ta jaa hahnishqui. ⁴⁸Jascapa xobo jai bi ta mequeman xobojahibo janin Xaba Hihbo jihuayamahihqui. Papan joi yohinica yohuanni quescari tah qui:

⁴⁹Nai ta heen tsahoti qui. Mai ta heen taracahti qui. Jathibi janin ta hea jai. ¿Jenquetsahpa xobojahibo sca min hea jaxontihin? ¿Hea jano hihti jahua jaiquin?

⁵⁰¿Hoa jathibi hean hahyamaniquin? hih ta noquen Hihbo jaiqui hih ta Papan joi janin jaiqui.

⁵¹Nincayosmabon, Papan baquebo hilqui shinanax bi tah man jahuen nahuabo res qui. Maton jointinin shinanaxon maton pabinquin nincaxon bi tah man Papa nincayamabiresai. Dios Yoshin tah man jaapantehi, mato jahuen shinan hinapanan. Maton xenibo janí quescaribhi sca tah man jai. ⁵²Papan joi yohinicabo jathibi ta maton papabaan tiromajacannishqui. Papan ponte joni joyaxihqui yohihibo rihbi ta rehtecannishqui. Maton sca tah man jaa jahuen ponte joni paranxon rehtehohqui. ⁵³Hahan jihueta joi Papan yonotinin mato hinanni que bi tah man bihníox bi nincayamabiresai —jato jaquin Estebanen.

Esteban rehtehibo

⁵⁴Jascajaquin yohihah cahen sina sinacani. Sinaxon xeta yeres

yeresahcanquin. ⁵⁵Jaatian sca Dios Yoshiman hihbojaha jaan nai bejisihniquin. Bejisihnixon cahen Papan xaba jisquin. Papa mecayaho Jesus nichi rihbi jisquin.

⁵⁶—Jisnahue. Nai quehpemehtai tah hen jisi. Papa mecayaho noquebaque nichi tah hen jisi —jato jaquin.

⁵⁷ Jascahah bi coshin sai saihihscacani. Mequeman pabepobahini caxon jaa xecotancanquin. ⁵⁸Jemama qui sca boxon macaman tsacacanquin. Jato betan nichi bebo cahen janو jai, Saulo janeya, beronan tahni. Jaan coiranxonnnon hihxon jaton chopas pecaxon jaa taracanxon Esteban tsacacanquin rehtenoxon. ⁵⁹Macaman tsaca tsacahibaan bi:

—Heen yoshin bihhue, heen Hihbo Jesusen —hahquin Esteban.

⁶⁰ Jascahax raboxonen nichish coshin sca yohuani:

—Hea nescajahax hohchataibaan bi jato casticanyamahue, Hihbon —hihqui. Jascahax cahen mahuascai.

Saulonen tiromajahi

8 ¹Saulo rihbi cahen jaa mahuati queeni. Jaatianbi ta Jerusalen janinxon noquen huetsabo tiromajamenocannishqui hihti tiromajaquin. Tiromajahahbo jatihibi jabisi. Judea maibo janin, Samaria maibo janin rihbi jabiscani. Criston raantibo res jabayamahi. ²Papahon shinanaibaan ta hihti huinixon Esteban tsahonnishqui. ³Hoa Saulonen ta noquen huetsabo potojaquetannishqui. Jaton xoboboho hihquicahinxon cahen jato bihquin. Bebobo, haibobo rihbi coshin bi res boxon sipo xoboho jato tsahonquin.

Samaria janin Felipe cahi

⁴Jabisipibaan sca Papan joi yohibonaquin jaabo jan0 cahiton.

⁵Samaria jema janin caxon ta Felipenin jato Cristo joi yohibonanishqui. ⁶Jan yohihi nincaxon cahen jan hahan honantibojahi jisxon huesti shinanyaxon nincacoincanquin hahqui tsamajaquetaibaan. ⁷Jaan yohihah ta hicha tiroma yoshinyahpabo janinhax tiroma yoshinbo coshin sai saihihquish piconishqui. Yora honanyamajaquetaibo betan chantobo hihti caibo rihbi rohacahini. ⁸Jaa copi ta jaa jema janinhahbo hihti jenimanishqui.

⁹Felipe nocorihyamahiya cahen jaa jema janin huesti joni janish, Simon Janeja. Jahuen yobepan hahxon cahen Samaria mai mehabo rahtehax, Hea tah hen coshi joni qui hihcachihi. ¹⁰Jaa yobe yohuanaiya ta jatihixonbi nincacanpahonishqui. Jaton jonibaan, jaton patorobaan, jatihibichin nincaquin. Nea joni ta Diosen coshi qui, jahuen hihti coshi hahcaibo, hahcanquin.

¹¹Jahuen yobepan basi jan jato rahte rahtepahoni copi jaan yohihah nincacanquin. ¹²Jaabi Papan jato jihuemayaxihi qui joi siri Felipenin yohihah nincacoincanquin. Jesucristo joi siri yohihah nincacoincanquin. Felipenin jato nashimaquin, haibobo, bebobo rihbi. ¹³Simoman rihbi sca nincaquin. Felipenin nashimaha Felipe manati sca hahbetanbi nich. Hahan honantibojah Felipenin hahcái, jan Papan coshiyaxon tsoan jascajani que ma bi hihti coshin hahcái jisish Simon rahte rahtescoai.

¹⁴Samaria mai mehabaan Papan joi bihcoinal honanscaxon cahen Jerusalen janinxon Criston raantibaan Pedro betan Juan jato qui raanquin. ¹⁵Raanahbo cahax nocoxon sca Dios Yoshin bichibo hihxon jato yocaxonquin. ¹⁶Jesusen jane huestichin Felipenin jato nashimahi quen ta Dios Yoshin jato qui botopaqerihyamanishqui. Jaa copi cahen jato yocaxoncanquin.

¹⁷Yocaxonxon mehehah Dios Yoshin bihresscacanquin.

¹⁸Criston raantibaan mehehah Dios Yoshin bichibo jisxon Simon jato coriqui hinancatsihscrai.

¹⁹—Hea rihbi jascajati hahtipahmanahue, hean mehehahbaan sca Dios Yoshin bihnnon —jato jaquin.

²⁰Pedronen sca:
—¿Papan hinanresai jahuen yoshin min coriquinin maroti shinanain? Miin coriquiyabi mia queyoyaxihnon. ²¹Min tah min jahuabi bihtimahi. Jahuabi tah min bihyamayaxihqui. Papan jisí ta miin jointi tiromajauquin shinanai pontescahue. Hihbo yocahue, min tiromajati shinanai jan sohuanon. ²²Jointi mocapaiya mia notsi notsihi jihuetai tah hen jisi, hohchapan hiná tah hen mia jisi —hahquin Pedronen.

²⁴—Maton caya hea yocaxonnahue man hea yohihi quesa jayamanon —hahquin Simoman.

²⁵Jaatian sca jaabaan jisobo yohixon noquen Hihbaan joi siri rihbi yohihax Jerusalen janin cahi caribibi. Samaritanobaan jemabo janin joi siri yohibonahi bocani.

Etiopía joni betan Felipe behchinani

²⁶Noquen Hihbaan yonotinin sca ta Felipe yohinshqui:
—Carescahue. Jerusalen janinhax Gaza janin cahi bahin picoti catanhue chiponqui —hahquin. Jaa bahin cahen tsoabi jihueyamahan. ²⁷Caresscaax jano sca cahi. Picoti cahi jisí bi Jerusalen janin Papahon shinantanipish Etiopía joni jaa bahin jahui. Jaa cahen hapo. Etiopíabaan quiquin haibo hapon coriqui coirannicah. Jahuen hapon jane cahen Candace. ²⁸Isaíasnen huishani joi jisanan jahuen taramehtinín tsahotax cabachonen ninih taramehquirani jahui. ²⁹Dios Yoshiman sca Felipe yohiquin:

—Behchitanhue. Jahuen taramehti janin nanetanhue —hahquin.

³⁰Bishquihihcanahi caxon sca Isaías janeya Papan joi yohinicaton huishani joi jisish jaa yohuanhonahi nincaquin. Nincaxon yocascaquin:

—¿Min jisi joi min honanain?
—hahquin.

³¹—¿Jenquetsahaxon hen honanthin, huetsan hea yanapanyamahiya? Hea patax tsahoti nanehue —hahquin. ³²Jan jisbenahi huishani joi ta nea qui:

Carnero rehtenoxon hiohah bi neteresai quescarihbibi ta jahua hihyamahiqui. Jahuen rani rahmaxcorohah bi carnero baque sai saihiyamabiresai quescarihbibi ta yohuanyamahiqui.

³³Jaa rabinmaxon ta pontejayamaquin casticancaniqui.
Reherteres ta Tsoa jahuen xohtabo quin hih tsoabi jayamascanon

hihqui jaa quirica.

³⁴Jaatian:
—¿Yohinica jascarai tsoa yohiquin?
¿Jaabi nan? ¿Huetsa joni nan? Hea yohirohahue —Felipe yocauquin. ³⁵Jaatian sca jaa quiricaya yohuanxon Jesusen joi siri Felipenin yohiquin. ³⁶Bahin taramehcanahi cahax jano hian jaiton sca nococani.

—Jise. Jano ta jene jaiqui.
¿Jenquetsahpahi min hea nashimatimahin, Jesusen joni sca hea hihnon? —Felipe yocauquin.

³⁷—Miin jointiboyaxonbi nincacoinaiton tah hen mia nashimatih —hahscaquin Felipenin.

—Jesucristo ta Papa Díos baque qui. Hen tah hen shinancoinai —hahquin.

³⁸Jahuen taramehti janobi racarenennon cahen cabacho rebinica yohiscaquin. Jaton taramehti racarenenaiya cahen bototax rabebi jene

nenichi, Felipe betan jaa Etiopía hapo. Janoxon sca cahen Felipenin jaa hihquimatanquin nashimaquin.³⁹ Jaabo mapescaya bi Dios Yoshiman Felipe bilihnihniquin. Felipe jisyamascaax bi jaa huesti sca jenimahanan sca caresscaribhi.⁴⁰ Azoto jema janin sca sanarenenxon ta jano jai jemabo janin sca joi siri Felipenin yohibonanishqui, Cesarea jema janin noconoxon caman.

Saulo Hihbo qui hinamehti
(Hahnibo 22.6-16; 26.12-18)

9 ¹Jasca Felipe jai bi cahen noquen Hihbo qui hinamehtaibo tahtijaxon, Hen tah hen mato rehtetihui, Saulonen jato jaquin. Jato tahtijahax quiquin sacerdote janin cahi. ²Caxon, yocauquin: Jayaxon joni bihti quirica hea hinanhue hahquin. Jascajaxon cahen Damasco jema janin tsinquitai judiobo qui hinanti quirica huishamaquin. Criston joi bichibo meraxon jato nexaxon jaa quiricayaxon Jerusalen janin bebobo, haibobo rihbi hionoxon jascapa quirica huishamaquin. ³Huishamahax jaya cahi. Damasco qui nocoti hochoma nichibo sca naihoh quehaz xabacahinai xabapan jato xabajaquin. ⁴Main paquerenexon sca yohuanai joi nincaquin.

—Saulon, Saulon. ¿Jahua copi min hea tiromajacatsihquin chibanaín?

⁵—¿Tsoa min quin, Hihbon?

—hahscäuin.

—Hea ta Jesus qui, hea tiromajacatsihquin min hea chibanaí.

⁶Huenihue. Jema janin catanhue.

Jahueja min jatihiin, jano ta mia

yohinoxihcanihqui —hahquin.

⁷Yohuanai nincaxon bi jahuabi jisyamahax hahbe nichibo rahtetax

nihreneni. ⁸Main racatax

huenicahuanxon jahuen bero

rahcoyamaquin bi Saulonen jahuabi jisti hahtipahyamascaquin. Jisyamahiton sca

hahbe nichibaan mehuexon Damasco jema janin sca hioquin.⁹ Quimisha neten sca jano hihqui. Jahuabi jisyamascaquin. Jahua piyamaquin. Xehayamaribiquin.

¹⁰Jaa Damasco jema janin cahen Criston joni jai, Ananías janeya. Jaan cahen namaquen noquen Hihbaan quenahi nincaquin:

—Ananín.

—Neno tah hen qui, Hihbon —hihscai.

¹¹—Huenihue. Derecha janeya bahin caxon Judasen xoboho Tarso janinha joni benathanhue, Saulo janeya. Hea ta yocauquihqui.¹² Namaquen jismahah ta miin janeya joni jisishqui. Jahuen xoboho hihquixon jahuen bero sirinon hihxon jaa mehehi ta namaquen jisishqui —hihscai noquen Hihbo.

¹³—Jerusalen janinxon noquen huetsabo jan hicha tiromajahi tah hen hichaxon yohihi nincarahsihi, Hihbon.

¹⁴Neno sca roqui sacerdote hapobaan quiricaya jahui, mia yocacaibo rahsi bichí —hihqui Ananías.

¹⁵—Jaabi cahue. Hen caisax jaya teeti tah qui. Huetsa jonio, quiquin hapobo, israeli baquebo rihbi jan heen jane jato nincamanon hihxon tah hen jaa caisaí.

¹⁶Hea copi jan hihti teneyaxihqui bero tah hen jaa jismayaxihqui —hihqui noquen Hihbo.

¹⁷Jascahah caresscái Ananías. Jaa xoboho hihcoxon mehexon yohiquin:

—Heen huetsa Saulon, min hahan jahui bahin mihqui cainipixon ta noquen Hihbo Jesusen hea raanihqui, miin bero siriscanon. Dios Yoshiman rihbi mia hihbojanon —hahquin.

¹⁸Jaatianbi jahuen bero janinhax poto quescapa romishin pototani. Jahuen bero siricahinscaax hueniti. Hueniscaiton cahen Ananíasnen nashimaquin.¹⁹Pihax Saulo tantiscái. Damasco janinha Criston jonio betan sca basima tahni jihuetai, jahuentihi nete rah.

Damascobo Saulonen nincamahi

²⁰Jaatian sca judiobo tsinquit
xoboboho mapecanaxon jaan jato
yohibonaquin, Jesus ta Papa Diosen
baque qui, hahbonaquin Saulonen. ²¹Jaa
nincacaibo rahsi rahte rahteti.
—¿Jesusya yohuanaibo rahsi neatohon
Jerusalen janinxon
tiromajayamarahsiihiquin? ¿Jato
tiromajanoxon neno joyamahipishquin?
¿Jato nexaxon sacerdote hapobo qui
hiohi joyamahipishquin? —hihcami.
²²Tiabro jascarai bi Saulo coshihi. Nete
tihibi hashoan coshicanaxon Damasco
janinha judiobo netemaquin. Jesus ta
Papan caisai joni qui hihxon Papan
huishamani joi yohiquin jato
honanmaquin.

Saulo cahnecahini cahi

²³Basiscaxon cahen jaa rehteti
judiobaan shinanscaquin. ²⁴Rehtenoxon
baryahpan yame rihbi jahuen xobo
xehqui quexecanquin. Mia ta
rehtecatsihcanihqui Saulon, hahscäuin
caibaan. ²⁵Criston jonibaan sca yame
jema macan chique huinomaxon tasa qui
Saulo nanexon botonpaquecanquin
catannon.

Jerusalen janin Saulo nocoti

²⁶Botonahbo cahi Jerusalen janin
nocoti. Criston jonibo janin
hihquicatsihqui bi raquecani jatihibi.
Criston joni hihqui shinanyamacanquin.
²⁷Mapemacatsihyamahiboya cahen
Bernabé janeya jonin sca Criston raantib
janin Saulo hioquin. Hiohah bahinxonbi
noquen Hihbo jisxon jan nincaquipi jato
yohiquin. Damasco janinxon jan
raquexonma Jesusen joi siri yohirahsihi
jato yohiquin. ²⁸Jato betan sca jihuexon
Jerusalen janin jato pasijapaquexon
raquexonma noquen Hihbaan joi siri

yohiquin. ²⁹Judiohax bi griego joi
yohuanaibo judiobo sca huetsayohuani.

Joi bichincatsihquiaan bi:

—Jascama ta qui —jato jaquin.

Jaabaan rihbi jaa rehtecatsihscrai.

³⁰Rehtecatsihquia honanxon noquen
huetsabaan Cesarea janin sca Saulo
hioquin. Janohax sca Tarso jema janin
canon raancanquin.

³¹Jaatian jatihibi janin siripih sca
jihuecani; Judea main, Galilea main,
Samaria main rihbi noquen huetsabo
siripi jihuescrai. Coshijaquecani. Noquen
Hihbo qui hohchati qui raqueti jihuetai.
Dios Yoshiman rihbi jato sirijaquin
shinanmaquin.

Eneas rohajahibo

³²Jato tocan ta jatihibi janin Pedro nih
nipahonishqui. Lida janin jihuetai Papan
baquebo qui nocorihbi. ³³Jano cahen
Eneas janeya joni meraquin. Ocho bari
yora honanyamajaquetax jahuen
racatatin racatain meraquin.

³⁴—Enin, Jesucriston ta mia
rohajahiqui. Huenixon miin cacajati
bihhue —hahquin Pedronen. Yohihah
cahen hueniscrai. ³⁵Jaa jisxon ta Lida
jema janin jihuetaibo Cristo qui
hinamehnishqui jatihibi. Saron jema
janin jihuetai jatihibi rihbi Cristo qui
hinamehti nincacoinax.

Dorcus teehihribihi

³⁶Jaatian ta Jope jema janin rihbi
Criston joni janishqui, haibo. Tabita
jahuen jane. Tabita ta chaxo
hihcatsihquiqui. Jaa haibaan ta caibo
siribojaxonpahonishqui hicha. Jato
yanapanquin jatohon shinanxon.

³⁷Jascaphax bi hisinax mahuati.
Mahuascai bi nashimaxon bochiquiha
tapon racancanquin xoboho. ³⁸Jope ta
Lida hochoma qui. Lida janin Pedro jai
honanxon cahen Noque janin histon

jorihue yohihi canon, Criston jonibaan rabe joni raanquin.³⁹Yohihahbo cahen jato betan Pedro cahi caresscái. Nocotaiton jano haibo racanahbo chique janin Pedro hiocanquin bochiquiha tapo janin. Jano yonommabo rahsi tsahoti mayacahuani. Huinihi tsahocani. Cotonbo, sahuetibо jan jihueparixon jato quehxesonrasihi jismahi tsahocani.⁴⁰Jato jatihibi picomaxon raboxonen nihxon Papa yocaxonquin Pedronen. Yocaxonxon mahuatatah haibo jisxon sca:

—Tabitan, huenihue —hahquin. Jascalah jahuen bero peehtanxon Pedro jisish tsahohihncasai.⁴¹Tsahoscái bi mehuetanxon Pedronen huenihihncuin. Papan baquebo quenaxon yonommabo ribbi quenaxon teehihi qui jato jismaquin.⁴²Jan jascajaha Jope janin jihuetabо jatihibi yohiscacarquin. Nincaxon hichaxon nincacoinax noquen Hihbo qui hinamehti.⁴³Basi tahni sca Jope janin Pedro jihueti, Simoman xoboho. Simon ta yohina bichi poconica hihpahonishqui sapatojatijaquin.

Cornelio betan Pedro

10 ¹Cesarea jema janin ta sontaro hapo japhahonishqui Cornelio janeya. Cien sонтароbояhpa hapo. Italiano hahcaibo cahen jahuen sонтароbо.²Jaa sонтаро hapo cahen Papahon shinanai joni. Jahuen xoboho jihuetabо jatihibi hahbetan Papa qui hohchatи qui raqueti. Jema janin jahuajomabo coriqui hinanresquin. Papa Dios jaayocaquin.³Bari racapaquescaya cahen Papan yonoti hahqui nocoti jahui jisquin namaquen jisijaquin.

—Cornelion —hahquin Papan yonotinin.⁴Jaa jisish hihti raquetax:
—¿Jahua min queenain, Hihbon?
—hahscái.
—Min yocaxonai ta Papan nincaquihqui. Min joni huetsa

yanapannoxon coriqui hinanresai ta shinanihqui.⁵Jope janin canon jonibo raanscahue, jano jai Simon neno hihuehahbo. Jahuen Jane huetsa ta Pedro qui.⁶Huetsa Simoman xoboho ta jihuettihqui, yohina bichi poconicaton xoboho, quebijistima hian quexabi —hahquin Papan yonotinin.

⁷Papan yonoti yamacahinscaya rabe jahuen hahxontibo quenaxon Papahon shinanai sонтаро rihbi quenaquin jahuen xobohoxon teexonai jahuen sонтаро.⁸Jan rahma jisibi jato yohixon Jope janin jato raanscaquin.

⁹Raanah became. Nichish bahin hihshinahax mohiyahtax nihnichi jema hochoma sca jaabo jahuiya jaa xobo champani pemacanyaxon Papa yocaqui Pedro mapeti barin manan tsacahiya.¹⁰Pihan hihquish picatsihscái bi cahen xobohoxon pitijaquin janquenjariyamacanquin. Jaatian namaquen jisijaquin jisquin.¹¹Nai quehpemehtai jisquin. Hani sábana quescapa hoquen panexbehcoinxon main caman botonai jisquin.¹²Jaa chicho cahen jatihibi yohinahbo main ninotaibo ribbi, hihsabo ribbi jai.

¹³—Huenihue, Pedron. Rehtexon pihue —hahqui nincascaquin.

¹⁴—Hen tah hen pitimahi, Hihbon. Jahuentianbi tah hen rishtayabo piyamaniqui, pitimabo —hahquin.

¹⁵Yohuanai nincaribiquin:

—Siri sca ta qui Papa jaiya tah min tiroma ta qui hih min jatimahi —hahqui.

¹⁶Quimisha coti jascalahahnani. Jaatian jisi bi naihohxon sábana bilihinmirihbiquin.

¹⁷Jan namaquen jisibi jahua jenquetsi jascarihqui hihxon shinanscaquin. Shinan shinanaiya bi Cornelionen raanipibo xehqui janin nocoscái. Simoman xobo yocacahcani.

¹⁸—¿Simon Pedro hahcaibo neno jihueyamahiquin? —hahcani yocacahti.

¹⁹Janjisíbo Pedronen shinanparihi bi
Dios Yoshiman yohiquin:

²⁰—Hoa ta mia benahi jahuiqui.
Huenihue tahca. Bototax basihamaxa jato
betan caresscatanhue. Hean horixon
raanah ta becanihqui —hahquin.

²¹Botoxon sca:

—Hea tah hen man benahi joni qui.
¿Jahua queenax man jahui? —jato
jaquin.

²²—Noquen hapo ta Cornelio qui, cien
sontaroboyahpa. Sirijaquin shinanai joni
tah qui. Noquen Papahon shinanai.
Jatihibi judiobo ta jahan jenimahiqui.
Jaa ta Papan yonotinin yohihipishqui,
Jonibo raanhue, hahquin. Mian yohihi joi
jan nincanon hihquish tah non mia bichi
jahui jahuen xoboho min catannon
—hahcanquin.

²³—Mapenahue —hahxon sca janu jato
hoxamashinaquin. Hoxashinahax
mohiyahtax sca jato betan caresscái.
Caibo Jope janinha noquen huetsabo
rihibi ta jaa manahi bocanishqui.

²⁴Nihbahinahipish huetsa neten sca
Cesarea janin nococani. Pedro nocoti
manahahnan jahuen jenaboh jatihibi
quenamaxon, jahuen hahbe rabeti siribo
rihibi Cornelionen jato quenamaquin.

²⁵Pedro mapescaya cahen behchihí
cahax jahuen tahe naman betihipaqueti.
²⁶Jaa hueniquin Pedronen yohiquin:

—Huenihue. Hea rihibi tah hen mia
quescapa joni qui —hahquin.

²⁷Jaa yohuanquinhanan xoboho
hihcoxon hicha jonibo nocohihsacai
meraquein.

²⁸Jato meraxon:

—Nahuabo pasijatima joi ta noque
judiobo jai. Nahuabaan xoboho
mapetima joi cahen noque jai. Jaa cah
man honanai. Jaabi ta Papan hea
jismahipishqui, mehetima rishtayahi hen
tsoabi jayamanon. Jato yohuanquinhax
noque rishtaya jai ta tsoabi yamahihqui.

Hen honannon hihxon ta Papan hea
jismahipishqui. ²⁹Jaa copi tah hen
joresscái, Caresscatanhue Papan hea jaáh.
Hea yohiscanahue tahcah. ¿Jahua copi
man hea quenamahipiquin? —jato
jaquin.

³⁰Cornelio sca yohuani: —Chosco nete
sca nescaran bari racapaque sca jaiya tah
hen heen xobohoxon Papa vocaxon
pehnenei chopaya joni hea bebon
sanarenenai hean jisipiqui. ³¹Hea ta
yohihipishqui: Cornelion, min vocaxonai
ta Papan niincaquihqui. Min joni huetsa
yanapannoxon coriqui hinanresai ta
shinanihqui. ³²Jope janin jonibo
raanscahue, Simon Pedro hahcaibo
quenamaquin. Yohina bichi poconica
Simoman xoboho ta jihuetihqui,
quebijistima hian quexabi, hah ta hea
jaipishqui. ³³Jaatianbi tah hen mia
quenamanoxon raanipiqui. Jahuerohahi
tah min nocoscái. Neno tah non noquen
Papan noque jisiya noque tsinquitai,
noquen Hihbaan mia yohihi joi
nincacatsihqui —hahquin.

Cornelion xoboho Pedro yohuanai

³⁴Pedronen sca jato yohiquin:

—Rahma tah hen honancoinscái. Papan
ta caibo mentan huetsabo hashoan siri
jisymahahiqui. ³⁵Papahon shinanxon ponte
hahcái nahuabo ta Papan siri jisiqui. Hen
tah hen honancoinscái. ³⁶Noque israelí
baquebo qui ta jahuen joi raannishqui.
Jatihibi jonibaan Hihbo hihxon ta Papan
rahuiboma sca noque janon Jesucristonen
noque hihbojahiqui. ³⁷¿Judea mai
jatihibi janin jahua jahoxquin? Man tah
man honanai. Galilea mai mehax ta joi
behna jamenonishqui, Juaman yohixon
nashimahipi pecaho. ³⁸Nazaret janinha
Jesus ta Papan caisai joni qui, non
honannon hihxon sca ta jahuen Yoshin
siri Papan jaa hinannishqui, jahuen coshi
rihibi hinanquin. Papan yanapanca sca ta

jonibo sirijabonahi nihnnishqui, tiroma yoshiman hihbojaha jonibo rihbi jato jatihibi sirijabonaquin. Man tah man honanscái.³⁹Neno noquen judiobaan mainxon jan hahpahoni, Jerusalen jema janinxonbi rihbi jan hahpahoni jatihibi tah non jisnixon yohinica qui. Jihuín hueonxon rehthehibo rihbi jisoxon tah non yohihi.⁴⁰Jan hihquipi jahuen quimisha neten sca Papan huenirihbixon jísíbo hihxon noque qui cainmahi jisoxon tah non yohirihbihi.⁴¹Jan hihquipish bi hahquirihbi teehihquipi non hahbetan pixon xehacahchihi ta Papan noque caisoxqui, Cristo jihueribiscái joi yohihi sca noque janon. Jatihibichin jisnon hihxonma bi noque jan caisaibaan jisnon hihxon ta noque janin jaa cainmahoxtqui.⁴²Jahuen joi siri non jonibo yohinon ta noque yohihoxqui. Jihuetaibo betan muhaninhbo jan siri hin tiroma quin hihxon jisnon hihxon ta Papan jaa yohinishqui. Jaa joi rihbi non yohinon ta noque yohihoxqui.⁴³Cristo nincacoinai jonibo jatihibi ta jaan jaton hohcha sohuaxoniqui. Jatihibi Papan joi yohinicabo ta jascari yohuannishqui —jato jaquin.

Dios Yoshin bichibo judiomabo

⁴⁴Jascari Pedro yohuanparihi bi nincacainbo jatihibi Dios Yoshiman hihbojaquin.⁴⁵Judioxon bi nincacoinaibó Pedro betan jahuec rahtescái. Jaton nahuabo que bi Dios Yoshiman jato hihbojahi jisish rahtecani.⁴⁶Huetsapahi yohuanai jato nincacanquin. Papa Dios qui jaabo hihti siripi yohuanai nincacax rahte rahtecani. Jato sca Pedronen yohiquin:

⁴⁷—Non haho quescajaribiquin ta neabaan Dios Yoshin bichiqui. Non jato nashimanon. Tsoanbi ta Jato nashimayamanahue noque jatimahiqui —Pedronen jato jaquin.

⁴⁸Jascajaxon Jesucriston janen jato nashimanon Pedronen yohiquin.

Nashimaha sca:

—Huetsa neten cayanoxon noque qui banetahhue —Pedro jacanquin.

Jerusalen janinhahbo Pedronen yohihi

11 ¹Jaa pecaho cahen Judea mainxon Criston raantibo betan janoha noquen huetsabaan nincaquin. Jaton nahuabaan rihbi Papan joi bichipi nincaquin.²Jerusalen janin nocotaiton sca Pedro pontecatsihquin, Jato honantijati ta jaiqui hihnicabaan Pedro yocaquin:

³—¿Jahua jenquetsahin min noquen nahuabo janin hihcohipiquin? ¿Jahua jenquetsahin min jato betanbi pihipiquin? —hahcanquin.

⁴Jan jisipibo sca Pedronen jato yohiquin sirijaquin:

⁵—Jope jema janinxon noquen Papa yocaxon tah hen namaquen jisijaquin hihthosi sábana quescapa jisipiqui, hoquen panexbehcoinxon naihohxon botonai. Hea bebonbi ta botonipishqui.

⁶Jisquin sirijaxon tah hen yohinahbo, nami pinicahbo, ninotaibo, hihsabo rihbi jisipiqui.⁷Yohuanai sca hean nincaquin, Huenihue, Pedron, rehtexon pihue, hea jaquin.⁸Hen tah hen jascajatimahi, Hihbon, jahuentianbi tah hen pitimabo rishtayabo piyamaniqui, hahquin hean.⁹Jaabi hahquirihbi naihoh quehax yohuani, Siri sca ta qui Papa jaiya tah min tiroma ta qui min jatimahi, hihqui.¹⁰Quimisha coti non jascahrainanai bi naihohxon jatihibi hahquirihbi ninihniquin.¹¹Jaatianbi ta noque jano hihqui xobon quimisha joni nocotipishqui Cesarea jemanxon raanipi.¹²Nahua tah qui hihquishma hen jato betan catannon ta Dios Yoshiman hea yohihipishqui. Nea seis noquen huetsabo rihbi ta hea manahi bohipicanaxqui. Jahuen xoboho tah non

hihcohipiqui.¹³ Jaan ta noque yohihipishqui. Jan jisi bi jahuen xoboho nichi Papan yonoti jahui. Nihrenenxon cahen Jope janin joni raanhue Simon Pedro hahcaibo hihuemon, hahquin.
¹⁴Hahan mia Papan teehihmahí joi ta mia yohixihquiqui miin xoboho jihuetaiboyabi, hah ta Papan yonotinin jaa jaipishqui.¹⁵ Hean jato yohimenohiya bi ta Dios Yoshiman jato hihbojahipishqui non yohimenohi tian jan noque hihbojaho quescajariquipu.
¹⁶Jaatian tah hen noquen Hihbaan noque yohini joi shinanscaipiqui, Juaman jenen nashimahi bi tah hen jenen nashimaquin hahcajaquin mato Dios Yoshin hinanyaxihqui, hah jan noque janí tah hen shinanscaipiqui.¹⁷Noquen Hihbo Jesucristo nincacoinaiton Papan noque hinanho Yoshin jato rihbi jan hinanaiya ɿjahua hihxon hen Jascajayamahue Papan hen jatihin? —jato jaquin.

¹⁸Nincacax netecani. Papa qui sca siripi yohuancani:
—Nahuabo rihbi ta shinan pontemaxon jato teehihmahihqui, hicahisen —hihcani.

Antioquia janinhabo noquen huetsabo

¹⁹Hoa Esteban rehtexon jato tiromajaha jabisaibo ta Fenicia main caman bocannishqui. Chipre mai janin, Antioquia janin rihbi ta nococannishqui. Caquin bi judiobo rahsi Papan joi yohibonacanquin.²⁰Caibo Chipre mai janinhabo hihxon, caibo rihbi Cirene janinhabo hihxon, Antioquia janin nocoxon sca jaton nahuabo rihbi noquen Hihbo Jesusen joi siri yohiquin.

²¹Noquen Hihbaan ta jato yanapannishqui. Jaabaan yohihah ta hihti caiboxon nincacoinxon noquen Hihbo bijnishqui.

²²Jascajahibo nincaxon ta Jerusalen janinxon noquen huetsabaan Bernabé

raannishqui Antioquia janin canon.
²³Nocoxon Papan jahuen shinan jato hinanai jisish jenimahi. Noquen Hihbo jeneyamahahbo hihxon cahen jaan jato yohiquin sirijaquin noquen Hihbaan yohihi quescabijaquin hahcabó hihxon.
²⁴Janohahbo hicha joni sca noquen Hihbaan hibbojaquin. Bernabé ta siri joni janishqui Dios Yoshiman hihbojaha joni. Papan jato hahxontihi cahen jaan shinancoinquin.

²⁵Saulo benahi sca Tarso janin Bernabé cahi sca cahi. Saulo meraxon Antioquia janin hihuequin.²⁶Huesti bari Papan caisaibo betan tsinquixon cahen rabechin hicha jonibo haxemaquin. Jano pari ta Criston jonibo cristianobo janemencannishqui.

²⁷Jaatian Jerusalen janinhax Papan jismaha yohihibo nocoti Antioquia janin.
²⁸Agabo janeya sca jato tocan nihxon jatihibi main piti pishinscaax pihan hiyayaxihqui jato Dios Yoshinyaxon yohiquin. Jan jascani cahen jascacoinscái, Claudio quiquin hapo hihqui tian.²⁹Jaa copi cahen Judea main jihuetai noquen huetsabo qui coriqui raanti Criston jonibaan shinannish.³⁰Jatihixonbi hahtipahnoxon caman raanti shinancanquin. Shinanxon jaabaan shinanai quescabijacanquin. Jaton pastorobo qui hinantannon hihxon Bernabé betan Saulo jaya catannon hihxon raancanquin.

Jacobo retehipixon Pedro sca bichibo

12¹Jaabo cahiya ta jaton quiquin hapo Herodesnin caibo Papan joi nincacoinaibo bijnishqui, jato tiromajanoxon bihquin.²Juaman huetsa ta Jacobo janishqui. Jaa ta Herodesnin rehtenishqui.³Jaa retehiya judiobo jenimahi jisxon Pedro rihbi bihquin chahoma paan fiestajahiboya.⁴Bihxon sipo xoboho tsahonquin. Chahoma paan

fiesta pecaho rehteyaxahpan costanahbo hihxon jahuen sontarobo Pedro coiranmaquin. Chosco coiranti janahue, huesti coiranti cahen chosco sontaro, jato jaquin.⁵ Sipo xoboho Pedro tsahotaiya cahen noquen huetsabaan noquen Papa hihti yocaxonquin.

Hihbaan Pedro picohi

⁶Jisibo hihxon bahquish Pedro rehtenoxahpan hih Herodes jai bi sipo xoboho Pedro hoxahi. Jaa yamebi rabe cadenanen jato qui menexah rabe sontaro napon Pedro hoxahi. Xehqui janin rihbi sontaro coiran xehqui janichi.⁷ Jaatian noquen Hihbaan raanah jahuen naihoh queha yonoti sanareneni jahui. Sipo xobo chicho xaba siri jaresscái. Rahpasxon Pedro mohinquin.

—Huenihue histon —hahquin. Huenitaiya hahan menexipi cadena mepequehti.

⁸—Miin chopá sahuexon tahe xaca rihbi sahuehue —hahquin Papan yonotinin. Jascajaha sahuequin.

—Miin tarin rahcoxon hea chibanhue —hahquin.

⁹Jascahah hahbe cahi picoscái. Papan yonotinin hahcoinai honanyamaquin. Namaquen jisija tah hen jai hihqui.

¹⁰Huetas coiranai sontaro huinoxon huetsa rihbi huinohax yami xehpoti qui nococani, jano jema qui cati. Hahmebi xehpoti quehpemehti. Picotax babin sca bocani. Cahiya bi Papan yonoti yamacahinscái.¹¹Shinanscaax:

—Herodesnin hea rehteyamanon hihxon ta jahuen yonoti Papan raanaxqui heen caibaan hea jacatsihqui jatihibi rihbi hea jayamanon hihxon. Rahma tah hen honanquin sirijascai —hihqui Pedro.

¹²Honancoinscaax Marian xobon cahi. Jaa María ta Juaman mama qui. Juaman Jane huetsa cahen Marcos. Jaa xoboho tsinquixon ta Papa yocacannishqui

hichaxon Pedro yocaxonquin.

¹³Jemanhihti xehpoti Pedronen tontonhahcai nincacax Rode janeya xontaco jisi jahui.¹⁴Pedro joi nincaxon honanax hihti jenimahax quehpennonti shinanaxma bishquihihcanahi caribili xobon. Hihcohax:

—Pedro ta jemanhihti janin nichiqui —hihqui.

¹⁵—Min tah min tehquehahqui —hahcanquin.

—Hihyama tah hen jai. Jaa coin tah qui —hiresi.

—Jahuen yoshin rah ta qui —hihsacani.¹⁶Pedronen xehpoti tontonhahquin jeneyamaquin. Quehpenscaxon jisish rahte rahtecani.

¹⁷Netetahbo jahuen mequen sanaxon sipo xobo janinhah noquen Hihbaan jaa picohah jato yohiquin.

—Jacobo, noquen huetsabo rihbi yohiscatannahue —jato jabahini huetsa xoboho caresscái.

¹⁸Xaba paquescaya sca rahtetax sontarobo coro coroti, hihti corocani. ¿Jahuen Pedro cahaxquin? hihcani.

¹⁹Jato Benatannahue hahca bi benacasquimahiboya coirannica sontaro yocapaquexon, Nea coirannicahbo rehtenahue hahscacuin Herodesnin. Jascajaha Judea mai janinhax Cesarea jema janin jihueta sca Herodes cahi.

Herodes mahuatai

²⁰Jaatian sca Tiro mai janinhahbo qui Herodes sinati. Sidon janinhahbo qui sinarihbih. Jaa copi huesti shinanyahax hahqui nococani. Nocoxon jahuen xobo coirannica Blasto yohuanquihnxon jeenhihmacquin jan jato yanapannon. Quiquin hapo sca hihti yocacanquin jan jato qui sinayamascanon hihxon. Jahuen mai janinhax jaton piti jahui copi raejacatsihcani.²¹Jaa neten yohuanyahnpán hih jan jaipi jaa nete

nocotaiya jahuen quiquin hapo tari sahuehax, jahuen quiquin hapo tsahotinin tsahoxon basi yohuanquin Herodesnin jato yohi yohiquin.²²Herodes yohuanai nincacax:

—Diosax tah min yohuanai. Joni yohuanaima ta mia qui —hihcani coshin.²³Jaatianbi, Jascama ta qui, Papa Dios huesti ta Dios qui, hih jan jayamahi copi noquen Hihbaan yonotinin Herodes rishquiquin. Rishquiham xenahax mahuati.

²⁴Herodes mahuataiya sca Papan joi caicanascai. Hashoan hocho sca nococanahi.

²⁵Jaatian antioquiaaban coriqui hinana Jerusalen janin noquen huetsabo qui jaa coriqui hinantanax Bernabé betan Saulo joribiscuai. Juan rihbi becanquin, Marcos cahen jahuen jane huetsa.

Bernabé, Saulo canon raanaibo

13 ¹Antioquia janin ta Papan caisaibo tocan haxemanicahbo betan Papan jismaha yohinicabo japhaponishqui, huetsa cahen Bernabé, huetsa cahen Simon, joni huisoni hahcaibo, huetsa cahen Cirene janinhah Lucio, huetsa cahen Manaen jaton gobernador Herodesnin yanapannicah, huetsa cahen Saulo. Jaabo rahi. ²Piti tenehahnhan Papahon shinanaiton Dios Yoshiman jato yohiquin:

—Hen jato yohihi tee jatannon Bernabé betan Saulo raannahue —jato jaquin.

³Jascajaha piti tenehahnhan Papa yocaxon jato metsoncanquin, mato tah non yanapantihi hahxon jascajacanquin. Jascajaxon jato camacanquin.

Chipre janin Papan joi nincamahibo

⁴Jascajaquein Dios Yoshiman camahah Seleucia jema janin cahax Chipre mai pishca caman quebijistica hian nontin pohquejaqueti. ⁵Salamina jema janin

mapexon judiobaan tsinquitxi xobohoxon Papan joi yohicanquin. Juaman rihbi ta jato yanapannishqui. ⁶Jaa mai pishca nabebacahini cahax Pafos jema janin nococani. Jano ta yobe joni meracanishqui, Barjesus janeya. Judio. Papan jismaha yohinicahicamahi. ⁷Jaa ta janoha tininti teixonai joni hihpahonishqui. Tininti ta Sergio Paulo janeya janishqui, honan joni. Papan joi nincacatsihxon jaa tinintinin Bernabéya Saulo quenamaquin. ⁸Jaa yobepan jane huetsa cahen Elimas, yobe hihcatsihqui. Jaan jato Jascama ta qui, hahquin, tinintinin nincacoinmis hihxon. ⁹Jaatian Pablo hahcaibo Saulo Dios Yoshiman hihbojaha jaa yobe bejisquin sirijaxon yohiquin:

¹⁰—Mia tah min tiroma yoshiman baque qui. Jatihibi pontejaquin shinanaibaan rahui ta mia qui. Paran paranmis. Hihti tiromajaquin shinanai ta mia qui. ¿Papan ponte bahibo min mayamahi tanticatsihyamahin?

¹¹Jisresscahue. Noquen Hihbaan ta mia mehelihihi, benchescaxon min bari basi tahni jisyamascanon —hahquin.

Jan jascahiya bi jahuen bero coprapax bahquishcahinscái. Tsoan hea mehuetanxon hiotihiquin, hihquish joni benahi huea hueacanahi cahi. ¹²Jaa jaschihi jisxon noquen Hihbaan joi nincacax rahtexon jaton tinintinin nincacoinquin, jahuen jointiboyaxonbi nincacoinquin.

Antioquia janin nocotaibo

¹³Jaatian Pablo, jaabo, Pafos mai potabahini nontin caresscaax Panfilia mai janin nocoti Perge jeman. Jano jato potabahini ta Jerusalen janin sca Juan caribinshqui. ¹⁴Perge janinhax cahax Pisidia mai meha Antioquia qui nococani. Jaton tantiti neten sca janoha judiobaan tsinquitxi xoboho hihcohax tsahocani.

¹⁵Moisesnin huishani joi nincamaxon Papan joi huishaxon yohinicabaan joi nincamaxon tsinquitu xobo coirannicahbaan janu tsahotai bi jato quenaquin:

—Noque huetsabaan, jonibo yohiti joi jaxon nihhinaxon noque yohirohahue —hahcanquin.

¹⁶Jascalahbo nihhinaxon mequen sanaxon Pablo jato yohiquin:

—Heen caibon, noquen Papa Diosohon shinanaibon, hea nincanahue. ¹⁷Noque israelibaan Papa Diosen ta noquen xenibо cainsixon Egipto main jaabo jihuetaiya jato caijanishqui. Jahuen coshi jismaxon ta janhox piconon jato hionishqui. ¹⁸Cuarenta bari sca ta jato tenenishqui nihi naman nih nichaiboya. ¹⁹Canaan mai janin sca siete quiquin hapobo jaton jihuetaboyabi camaxon ta jaa mai israelibaana sca hihnon hihxon jato hinannishqui. ²⁰Cuatrocientos cincuenta bari jano jihuescanon jato jaa mai hinanquin. Jahuen joi yohinica Samuel janon caman ta jato pontenicabо hinannishqui. ²¹Quiquin hapo sca noque hinanhue, hah sca ta jacannishqui. Yocacahbo cahen Cisin baque Saulo jato hinanquin. Jaa ta Benjamin baquebo janishqui, Saulo. Cuarenta bari ta jaan jato coirannishqui. ²²Jaa potascaxon ta Davidin sea jato coirannon hihxon jaa sca quiquin hapomanishqui. Jaa yohihi ta Papan nescajanishqui: Isaín baque David tah hen heen shinanya jisi. Hea queenai quescabija ta jaan jatihiqui hea hahxonquin. ²³Jaa Davidin chini baquebo janinhah ta noque israelibo teehihmanica Papan cainmascanishqui, Jesus, jan yohini quescabijaquin. ²⁴Jaa jonon ta jaton shinan pontexon nashimati Juaman jato yohinishqui, jatihibi noquen caibo yohiquin. ²⁵Jato yohiquin queyoti hochoma sca: ¿Hea jahua quin shinan man Jain? Hea ta jaama qui. Hehchon ta

huetsa jahuiqui. Jaa hihti siri copi tah hen jahuen sapato risbi pecaxonti hahtipahyamahi hahquin jaan.

²⁶Heen huetsabaan, Abrahanen baquebaan, Papahon shinanaibaan. Noquen nincanon hihxon ta Papan noque jaa joi raannishqui, hahan teehihi joi non nincanon. ²⁷Jaa teehihmanica jisxon bi ta jaa honanyamacannishqui. Jatihibi tantiti neten Papan yohinicabaan joi nincamaha bi nincayamaribixon ta Jerusalen janin jihuetaibaan jaton hapobo betan jaa rehtemacanishqui, jayaxihquibo Papan yohini quescabijaquin. ²⁸Jahua copi rehteti yamahi bi Pilato yocacanquin jaa rehtemanon. ²⁹Jaa yohihi huishani joi jai quescabijaxon jihuun hueonahbo mahuascai botonxon ta tsahoncannishqui. ³⁰Hihquipi bi ta Papan teehihmaribinishqui. ³¹Hahquirihbi teehihquish ta hahbetan Galilea janinhax Jerusalen janin cahipibo qui cainnishqui, jaabaan sca jan teehihribihi jismicahboxon caibo sca yohinon.

³²Joi siri tah non mato yohihi, hea huetsabaan. Noquen xenibo jan hahxontjani quescabija ta Papan jaiqui.

³³Jesus hihquipi bi hahquirihbi teehihmaquin ta jan hahxontjani quescabijaquin Papan noquen xenibo hahxonihqui, noque teehihmanica janon. Jahuen rabe behua huishaquin Davidin yohini quescabija qui: Mia tah min heen baque qui. Nea neten tah hen heen baque mia hihqui jato honanmascai. ³⁴Jaa hihquipish bi jahuentianbi yora pisiyamscanon hahquirihbi teehihmahia ta nescajaquin rihbi yohinshqui: Hen jahuentianbi huetsajatima joi siri hen David yohini quescabijaquin tah hen mia hahxonscai, hih ta jaiqui huetsa quirica janin rihbi. ³⁵Jaa yohihi ta huetsa behua janin rihbi nescarhqui: Min caisai miin baque tah min pisimatimahi hihqui.

³⁶Jihueparixon ta Papa queenai quescajaquin Davidinin hahnishqui. Mahuatai tsahonahbo ta jahuen yora payoscanishqui. ³⁷Papan hahquirihbi teehihmah i joni ta jascayamahihqui: jaa ta payoyamanishqui. ³⁸Jaan ta maton hohcha sohuaxonti hahtipahiqui. Man honanon hihxon tah non mato yohihi, hea huetsabaan. Moisesnin noque yohini quescabijaxon bi man potati hahtipahyamahi hohcha jatihibi ta jaan sohuahihqui nincacoinaibo rahsi. ³⁹Jaa nincacoinaibo jatihibi ta Papan sirijisiqui. ⁴⁰Papan joi yohinacaaban ta nescajaquin huishaxon yohinishqui:

⁴¹Jisnalue, hea hosanaibaan.

Rahtenahue queyoscanoxon. Man jihuetai netenbi hen hahan rahteti hahcaya bi tah man hihcoinai shinantimabiresai. Papan ta jascajaaxqui hih huetsa jai bi hih ta jahuen huisha jisiqui. Jistahi man. Jan yohihi quescabija jan mato jamis —jato jaquin.

⁴²Jascanax cainscaiton huetsa tantiti neten rihbi noque yohirihbiyaxahnhue hihxon jato hihti yocacanquin.

⁴³Tsinquixon yohuanaba nincacuin queyoxon sca, jaton nahua hihpahonish bi Papahon shinanax judioscaibo betan judiobaan hichaxon Pablo, Bernabé chibanaquin. Chibanahabo Papan shinanax quescari jihuetahabo hihxon jato sirijaquin yohiquin. ⁴⁴Huetsta tantiti neten sca Papan joi nincacuin jaa jema janinhahbo jatihibi tsinquecani. Huestibores pishini. ⁴⁵Pablo yohuanai nincacaibo hihti caibohi jisish notsi notsixon:

—Jascama ta qui tiroman
—hahcanquin judiobaan.

⁴⁶Pantecatsihquiaan bi raquexonma Bernabé betan Pablone jato yohiquin:
—Mato pari tah non Papan joi nincamatii jai. Queyoyamanox manataibomaxon man jaa joi potascaiyta

tah non nahuabo sca yohihi. ⁴⁷Non jascajanon ta noquen Hihbaan noque yohinishqui:

Nahuabo min xabajonnon tah hen mia yohihi jano nai chibechijaquetancahuanaiton caman hahan teehihmati joi min jato nincamanon

hah ta noquen Hihbo janishqui —jato jaquin.

⁴⁸Jan jascarai nincacax judiomabo jenimacani. Papan joi hihti siri jiscanquin. Queyoyamanox jihueyaxihquibo rahsi noquen Hihbo qui hinamehti, Papan caisnibo rahsi.

⁴⁹Janohax sca cahen janoha maibo janin Papan joi cafcanaahi. ⁵⁰Papahon shinanax bi haibo patorobo sca ta jaa judiobaan Pablo qui sinamanishqui, jaa jema janin jihuetaibo haibo patorobo. Janoha patororihbi sinamacanquin Pablo Bernabé rihbi picohahbo hihxon. Sinamahabo cahen jato jaa mai janinhah picocanquin.

⁵¹Jaabaan picohah yohitimabohi honanahbo hihxon jaton sapato poto jato quiri tahabahini Iconio jema janin sca boresscacani. ⁵²Jaabi Jesusen jonibo hihti jenimahi. Dios Yoshiman hihbojaha jenimahi jihuecani.

Iconio janin nococani

14 ¹Iconio janin sca judiobaan tsinquitu xoboho mapexon jato yohiquin nincacoinahbo. Yohihah hichaxon nincacoincanquin judiobaan, judiomabaan rihbi. ²Nincacoinaiboya cahen nincayosma judiobaan judiomabo sinamaquin. Noquen huetsabo jistahimanon hihxon jato tiroma shinanhinancanquin. ³Jaabi ta janobi basi tahni jihuescacannishqui raquexonma noquen Hihbaan joi jato yohihahnan. Jatohon shinanax Papan hahxonai joi nincacoinahbo hihxon ta noquen Hihbaan rihbi yanapanquin hahan

honantiboya hahan rahtetibo jato jaxonnishqui. ⁴Jema janinhahbo sca caibo huetsa shinanya hihnon caibo rihbi huetsa shinanya hihqui. Judiobo res caibaan nincaquin. Caibaan rihbi Criston raantibo res nincaquin. ⁵Jasca sca jaiya cahen jato tiromajaxon macaman tsacanon benahue hihcani judiomabo, judiobo, jaton hapobo rihbi. ⁶Macaman tsacacatsihquibo honanax jabascacani. Licaonia main, Listra, Derbe, jaa jemabo janin bocani. ⁷Jano sca Papan joi siri yohicanquin.

Listra janin Pablo tsacahibo

⁸Listra janin ta chanto joni meracannishqui, jahuen ponobo yosmahi cainniss jascabiscái. Jahuentianbi nihti hahtipahyamani. ⁹Jaan cahen Pablo yohuanai nincaquin. Jaa Pablonen bejisquin sirijaquin. Jisanan Papan mehehah rohatihi jan shinanai honanxon coshin sca yohiquin:

¹⁰—Huenihue. Nhirenenhue —hahquin. Jascalahay cayahihnat tax nichí tana tanascai. ¹¹Pablonen jascajaha jisish tsiniqujaquetaibo coshin yohuanscái:

—Yorayahpa quescapahax ta dios rabe noque qui botopquetaxqui —hihcáni jaton join, Licaonicabaan join.

¹²Bernabé ta Júpiter janecannishqui. Pablo cahen Mercurio janecanquin, yohuan hihbo hapo quen. ¹³Júpiter hiná rehtexonicah sca hicha jonibo betan cahi. Pehi toronjaxon ganado tejomaxon jema xehqui janin jano Júpiter hahcaibo jaton diosen xobo jaiton jaton ganado rehtecatsihscái, Pablo hinancatsihquin, mapojaxonnoxon. ¹⁴Jascajahibo nincaxon Criston raantibo Bernabé betan Pablonen jaton chopá huaxabahinxon tsamatai jonibo tocan cayatanxon jato coshin yohiquin:

¹⁵—¿Jahueja man jacatsihquin, jonibon? Noque tah non mato quescapa

jonibo qui. Nescapa tiroma shinan potabahinxon jihuenuca Dios man bihnon hihxon tah non jahuen joi siri mato yohihi. Nai, mai, hian, jano jai jatihibi ta jaan hahnishqui. ¹⁶Neateman jihuepahonihbo ta jaabo jihueta queenai quescari jaan jihuemanishqui. ¹⁷Jaabi ta hahan honanti jato pishinmayamanishqui jato yanapanquin naihoxon hoi paquemaquin, bimibo hinanquin, piti mato hinanquin, hahan jenimati mato hinanquin —jato jaquin.

¹⁸Jascajaquin yohi yohihah pari ta jaabaan jaton ganado jato rehtexonquin bi rohajacanishqui.

¹⁹Jaatiani Antioquía janinhax judiobo jahui. Iconio janinhax rihbi nocoxon judiobaan janohahbo sinamaquin, Pablo retehahbo hihxon. Sinaxon Pablo macaman tsacacanquin. Jemama qui ninibonaxon mahua sca ta jaiqui hihxon janobi potabehnancanquin. ²⁰Criston jonibo jaa mayajaquetaiya hueniscaax jema janin caribíhi. Jano hihshinahax Bernabé betan caresscái. Derbe jema janin cahi caresscái.

²¹Nocoxon Papan joi siri jato yohicanquin. Yohihahbo hichaxon nincacoinquin. Janohax sca Listra janin caribíhi. Janohax sca Iconio janin. Janohax sca Antioquía janin. ²²Criston jonibo coshi hinanbonahi cahi, shinancoquin jeneyamaxahcabo hihxon jato hihti yohiquin.

—Papan jihuematí janin noconoxon tah non hicha teneti jai —hahquin. ²³Piti tenehahnam mequeman mehexon Papa yocaxon nincacoinaibo jano jaiton tihibi siri jonibo caixon Mia pastorohue, Mia rihbi pastorohue hahcanquin. Jascajaxon jaabaan nincacoinipi quen noquen Hihbaan jato coirannon hihxon Papa yocaribicanquin.

Antioquía janin nocorihbicani

²⁴Pisidia mai sca nabebacahinx Panfilia mai janin nococani. ²⁵Perge janin

sca caxon joi siri yohiscaax Atalia janin cahpaquehcani. ²⁶Janohax sca Antioquía janin cahi nontin boribicani. Hoa chai yohitanahbo hihxon janoxon Papa jato yocaxonnibo janin nocorihbiscacani, janohax jaabo catanni janin. ²⁷Nocoxon noquen huetsabo tsinquimaxon jato betan Papan hahrasihu jatihibi yohicanquin. Judiomabo jan jascajaquin nincamamenohi jato yohiquin. ²⁸Basi sca jano Criston jonibo betan jihuecani.

Jerusalen janin tsinquitiaibo

15 ¹Jaatian Jerusalen janinhahbo sca joxon noquen huetsabo yohiquin:

—Moisesnin yohini quescabijaquin honantijayahamahah tah man hahquirihbi teehihtimahi —hahcanquin.
²Jaamajahibo copi ta Bernabé betan Pablonen jato pontequin sca yohinishqui. Yohihah bi hahbetan sca yohinanresi. Join bahchinani. Criston raantibo yocacahti ta jaiqui, hihxon sca Jerusalen janin bohábo sea raancanquin Pablo, Bernabé, caibo rihbi. Jerusalen janin caxon Criston raantibo yocakahbo cahen raancanquin. Noquen huetsabo shinanyahpabo yocacahti canon raancanquin.

³Noquen huetsabaan sirijaquin camahah cahen bocani. Judiomabaan shinan pontexon Papan joi bichi jato yohihahnhan Fenicia mai nabebacahinax Samaria mai rihbi nabebacanahi bocani. Yohiha janoha noquen huetsabo hihti jenimacani.

⁴Jerusalen janin nocotaiton sca Criston raantibaan jato Benahue hahquin. Janoha pastorobaan jatihixonbi jato Benahue hahcanquin. Benahue hahcabo jato betan Papan hahrasihu jato yohirihbicandin.

⁵Fariseoboxon bi nincacoinaibo sca nihrenenxon yohiquin:

—Jato honantijaxon Moisesnin yohini quescabijaquo tah non jato yohiti jai —hahcanquin.

⁶Jaa joi sca shinanquin sirijanoxon cahen Criston raantibo betan pastorobo rihbi jano huesti tsinquit. ⁷Basi yohinannan sca jaiboya nihrenenxon Pedronen jato yohiquin:

—Heen huetsabaan, neateman ta Papan hea mato tocan mehax canon hea yohinishqui jahuen joi siri hean yohihah noquen nahuabaan nincacoinnon. Man tah man honanscrai. ⁸Jonin jointi honanxon ta Papan jaabo siri hihqui noque jismanishqui, noque jahuen Yoshin siri jan hinanai quescajaribiquin jaabo rihbi hinanquin. ⁹Noque ta jascapa rabe jisnishqui. Jaabaan nincacoinai copi jaabo rihbi jaton jointi sohuaxonquin. ¹⁰Non papiti hahtipahyamani bi noquen xenibaan rihbi papiti hahtipahyamani hihue papimaquin hahcajaquin tah man Criston jonibo judionahue hahcai. ¿Jahua copi man jascajaquin noquen Papa Dios tanahin? ¹¹Noquen Hihbaan noquehon shinanxon noque teehihtimahi quescajaribiquin ta jaabo rihbi teehihtimahiqui. Jaa tah non shinancoinai —jato jaquin.

¹²Jaatian pari netexon Bernabé betan Pablo yohuanai nincacanquin. Nincacaiton judiobaan nahuabo janin caxon hahan honantibo hahan rahtetibo jato betan Papan hahquipi jato yohipaquequin Pablonen, Bernaben rihbi.

¹³Yohiquin queyoscayia Jacobo sca yohuani:

—Hea nincanahue, hea huetsabaan.

¹⁴Jahuenahbi jaabo hihnon hihxon jahuen joi siri noquen nahuabo Papan nincamamenoni ta Simoman noque yohiscaaxqui. ¹⁵Papan yohinicabaan rihbi ta huishaxon jascajaquin yohinishqui. Nincanahue:

¹⁶Jaa pecaho joribixon tah hen Davidinin xobo poxoni huenirihbixon hahcajaquin jahuen jihuetahbo hinanrihbithi.

Payonihbo hahribixon hahcajaquin
tah hen jahuen jihuetahbó
hinanrihbiyaxihqui.

¹⁷ Texe jonibaan jaton Hihbo
benahahbo hihxon tah hen
jascajayaixihqui. Maton nahuahax
bi hehqui hinamehtaibo
jatihibichin hea benahahbo hihxon
tah hen jascajayaixihqui.

¹⁸ Nea joi neateman yohinihxon ta
noquen Hihbaan jascajahi qui.

¹⁹ Hean shinanah tah non jaton shinan
pontexon noquen Papan joi
nincacoinaibo noquen nahuabo non
jatsanjamahi. ²⁰ Jato qui raannoxon
quirica huishati ta jaiqui, santoya
rishtayamahahbo joni huetsa betan
tsiniyamahahbo, hahsataibo piyamahabo,
jimi rihbi piyamahabo. ²¹ Jatihibi jema
janinxon ta neateman Moisesnin joi
nincamanixon rahma caman
nincamacaniqui. Nincamaxon ta jaa
jahua hiheatsihquiquin hihxon
yocaribicaniqui, tantiti nete tihibi jaton
tsinquitit xobobohoxon. Jaa copi tah non
jato qui joi raantihi —jato jaquin.

²² Jeenihhxon sca jonibo raanah ta siri
qui hihxon Criston raantibo, janohahbo
pastorobo, jatihibi noquen huetsabo,
jatihxonbi sca Bernabé betan Pablo
manahi cahabo mananicabo caiscanquin,
Antioquía janin jato raannoxon. Judas
Barsabas hahcaibo, Silas rihbi,
caiscanquin. Jaabo hihti shinanya
noquen huetsabo copi jato caiscanquin.
²³ Jato betan raanti quirica sca
huishamacanquin:

Maton huetsabo, Criston raantibo,
pastorobo, noque rahaibixon tah non
mato qui joi raanai, man jascabi
jayamahin, hahquin. Antioquía, Siria,
Cilicia maibaan jihuetai noquen
caibohaxma bi noquen huetsabo qui tah
non raanai. ²⁴ Noquen raanahma bi noque
uihax caxon yohixon mato masa

shinanmahibo joi tah non nincacai.

²⁵ Nincaxon tah non jatihixonbi sca
shinanquin sirijaxon noque quiha jonibo
caisai, Bernabé betan Pablo manahi mato
janin canon. Bernabé betan Pablo ta
hahan non shinanai noquen huetsabo qui.
²⁶ Caibaan jato rehtecatsihquiaan bi ta
noquen Hihbo Jesucriston joi siri yohihi
caresscahoxqui. ²⁷ Jaa copi tah non Judas
betan Silas raanai, jaabaan sca non mato
yohihi joi mato yohiquin sirijanon.

²⁸ Judiobaan mato jisi copi man jascajati
jai joi res tah non mato yohihi, jahuabi
hashoan mato hihuejayamanoxon. Non
jascahah ta siri qui hihxon tah non
yohihi, Dios Yoshiman rihbi noque
jascajaquin shinanmaha. ²⁹ Jaa copi tah
non mato yohihi, santo rehtexona nami
piyamanahue, jimi rihbi piyamanahue,
terehahxon rehtehibo rihbi piyamaquin.
Joni huetsa betan tsiniyamanahue. Non
mato yohihi quescarax tah man siritihi.
Jaa res tah non yohihi, hahcanquin
huishaquin.

³⁰ Raanahbo Antioquía janin bocani.
Jano noquen huetsabo tsinquixon jaa
quirica jato hinancanquin. ³¹ Jaa quirica
bihxon jisxon shinanquin
sirijascacanquin. ³² Papan jismaha
yohinicabxon Judas betan Silasen jato
hicha yohixon noquen huetsabo coshi
hinanquin. ³³ Jano jihuetahbax
cacatsihscaboya jato raanipibo qui
caribinon sirijaquin jato camacanquin.
³⁴ Hihcax bi Silas cayamahi. Baneti jan
shinanaiya Judas huesti cahi. ³⁵ Antioquía
janin Pablo betan Bernabé baneti.
Banexon jato honanmaquin. Hicha
noquen huetsabo betan jaa joi siri
yohicanquin.

Papan joi yohihi Pablo caribibi

³⁶ Jahuentihi ra nete janoo hihxon:
—Jano non noquen Hihbaan joi non
jato yohiniton caribinon cahue jato jisi.

Jenquetsahpi jacaniquin jisnon cahue jatihibi jema janin —Bernabé Pablonen jaquin.

³⁷Juan Marcos hahcaibo Bernabenin hiocatsihqui bi Pablo queenyamahi.
³⁸Panfilia janin jato potabahini jato betan Papan joi yohihi cayamani copi cahen jaa hioti Pablonen shinanyamaquin. ³⁹Huesti shinanyamascaaç cahchinanbehcoini. Chipre janin Marcos betan canoxon cahen Bernabé nontin naneti. ⁴⁰Pablo cahen Silas betan cahi, noquen huetsabaan noquen Papa yocaxonah.
⁴¹Siria nabebacahinax Cilicia mai rihbi nabebacahini cahi noquen huetsabo shinan hinanbonaquin.

Timoteo sea jato manahi cahi

16 ¹Derbe janin nocotax janohax cahax Listra janin nocorihbihi. Jano Timoteo janeya Criston joni jai. Jahuen mama judiohax bi nincacoinnica. Jahuen papa cahen judiobaan nahua. ²Jaa Timoteo qui ta Listra janinha noquen huetsabo siripi yohuannishqui. Iconio janinhahbo jascarihbibi yohuani. ³Jaa hiocatsihxon bihxon janobo judiobio jai copi Pablonen jaa honantijaquin. Nahua papayahpa jaa honanaiboya jaa honantijaquin. ⁴Jemabo sca nabebacanahi caquin jato yohibonaquin. Jerusalen janinxon Criston raantibio betan jaton pastorobaan yohihipi joibo jato yohibonaquin. Jaa joi nincaxon jascari jihuetahbio hihxon jato yohiquin. ⁵Jaa copi ta noquen huetsabaan hashoan sca nincacoinnishqui. Nete tihibi caícanahi.

Macedonio joni Pablonen namacai

⁶Frigia mai sca nabebacahinax Galacia mai rihbi nabebacahini bocani. Asia mai janin cacatsihquibo bi Dios Yoshiman jato jano yohimayamaquin. ⁷Misia main nocotax, Bitinia main sca cacatsihquibo bi Papan Yoshiman jato panterihbiquin.

⁸Misia mai huinojaquetax Troas jema janin sca cahpaquehcani. ⁹Huesti yame cahen namaquen Macedonia janinha joni Pablonen jisquin. Jaa bebon nihrenenxon jaa macedonio jonin hihti yocaquin:
—Macedonia janin noque yanapani johue —hahquin. ¹⁰Namayama sca jan jaiya Jenquetsahax non Macedonia janin caman pohquetihin hihxon hahan pohqueti benaquin noquen. Non jano jahuen joi siri yohihi canon Papan noque quenahi tah non honanquin sirianiqui.

Filipos janin nococani

¹¹Nontin nanexon Troas potabahinqui noquen. Samotracia quiri ponte res cahi. Nihshinahax huetsa neten sca Neápolis jema janin taxnati. ¹²Mapetax Filipos jema janin cahi. Filipos ta romanobaan tsahonni jema qui, jano jai jemabo mentan hashoan hani. Jano tah non jahuentihi ra nete hihniqui. ¹³Tantiti neten sca tah non jema jemanhihtinin caniqui, huean quexabi. Janoxon ta judiobaan noquen Papa Dios yocaquihqui hihquish tsahopaqetax non jano behchinanai haibobo betan noque yohuani. ¹⁴Huesti haibo ta Lidia janeya jano janishqui. Papahon shinanai haibo. Yancon chopá maromanicah. Tiatira jema janinhah haibo. Jaan cahen nincquin sirijaquin. Pablonen yohihi joi nincati shinan noquen Hihbaan hinanah nincquin. ¹⁵Jatihibi jahuen xoboho jihuetaibo betan nashimaha sca noque hihti yohiquin:

—Noquen Hihbaan joi hen nincacoinai shinanax heen xoboho botannahue. Jano sca banenahue —hahxon jano sca noque hioquin.

¹⁶Janoxon jaabaan Papa yohihi janin sca non cahi bi huesti hiná haibaan noque behchiquin. Tiroma yoshinyaþpa haibo hihxon ta jayaxon jonibo yohipahonishqui. Honancatsihquin

yocacah jaan yohiquin. Jascajaxon ta jahuen hihbobo hicha coriqui cananxonpahonishqui. ¹⁷Jaa haibaan cahen Pablo chibanaquin. Noque rihbi chibanaquin. Noque chibanhahnan coshin yohuani:

—Nea jonibo ta Xaba Hihbo Diosen jonibo qui. Hahan teehti joi ta mato yohicaniqui —hihqui.

¹⁸Hicha neten jascarihbibi. Jatsanscaax mayacahuanxon Pablone jaa yoshin yohiquin:

—Jesucriston janen tah hen mia yohihi, jaa haibo janinhax picohue —hahquin. Jan yohihah cainscái.

¹⁹Hahan coriqui cananti yamascai jixson jahuen hihbobaan Pablo bihquin. Silas rihbi bihcanquin. Bihxon tinintinin jemanhihi janin hioxon jaton hapobo quenacanquin. ²⁰Jaton hapobo jahuiya:

—Neabo ta judiobo qui. Noquen jema ta tiromajacaniqui. ²¹Noque jascatima joi ta noque yohihiqui, jascapa noquen nincatimahi bi. Noque jascatimahi joi tah qui. Noque tah non romanobo qui —hihcáni.

²²Jano tsamajaquetaibo rihbi jascari jato qui yohuani. Jascaraiboya jaton chopá potamaxon, jihuín jato cahrishqui cahrishquinon jaton hapobaan yohiquin. ²³Tsehue tsehuejaxon sipo xoboho jato tsahonxon sipo xobo coirannica

yohicanquin sirijaquin jan coirannon.

²⁴Jascajaquin yohihahbo chicho queha chiqueho jato niaxon hahan tabitaxtinin jato tabitaxpaquequin.

²⁵Yame pochinicon sca Pablo betan Silasen noquen Papa yocaquin. Papa qui siripi behuahi. Hahbe sipojahipibaan cahen jato nincaquin. ²⁶Jaatian mai coshin miuhanreneni. Xobo jihuibo taxca taxcahiqui. Jatihibi xehpoti quehpemehtscái. Hahan jato menexipi cadenabo mepequehcahini. ²⁷Sipo xobo coirannicah sca mohixon jaa xobo

xehpoti jatihibi quehpemehtai jisish machitonen nacocatsihscái. Hahmabi rehtecatsihqui sipojahipibo jabascái shinanax. ²⁸Nacocatsihqui bi Pablone coshin quenaquin:

—Jascari tiromayamahue. Neno tah non qui jatihibi —hahquin.

²⁹Jascabajah:

—Johué quetejanahue —hihquish sipo xobo hihcocahinax tastahihcanahi cahi Pablo betan Silas janin taracahreneni.

³⁰Hueniscaxon jemanhihi janin jato picoxon yocaquin:

—¿Queyoyamanox mananoxon hean hen jahuejati Jain, jonibon?

³¹Noquen Hihbo nincacoinax tah min queyoyamanox manatihi. Miin xoboho jihuetaibo jascarihbibi —hahcanquin.

³²Jascajaxon jahuen xoboho jihuetaibo rihbi Papan joi yohiquin sirijacanquin.

³³Jaatianbi yamebi jato hioxon jaton tsehue chocaxon:

—Nincacoin tah hen jai. Hea nashimanahue. Heen xoboho jihuetaibo rihbi nashimanahue —jato jaquin.

³⁴Jahuen xoboho jato mapemaxon sca jato pimaquin. Papa nincacoinax jaa, jahuen haibo, jahuen baquebo, jatihibi hihti jenimahi.

³⁵Xaba paquescaya sca jaa jema hapobaan porisia raanquin, yohihi cabaho.

—Hoa jonibo picotanhue botanahbo —hahcanquin. ³⁶Sipo xobo coirannicahton sca jascajaquin Pablo yohiquin:

—Hapobaan ta joi raaniqui hen mato piconon. Picoscanahue tahca. Siripi catannahue.

³⁷Jascabajah bi Pablone jato yohiquin:

—Noque romano jonibo que bi ta jatihibi jisnon hihxon noque rishqui rishquimahipicanaxqui non jahuejahipi honanxonma bi. Jisibo hihxon ta noque sipojahipicanaxqui. ¿Jonexon tsoan

honannonma sca noque
picocatsihcanihquin? Jascajatima ta
jaticaniqui. Jaabobi joxon noque piconon
—hahquin.

³⁸Hapobo yohihi sca bocani porisiabo.
Romano jonibo ta qui hihqui nincacax
raquescacani. ³⁹Jaabo sea joxon jato
raejacatsihquin jato sirijaquin
yohuanquinquin:

—Honanyamaxon tah non mato
jascajahipiqui —hahxon jato picoxon sca
Noquen jema potabahinrohanahue
—hahcanquin. ⁴⁰Jascari sipo xobo
janinhax picotax Lidia jisi bocani.
Noquen huetsabo jisxon sca jato
yohiquin. Nincacoinquin
jeneyamaxahnahue jato jaax caresscrai.

Tesalonicabo corotaibo

17 ¹Anfípolis jema nabebacahinax
Apolonia jema sca nabebacahinax
Tosalónica jema janin nococani. Jano
cahen judiobaan tsinquitxi xobo jai.
²Jahuen hihti quescarax jan Pablo
mapeti. Quimisha tantiti neten jato betan
yohinani, tsoa noquen teehihmanicah
quin hihqui yohinani. ³Papan huishamani
joiboyaxon cahen Pablone jato
honanmaquin. Papan caisai jahuen baque
hohmis hohmisax hihquipish bi
teehihribiti jaa janí jato jismaquin
sirijaquin, Jaa Papan caisai jahuen baque
ta Jesus qui, jaa hen mato yohihi,
hahquin.

⁴Nincacoinmaha Pabloya Silas
manahi sca caibo cahi. Judiobaxma bi
judiocatsihquiaan rihbi hichaxon
nincacoinquin. Patoro haibobaan rihbi
nincacoinquin hicha tahnixon. ⁵Jaa
copi ta notsi notsixon shinanjoma
tiromabo tsinquixon jema janinhah
judiobaan jato coro coromanishqui.
Jasoman xoboho sca jaa corotaibo
mapeti, Criston raantibo benahi.
Corotaibo bebonbi jato

nichincatsihquin jato benacanquin.
⁶Criston raantibo benacasquimaxon
Jason sca bihxon caibo noquen
huetsabo rihbi bihxon jema hapobo
janin jato ninitancanquin.

—Jatihibi janin tiromajaquin jonibo
coromabenani ta neno sca neabo
nocotipishqui. Jasoman rihbi ta jahuen
xoboho jato hoxamahiqui. ⁷Jatihixonbi ta
noquen quiquin hapo Cesaro
nincacatsihyamascacanihqui, huetsa
quiquin hapo Jesus jaresscái shinanaxon
copi —hihcanci.

⁸Jascajaxon jonibo coromacanquin.
Nincaxon jema hapobaan masa
shinanscaquin. ⁹Jaabi Jason cobranxon
caibo rihbi cobranxon:

—Boresscatannahue —jato jacanquin.

Berea janin nococani

¹⁰Jaa yamebi ta Pablo, Silas rihbi
noquen huetsabaan hionishqui Berea
jema janin cahábo. Berea janin nocotax
sca judiobaan tsinquitxi xoboho
mapecani. ¹¹Jaabo ta Tesalónicabo
mentan hashoan shinanya janishqui.
Hihti honancatsihxon Papan joi
nincacanquin. Jasca coin hin hihxon
jatihibi neten Papan huishamani joi
jisquin honancatsihquin. ¹²Hichaxon ta
nincacoinnishqui. Jaton nahua patoro
haibobo rihbi hicha. Bebobó rihbi
huestima. ¹³Papan joi Berea janinxon
rihbi Pablone yohihi honanscaax
Tosalónica janinha judiobo jan Pablo
bocani. Nocoxon jonibo sinamaxon jato
coro coromacanquin. ¹⁴Jaa copi histon
sca noquen huetsabaan Pablo
camacanquin. Quebijistima hian quiri
hiocanquin. Jema janin sca Silas betan
Timoteo baneti. ¹⁵Pablo hiohibaan ta
Atenas jema caman jaa nocomanishqui.
Janohax jaabo caribinon ta Pablone
jato joiya raannishqui, Silas betan
Timoteo hahqui histon jonon.

Atenas janin Pablo nocotai

¹⁶Atenas janin jato manahahnan jatihibi janin santobo jai jisxon Pablonen masa shinanquin. ¹⁷Judiobaan tsinquitu xoboho jato betan yohinanax Papahon shinanai judiomabo betan rihbi yohinani. Jatihibi neten rihbi jaton janoxon maroti jemanhihti janin jano jaibo betan yohinani Papan joi nincamacatsihqui. ¹⁸Jaton honan joi honanaibo rihbi ta jano nihninishqui, caibo epicúreobo, caibo estoicobo. Jaabaan ta Pablo yohuanquihnmishqui. Yohuanquihnxax:

—¿Jahua yohuan nea paramis jaiquin? —hihqui caibo.

—Nahuan dios joi yohinica ra tah qui —hihqui caibo rihbi. Jesus hihquipish bi hahquirihbi teehihqui joi jan yohihiya jascacani. ¹⁹Jaatian sca jaa bihxon Areópago janeya mahchi janin hiohax yocacahcani:

—Nea min honanmahi joi behna min noque yohirohatimahin? ²⁰Min noque yohihi nincacax tah non raftetai. Jahua min yohirohatimahin hih tah non jai honancatsihqui.

²¹Jatihibi Atenas janinhahbo betan huetsancohax johox jano jihuetaibo ta jahubi teeyamapahonishqui. Joi behna yohixon ninacqui jihueriesi.

²²Areópago mahchi naponbi nihrenenax sca Pablo yohuaní:

—Atenas janinhahbon, hicha diosbo man shinanai tah hen jisi. ²³Jema janin huinoxon tah hen maton diosbo huishaxon man tsahonxonni macanbo jisbonaxon hen nea huishayahpa huesti merahipiqui. Non honanyamahi diosenah hihqui jaa quirica. Jaa honanyamaxon bi hahan man shinanai Dios tah hen mato yohiscai.

²⁴Nea naiyahpa mai, jano jaibo jatihibi rihbi hahní Dios ta nai hihbo qui, mai hihbo. Jaa ta jonin mequeman xobojahi

janin jihueyamahihqui. ²⁵Jaa ta jonibaan hahxonti pishinyamabiresiqui. Noquen mequeman tah non jaa jahuabi hahxontimahi. Jaan caya ta jatihibi jihuemaxon noquen piti, jatihibi noque hinaniqui. ²⁶Huesti jonijamenonixon ta jahan sca jatihibi jonibo cainmanishqui jatihibi main jato jihuemanoxon. Janobi jihueyaxahnahue. Jaatian pari jihueyaxahnahue hih ta jaa janishqui. ²⁷Noquen Papa Dios benahahbo ta jascanishqui. Mehebonaquin meraxon hahcajaquin merahahbo ta jascanishqui, noque hochoma jan hihqui bi. ²⁸Jaan ta noque yora jihuemahiqui. Hahan jatihibijati coshi hinanxon ta hahan jihuetai shinan rihbi noque hinaniqui. Caibo maton quirica huishanicabaañ rihbi ta jascajaquin huishanishqui: Noque tah non jahuen chini baquebo qui, hihqui. ²⁹Papan chini baquebo hihxon tah non noquen Papa Dios oro quescapa hihqui shinantimahi. Yami pehnene quescaphama, macan quescaphama, jonibaan mequeman sirijaquin hahcái quescaphama, jonin shinanai quescaphama ta jaa qui. ³⁰Honamabó jai bi ta Papan jato tenepahonishqui. Jato tenenixon bi ta rahma jatihibi jonibo sca jatihibi janin jaan yohiscaiqui shinan pontehahbo hihxon. ³¹Jahuen hahan casticanti nete janoxahnon ta yohiscanishqui. Jahuen hahan casticannicah ta jaribiscaiqui, Mia tah min jonibo pontejaquin casticannicah qui hah cahen jaa janish. Jahuen casticannicah tsoa quin non honannon ta hihquipi que bi jaa hahquirihbi teehihmanishqui —jato jaquin Pablonen.

³²Hihquipi bi hahquirihbi teehihmahí yohihi nincacax bitsa bitsacani.

—Huetsa tian min noque yohirihbinon tah non nincayaxihqui —hihqui caibo rihbi.

³³Jascachiya jato janinhax Pablo picoscai. ³⁴Caibaan rihbi nincacoinax

Pablo manahi bocani. Huesti cahen Dionisio Areopagito, huetsa cahen haibo, Dámaris janeya. Caibobo rihbi jato betan cahi.

Corinto janin Pablo nocotai

18 ¹Jaa pecaho ta Atenas janinhax picotax Corinto jema janin Pablo canishqui. ²Jano ta huesti judio meranishqui, Aquila janeya. Jaa ta Ponto mai janinha joni hihpahonishqui, jahuen haibo betan Italia janinhax jahuex nocotipi. Claudio quiquin hapo hihxon Roma jema janinhax jatihibi judiobo picoti jaan yohihiya janohax Aquila jahuipi. Jato jisi sca Pablo cahi. ³Jaa Aquila cahen chopas xobojanicah. Pablo rihbi ta jascajanica janishqui. Hahbe chopas xobojanicah honanax jaton xoboho jihuetax hahbetanbi Pablo teescay. ⁴Tantiti netebo nocoscaya judiobaan tsinquitix xoboho caxon jato betan yohinanxon judiobo, jaton nahuabo rihbi Papan joi nincamaquin.

⁵Macedonia janinhax Silas betan Timoteo nocoscaya Papan joi yohihi sca jihuetai. Jesus ta Papan caisaí joni qui hihxon judiobo honanmaquin. ⁶Honanmaha bi nincacatsihyamacani. Pablo qui tiromahi yohuanacani. Jascaraiton jahuen chopas peren perenhahxon jato yohiquin:

—Nincacatsihyamahak tah man hohchaya mahuatihi. Min tah min noque honanmayamaniqui hah tah man hea jatimascaí. Nahuabo sca tah hen yohitihi —jato jaquin.

⁷Jato jascabajahini cahax jaa tsinquitix xobo patax jihuetai jonin xoboho mapescay. Jaa joni ta Justo janeya janishqui judiocatsihqui joni. ⁸Jaton tsinquitix xobo coirannicahon ta noquen Hihbo nincacoinnishqui, Jahuen Jane cahen Crispus. Jahuen xoboho jihuetaibaan rihbi nincacoinquin

jatihixonbi. Hihti caibo rihbi corinto jonibaan Papan joi nincaxon nincacoincanquin. Nincacoinaiton jato nashimacanquin. ⁹Yame namaquen sca noquen Hihbo yohuanai Pablonen nincaquin:

—Raquexonma yohireshue. Neteyamahue. ¹⁰Mia tah hen manahi cahi, tsoanbi mia tiromajaquin jahuejayamanon. Nea jema janin tah hen hicha joni jai —hihqui.

¹¹Huesti bari seis hoxne rihbi ta jano jihuetax jato tocan jihuexon Papan joi honanmaquin.

¹²Acaya main Galion sca gobernador hihquiya judiobo rahsi tsinquiscaí. Tsinquixon jatihixonbi Pablo bihti shinancaquin. Bihxon jaton hapo janin hiocanquin.

¹³—Noquen xenibaan yohini quescajaya maquin bi ta huetsajaquin Diosohon shinanahbo hihxon neatohon jonibo yohihihqui —hahcanquin.

¹⁴Pablo sca yohuancatsihscay bi judiobo Galionen yohiquin:

—Huetsa joni jan tiromajahiya tah hen jaa copi matu nincaquehanai, judiobon. Jan tiromahiya tah hen nincaquehanai.

¹⁵Man yohuanresai joi tah hen nincacatsihyamahi. Janebo, maton xenibaan joibo, jascapa joibo copi man yohinanai tah hen nincacatsihyamahi. Botannahue. Bexonahue, matobi. Jascapa joi copi tah hen tsoabi pontecatsihyamahi.

¹⁶Jascajaxon jahuen ponteti xobo janinxon jato cainmaquin. ¹⁷Cainmaha jaton tsinquitix xobo coirannica bihcanquin, Sóstenes janeya. Bihxon hapon ponteti xobo xehqui ponte nihxon rishqui rishquicanquin. Jascajahibaan bi Galion jahua hihyamahi, jisresquin.

Antioquia janin nocotax caribih

¹⁸Basi tahni jano jihuetahbax, Hen ta hen caresscay noquen huetsabon, hah jato

jaax Pablo caresscái. Hen yohihipi quescabija tah hen jai hihxon honanahbo hihxon Cencrea jema janinxon sca jahuen boo maxcorohamabahinquin. Siria main caman nontin pohquejaquenoxon janohax nanecani. Priscila betan Aquila rihbi cahi hahbetan.¹⁹Efeso jeman pari taxnatax jato potabahini cahi, judiobaan tsinquití xoboho mapeti. Janoxon judiobo yohuanquihnnuin.²⁰Basi pari banetahue hahcabo bi Pablo queenyamahi.

²¹—Hen tah hen caresscái. Noquen Papa queenaiya tah hen joribitihu —jato jaquin.

Nanerihbixon Efeso jema potabahinquin.²²Cesarea jema janin sca mapetax Jerusalen janinha noquen huetsabo pasijatani joresscaax Antioquía jema janin cahpaequehcáhini cahi.²³Jano ta jihuenishqui basima tahni. Janohax sca cahax Galacia mai nabebacahini cahax Frigia mai rihbi nabebacahini cahi. Noquen huetsabo shinan coshijabonahi cahi.

Efeso jema janin Apolos yohuanai

²⁴Huesti Apolos janeya judio ta Efeso janin noconishqui Alejandría janinha joni. Joi yohinica. Papan huishani joi honanquin sirijahi.²⁵Criston joi honanmahabo hihti yohicatsihxon jaan jato yohiquin. Jesus joi jato yohiquin sirijaquin jaamama. Hihcax bi jatihibi honanyamaquin. Juaman nashimati joi honanxon Criston janen nashimati joi honanyamaquin.²⁶Raquetaxmá ta jaton tsinquití xoboho yohuanishqui. Jan yohuanai nincaxon jaton xoboho boxon Priscila betan Aquilanen hashoan sirijaquin Papan joi honanmaquin.²⁷Acaya main jaa cacatsihquiton, Catanhue, hahxon noquen huetsabaan quirica huishaquin, jaya cahiton Criston jonibaan sirijaquin bihnon hihxon. Cahi

nocoxon nincacoinaibo hicha shinan hinanquin.²⁸Papan huishani joi jismaxon ta Cristo ta Papan caisai joni qui hihxon judiobo yohinishqui. Jatihixonbi nincacahbo hihquish ta janibi nichish yohuannishqui. Sirijaquin jato yohihiya ta nincacoinaibaan shinanbihnishqui.

Efeso jema qui Pablo nocotaí

19 ¹Corinto janin Apolos jaiya manan cahpoquetax Efeso janin sca Pablo cahpaqueti. Jano Papan joníbo huestibo meraquín.

²—¿Nincacoinxon man Dios Yoshin bihyamahin? —jato jaquin.

—Dios Yoshin joi tah non honanyamaparihi —hihcáni.

³—¿Tsoan janen mato nashimacannishquin? —jato jaquin.

—Juaman nashimapahoni quescajaquin rahan —hihcáni.

⁴—Jaa hahchon jahui joni nincacoinahbo hihxon yohixon ta Juaman nashimapahonishqui shinan pontehiton. Jaa hahchon joní joni ta Jesus qui —jato jaquin.

⁵Jaa honanscaxon cahen noquen Hihbo Jesusen janen sca jato nashimanon yohicanquin.⁶Pablonen jato mehehiya Dios Yoshin jato qui nocohihnatí jahui. Jaa bichich huetsapahi yohuancani. Papan honanmaha yohuancacani.⁷Doce joni rah ta jaabo janishqui.

⁸Judiobaan tsinquití xoboho mapetax sca tsoanbi chihtehahma Pablo yohuani. Quimisha hoxne jato betan yohinani, Papan jihuemayaxihqui joi yohinani. Yohuanquihnnannani.⁹Jaatian ta nincayosma jointi chahomayahpabo noquen Hihbaan joi qui tiromahi yohuancanishqui, janibi sca hichaxon nincacahbo. Jaa copi ta janohax Pablo picoscaxon Criston joníbo hioxon jatihibi neten Tiranno escuela xobohoxon jato yohinishqui.¹⁰Janoxon ta rabe bari

haxemanishqui. Jaan jato haxemahiya jatihibi Asia janin jihuetaibaan noquen Hihbaan siri joi nincaquin. Judiobo betan judiomabaan nincacanquin. ¹¹Pablo ta noquen Papan hahan hihti rahtetibo hahmanishqui. ¹²Payon bihxon, jaa hihyamahiya chopas pishca bihxon jayaxon Pablo mehexon ta jaton hisinaibo sca hahan rahoncannishqui. Rahona jaton hisinbo picoti, jaton tiroma yoshinbo rihbi picoti.

¹³Nihresai judio yobebos sca nocoti jahui. Nocoxon tiroma yoshinyahpabo meraxon noquen Hihbo Jesusen janen jaton yoshinbo yohicanquin picotahbo hihxon:

—Hoa Pablones yohihi Jesusen janen tah non mia yohihi —hahcanquin.

¹⁴Jaton papa ta Esceva janeya janishqui, judiobaan quiquin sacerdote. Jahuen baquebaan siete hihxon jascajaquin.

¹⁵Jascajaquin yohihiton tiroma yoshiman jato joi bichinquin:

—Jesus tah hen honanai. Pablo rihbi tah hen honanai. ¿Mato man tsoabo quin? —hahquin.

¹⁶Jato jascajaxon jaa yoshinyahpa jonin jato qui cayatan cayatanxon jato bahchinquin. Jato jatihibi taponbi potaquin. Jaan huexahah chopanma tsehue tsehueya sca jaa xobo janinhax jabascacanii. ¹⁷Efeso jema janin jihuetai judiobaan ta jaa joi nincanishqui jatihixonbi. Judiomabaan rihbi jatihixonbi nincaquin. Nincacax ta hihti raquescacannishqui. Noquen Hihbo Jesus hihti coshi honancanquin.

¹⁸Nincacoinaibo hicha joxon tiromajaquin hahpahoniboxon jaton hohcha yohipaquecanquin, jascapa jenebahinnoxon. ¹⁹Hicha yobe hihpahonibaan rihbi jaton yobepan quirica bexon jatihixonbi jisnon hihxon janibixon jaton quirica mapojacanquin. Jaabaan mapojaqui quirica topolah ta

cien mil soro copinishqui. ²⁰Jaatian ta noquen Hihbaan joi hashoan sca caícanishqui. Huetsa joi potaxon jaa sca bihcanquin.

²¹Jaa pecabo cahen Jerusalen jema janin cati sca Pablones shinannish. Macedonia mai nabebacahini cahax Acaya mai rihbi nabebacahini cahax Jerusalen jema janin nocoti shinanquin. Janohax tah hen Roma jema janin catihi hihqui. ²²Jaatian Macedonia janin bebotannon hihxon jahuen yanapannica rabe raanquin Timoteo betan Erasto. Jato raanax Asia main jihuetabihi.

Efesobo coro corotai

²³Jato raanipi pecaho ta noquen Hihbaan joi copi rainyamahax hihti caibo corocahinquirani nocohihncannishqui.

²⁴Demetrio janeya joni ta jano janishqui, yami charajahi teenica. Jaton santo Diana xobojaxonnica. Jascajaquin ta jahuen hahbe santo xobojanicahbo hicha jato cananmanishqui. ²⁵Jato quenamaxon jascapahbo hahnicahbo rihbi quenamaxon ta jato yohinishqui:

—Nescapahbojaquin tah non coriqui cananai. Man tah man honanquin sirijahi.

²⁶Hihti caibo yohixon ta Pablones jato honanmahiqui jaa sca chibanaahbo. Efeso janin res ma bi ta jatihibi janin jato jascajaquin yohihi. Casi jatihibi Asia mai mehabo ta jato nincamascaiqui. Jaa tah man jisxon nincaribbihi. Jonin mequeman hahcaibo ta diosmabo qui hih ta jaiqui. ²⁷Jan jascajaquin noquen tee tiromajamis hihxon tah hen mato yohirihbihi.

Jascajaquin yohihah ta noquen dios xobo caibaan jahuama shinanscatihiqui, noquen hihti siri haibo dios Diana xobo. Jaa rihbi ta jahuama shinantihcanihqui. Asia mai janin jihuetaibaan jatihixonbi hahan shinanai que bi ta jahuama sca jatihi —jato jaquin. Jatihibi mai janin jihuetaibaan hahan shinanai que bi jahuama sca.

²⁸Jan yohuanai nincacax hihti
rainyamahax sai saihihcani.

—Noque Efeso janin jihuetaibaan
Diana ta hihti shinanya qui —hihcani.

²⁹Jaa jema bahibo janin jatihibi coro
cororescani. Jahua nincatimascai. Pablon
companihro rabe sea bihxon ninibonahi
bocani. Janoxon yohuanai nincati mai
xanqueman sca bishquihiccanahi bocani.
Pablon companihro cahen Gayo, huetsa
cahen Aristarco, Macedonia janinha rabe.
³⁰Pablo rihbi jano hihquicatsihqui bi ta
caibaan Criston jonibaan
huinómayamanishqui. ³¹Caibo patorobo
rihbi Pablon amicobo hihxon joi
raanquin, jan jaton jaho tsinquitai mai
xanqueman cayamanon hihxon,
rehtecanmis hihxon. ³²Corotaibo Pablo
qui chanicatsihquish caibo huetsa
yohuanya janon caibo rihbi huetsa
yohuanya sai saihihcani. Coro coroquin
nincatimajacanquin. Jahuejahi non
tsinquitain hihxon hichaxon
honanyamaribicanquin. ³³Mia sca
yohuani cahue hihxon judiobaan
pehueranbonaha janohax yohuanti janin
Alejandro mapeti. Jonibo
nincamacatsihquin jahuen mequen
sanaquin. ³⁴Jahuen mequen
sanahinhihiya hihti sai saihiscacani.
Judio tah qui hihquish sai
saihihresscacani, jaa yohuanai
nincacatsihyamahax. Rabe horabo jano
coro corocani.

—Noque Efeso janin jihuetaibaan haibo
dios Diana ta hihti shinanya qui
—hihcani coshin.

³⁵Corotaibo tantimascaax jaton tininti
yohuani:

—Efeso janinhahbaan, noque Efeso
janin jihuetaibaan tah non noquen hihti
shinanya Diana xobo coiranxonai. Naihoh
quehax paqueni jahuen santo rihbi tah
non coiranxonai. Non jascajahi ta
jatihixonbi honancaniqui. ³⁶Jascama ta

qui, hih ta tsoabi jatimahiqui. Jaa copi
tah man tantitihi. Sirijaquin
shinanyamaxon jahuabi
jahuejayamanahue. ³⁷Jaabaan maton
diosen xobo jahua tiromajahi que ma bi
tah man nea rabe joni neno hihuehahqui.
Maton dios qui rihbi tiromahi yohuanai
que ma bi. ³⁸Demandanaibo nincati
netebo ta jaiqui. Noquen gobernadorbo
rihbi ta neno jaresscαιqui. Nea jonibo qui
chanicatsihxon jahuen hahbe teenica
betan Demetrieron jato
demandantanon. ³⁹Huetsa joi rihbi
nincamacatsihxon janoxon jascajati jai
janinxon hahtannahue. ⁴⁰Man rahma
coro corotai joi nincacax, noque rah ta
potacatsihcanihqui romano hapobo jamis.
Jaa copi tah hen mato yohihi. Jahua copi
man coro corocanahi tsinquitain hahcah
tah non jahua yohiti yamahi —jato
jaquin jaton tinintinin.

⁴¹Jato jascajaha jaton xoboho
boresscacani.

Macedonia nabebahax Grecia main cahi

20 ¹Coroyama sca jaiboya Criston
jonibo quenamaxon
nincacoinquin jeneyamaxahnnon hihxon
jato yohihax, Hen tah hen caresscαι,
hihquish Macedonia mai janin cahi Pablo
caresscαι. ²Macedonia maibo
nabebacahini caquin jano jai noquen
huetsabo hicha yohiquin. Jato
yohibonahi cahi Grecia main nocoti.

³Jano sca quimisha hoxne hihqui. Siria
main caman pohquenoxon nontin
nanepanan ta jano sca jaa cacatsihqui
honanscaxon judiobaan jaa bihti
shinannishqui. Bihcatsihquibo
nincaribbihax Macedonia main caribihax
janohax sca cati Pablonen shinanscaquin.

⁴Hahbetan ta caibo rihbi canishqui.
Huetsa cahen Sópater, Pirron baque,
Berea janinhah. Huetsa cahen
tesalónicabo rabe, Aristarco betan

Segundo. Huetsa cahen Gayo, Derbe jema janinhah. Huetsa cahen Timoteo. Huetsa cahen Asia mai meha rabe, Tíquico betan Trófimo.⁵ Jaabo rahsi bebotanax Troas jema janin noque manati bocani.
⁶Chahoma paan fiesta huinotipish Filipos jema janinhax noque cahi. Pichca nete nihxon Troas janin jato merahax jano sca siete neten rihbi noque baneti.

Troas qui Pablo nocotai

⁷Hahan semana pehocohtai neten sca pihi noque tsinquit. Bahquish sca cayanolon jato betan Pablo yohuan yohuani. Yame pochimicon caman jaa yohuani.⁸ Jano noque tsinquitai chiqueho cahen hicha ramparin xabati.⁹ Jano ta xehqui pishca janin huesti beronan tsahonishqui Eutico janeya. Pablo basi yohuan yohuanaiya ta hoxa teneyamascaax paquenishqui. Jaton quimisha tapoyahpa xobohoh quehax paqueti bochiquihax. Mahuascaai bihtancanquin.¹⁰ Hahqui botopiquescaxon Pablonen jaa racatai hicobahinquini.

—Masa shinanyamanahue. Jihue ta jaiqui —noque jaqui.

¹¹Jaatian sca maperihbixon posen tehcaxon pihax, xaba paquenon caman yohuanrihbihax, caresscái.¹² Jaa beronan mohitahpa mapemahiya ta sirijaquin sca shinancannishqui.

Troas jenebahini Miletio jema qui nocotai

¹³Ason jema caman Pablo main cacatsihquiya tah non nontin bebohi caniqui. Cahax Ason jema janin Pablo bichi taxnati.¹⁴ Jano noque merahi jorescaya tah non nanemahax Mitilene jema caman noconihqui.¹⁵ Jano hoxashinahax mohiyahtax tah non caribiniqui. Cahi Quío mai pishca qui nocoti. Janohax caxon hian napombi racatai mai pishca huinobahinquini,

Samos janeya mai pishca. Janohax jahuen quimisha neten sca Mileto jema janin nocotax taxnati.¹⁶ Janin Pentecostes fiesta noconon hihquish ta Jerusalen janin Pablo histon nococatsihnihqui hahtipahax. Jaa copi ta Asia mai janin basiyamanoxon Efeso jema huinoresti shinannishqui.

Efeso pastorobo Pablonen yohihi

¹⁷Miletio janixon sca Efeso janinha pastorobo jaan quenamaquin.

¹⁸Nocotaiton jato yohiquin:

—¿Asia main noconish jenquetsi hen mato tocan jihuenehqui? Man tah man honanquin sirijahi.¹⁹ Jahuabi hapo quescaxonma tah hen noquen Hihbo teexonniqui. Heen caibaan hea tiromajacatsihquin tana tanahah tah hen masa shinani jihuenehqui.²⁰ Mato sirijanolon tah hen jahuabi mato yohiquin pishinmayamaniqui.

Tsinquitaiton yohixon tah hen heen xobohoxon rihbi yohixon mato honanmaniqui.²¹ Papan joi nincaxon shinan pontexon noquen Hihbo Jesucristo sca nincacoinnon hihxon tah hen heen

caibo yohixon heen nahuabo rihbi yohicoinnihqui.²² Dios Yoshiman hiohah sca tah hen Jerusalen janin cahi. ¿Janoxon hea jahuejaticaniquin? Hen tah hen honanyamahi.²³ Jatihibi jema janin ta Dios Yoshiman hea yohihi.

Cadenanex nexion ta mia hihti tiromajayaxihcanihqui, hah ta hea jaiqui.²⁴ Jaabi hea rehtecanmis hih ta hea jayamahi. Noquen Hihbo Jesusen hea yohini quescabijaquin Papan jatohon shinanai joi siri yohiti res tah hen queenai. Papan hea yohihi cahue hahca tah hen cahi, jano hea raanaiton.

²⁵Mato tocan caquin tah hen Papan mato jihuemahi joi mato yohiniqui. Hea tah man jisyamascathi. Hen tah hen honanai.²⁶ Jaa copi tah hen mato rahma

yohihi. Maton hohchayabi mahuatax tah man Joi siri Pablonen yohiyamahah bi tah non mahuatai, hih man tsoabi jatimahi. ²⁷Papan noque yohihi jatihibi tah hen mato sirijaquin yohiniqui. ²⁸Coiramenahue. Criston jonibo rihbi coirannahue. Jaabo man coirannon hihxon ta Dios Yoshiman mato pastorobomanishqui. Carnero pimaquin hahcajaquin man Papan caisaibo shinan hinannon hihxon ta mato jaa tee hinannishqui. Jahuen jimi potaquin ta Criston jahuen caisaibo bilihishqui jahuen carnerobo. ²⁹Hea caresscaho pecaho ta mato tocan tiroma jinibo nocoyaxihiquipi carnerobo rehteresai hinobaan hahcajaquin. ³⁰Hea chibannahue Criston jonibon hihnicah rihbi ta mato quihabo caibo jayaxihiquipi. ³¹Jaa copi coirannahue. Quimisha bari tah hen matohon hihti shinanxon yame, bariyahpan rihbi hen mato yohipaquehi tantiyamanihqui. Jaa shinannahue.

³²Jato coiranhue Hihbon, hahbahini tah hen cahi. Jahuen joi bihquiun jeneyamanahue, hahan tah man jihuethi, matohon shinanxon hinanai jahuen joi. Jaan ta mato shinan hinanxon jatihibi jahuen baquebo tocan mato jahuen jihue hihbobo sca jaan mato hihmati hahtipahiqui. ³³Maton oro, maton coriqui, maton chopá tah hen jahuentianbi mato bichincatsihyamanihqui. ³⁴Heen mequeman teexon tah hen hen pishinaibo bilihiqui. Heen hahberabetaana rihbi tah hen bihxonnihqui. Man tah man honanai. ³⁵Hea hihqui quescaribhi man janon hihquish tah hen jihuhenihqui. Jascajaquin teexon noquen Hihbo Jesusen joi shinanxon yomanahquetaibo yanapanti tah hen mato haxemaniqui. Hinanti ta bihti mentan hashoan siri qui, hah cahen noquen Hihbaan janish —jato jaquin.

³⁶Jatihibixonbi sca raboxonen nihxon Papa yocacanquin. ³⁷Huaohihscacani jatihibi. Pablo mehuetanax hicotanax huaohihcandi. ³⁸Jan jato yohihah nincacax jaa jisyamascatihi nincacax bena benatax nontin caman jaa manahi bocani.

Jerusalen janin Pablo cahi

21 ¹Jaatian tah non nanetax jato potabahini caniqui. Cos mai janin caman tah non ponte caniqui. Jano hoxashinahax mohiyahtax cahax Rodas mai janin sca nocoti. Janohax Pátara jema janin taxnati cahi. ²Fenia mai janin pohquejaqueti cahi, nonti jano merahax hahan sca nanetax quebijistima hiaman caribibi. ³Caquin tah non noque memiho Chipre mai jisniqui. Jaa potabahinax Siria mai janin cahax Tiro jeman taxnatax mapeti. Jahuen jahuaborabo nonti hihbaan jano mapemahi cahiya tah non jano mapenihqui. ⁴Tiro janin tah non Criston baquebo meranihqui. Jato betan tah non siete neten banetahnihqui. Dios Yoshiman shinanmaha Pablo yohicanquin, Jerusalen janin cayamahue hahxon. ⁵Jahuentihi ra neten jano hihquish tah non caribiniqui. Jema jemanhihi janin ta jaabo jaton haibobo jaton baquebo noque manahi canishqui. Jemanhihtinin sca tah non raboxonen nihxon Papa yocaniqui. ⁶Papa yocacax nontin noque naneti, jaabo xobon boribihahbo.

⁷Tiro potabahinax Tolemaida jeman taxnatax noque mapeti, main sca canoxon. Jano noquen huetsabo jisi caxon huesti neten rihbi jato pasijaquin. ⁸Hoxashinahax mohiyahtax caribihax Cesarea jeman nocotax Felipen xoboho mapeti. Felipe ta Papan joi siri nincamanicah hihpahonishqui hoa siete caisnibo quihah. Jahuen xoboho tah non banejaquenihqui. ⁹Jaa ta chosco haibo

baqueyahpa janishqui bebo honanyamahibo rahsi. Papan shinanmaha ta jaabo yohuanpahonishqui.

¹⁰Jahuentihi ra neten non jano jaiya Judea mai janinhax Agabo janeya joni nocoti, Papan shinamaha yohuannica.

¹¹Nocoxon Pablón sintonor bichinax jahan sca tanexehtax menexehtax yohuanscái:

—Dios Yoshiman ta yohihiqui: Nescajaquin ta Jerusalén janinha judiobaan nea sintonor hihbo nexayaxihcanihqui. Nexaxon ta nahuabó sca jaa hinanyaxihcanihqui —hihqui.

¹²Jan yohanuani nincaxon tah non Jerusalén janin jaa cayamascanon hihxon Pablo noquen yohinihqui. Janohahbaan jascajaribiquin. ¹³Jascajahabaan bi Pablón yohiquin:

—¿Jahuejanoxon man huaohihxon hea masa shinanmacatsihquin? Hea noquen Hihbo Jesúsen joni copi hea nexayaxihquibo bi tah hen cati shinanai. Jerusalén janin hea rehteyaxihquiaan bi tah hen cati shinanai —hahquin.

¹⁴Banemati hahtipahyamahax noque netescai.

—Noquen Hihbo queenai quescari janon —hihquish.

¹⁵Jaa pecaho sca non pishinaibo bichish Jerusalén janin noque cahi.

¹⁶Cesarea janinha noquen huetsabo caibo noque betan caxon Mnasoman xoboho noque hiocanquin. Mnason ta Chipre janinha joni qui, Criston joni xení. Jaan ta noque jahuen xoboho hoxamanishqui.

Jacobo jisi Pablo cahi

¹⁷Jerusalén janin noco sca non jaiya jenimahanan noquen huetsabaan noque bilihui. ¹⁸Hoxashinahax mohiyahtax sca noque betan Pablo cahi, Jacobo jisi. Jano ta jatihibi jaton pastorobo tsinquinishqui.

¹⁹Man jascabi jayamahin hahxon jaton nahuabó tocan Papan hahan honanti jaa

hahmatanho jato yohipaquequin. ²⁰Jan chanihi nincaxon:

—Papan ta hahquiqui —hahxon yohicanquin:

—Noquen caibo nincacoinaiba ta jahuentihi ra mil jaresscainqui. Jatihixonbi ta Moisesnin joi chibancaniqui. Min tah min honanscái. ²¹Mian roqui min hochó jabisnihbo noquen caibo mian honanmahi Moisesnin joi jenebahinnon. Jaton baquebo honantijayamatí roqui mian jato yohihi. Moisesnin yohini quescajamascarihbili jihuenuon roqui mian jato yohihi. Jascaraibo ta nincacaniqui. ²²¿Jahueja sca min jatihin? Min nocotai ta honannoixihcanihqui. ²³Jaa copi non mia yohihi quescabijahue. Neno ta chocso beronan jaiqui, Hen yohihi quescabijaquin tah hen jatihí hihquipibo yohuani. ²⁴Jato hiohax jato betan nashitanxon jaton mapo maxcorohabahinnon copijaxonhue. Min jascajahi jisxon ta jaabaan nincacai jahuama hihqui honannoixihcanihqui. Man Moisesnin joi chibanparihin ta honannoixihcanihqui. ²⁵Santo rehtexona nami nincacoinai judiomabaan piyamanon hihxon jimi rihbi piyamanon hihxon terehahxon rehtehibo rihbi piyamanon hihxon joni huetsa betan tsiniyamanon hihxon tah non jato moa huishaxon yohinihqui. Jaa ta honanscacanihqui —hihqui Jacobo.

Papan xobohoxon Pablo bichibo

²⁶Jascaha jaa beronanbo hiohax huetsa neten sca jato betan nashihax Papan xobohoxon Pablo mapeti. Mapexon:

—Jatíhi neten hihquish tah non mequejaqueti queyoscatihi. ¿Jahua neten non jatihibichina noquen hinanti non betihin hinannoxon? —hihqui Pablo, hapo yocacahti.

²⁷Jahuen siete nete nocoti pishca pishinaiya Asia janinhax judiobo

nococani. Papan xoboho Pablo meraxon jonibo coro coromaxon Pablo bihcanquin. ²⁸Coshin sca quenacanquin:
—Noque yanapannahue, noque caibon. Nea ta jatihibi janin nihxon noque qui tiromahi yohuanai joni qui. Nea ta Moisesnin joi qui yohuanihqui. Nea xobo qui tiromahi yohuanrihbibi. Jascajahax ta Pishin pari ta jaiqui hihquish, Papan xoboho nahuabo rihbi mapemaxon nea mequexonti xobo rishtajahiqui —hahcanquin.

²⁹Efeso janiha joni betan Pablo jaton jema janin nichijisipixon Papan xoboho Pablonen jaa mapemahini shinancanquin. Trófimo cahen jaa joni.

³⁰Jascajahiboya jema jatihibi cobinai quesapi jonibo rainyamahax bishqui bishquihicanahax Papan xoboho nocohhnati. Pablo bihxon jemanhihti janin ninixon xehpotibo xehpobahincanquin. ³¹Jaa retehhibaani bi ta sontaro hapo qui cahax caibo chaninishqui, Jerusalen janin ta jatihibi coro corocaniqui, hihqui. ³²Sontarobo quenamaxon jaton capitano rihbi histon quenamaxon jato betan jema janin hishtocahinquihranı sontaro tiniti jahui. Jaton hapo betan sontarobo jahui honanxon Pablo rishquiquin jenebahinscacanquin. ³³Nocoxon Pablo bihxon cahen rabe cadenanen nexahahbo hihxon sontaro hapon jato yohiquin. Jascajaxon sca:

—¿Tsoa min quin? ¿Jahuejahi meraxon mia jascajacaniqui? —hahquin. ³⁴Corotaibo cahen mesco yohuanyahpabo. Coro corotaiboya jahubi honanquin sirijati hahtipahyamaxon sontarobo sca yohiquin: Xoboho hiottannahue —jato jaquin jaton hapon. ³⁵Retenahue hihqui coro corocanahibo sina sinataiya tapiti qui Pablo nocotaibon sontarobaan jaa hiascacanquin.

³⁶—Retenahue —coshin hihcanacani coro corotaibo.

Pablonen jato yohicoinali

³⁷Sontarobaan xobo xehqui qui nocosaxon sontaro hapo Pablonen yohiquin:

—¿Hen mia pishca yohinon min hea nincarohatimahin? —hahquin.

—¿Griego join min yohuanain? ³⁸¿Mia min hoa Egipto mai meha jonimah quin? ¿Hapobo potanon hihxon jato sinamaxon cuatro mil retemisbo nihi naman sca hiohipi, mia min jaamah quin?
—hahquin yocaquin sontaro hapon.

³⁹Jascajaha Pablonen yohiquin:

—Hea ta Tarso janinha judio qui. Cilicia main hani jema janinhah. Nea janibo hea yohimaroahue —hahquin.

⁴⁰Jan jeenhihquiya tapitinin mapexon jato qui jahuen mequen Pablonen sanaquin. Netecahinscacani. Jaton joinbi sca Pablo yohuani, judiobaan join sca.

22 ¹—Hea huetsabaan, heen papabaan, hea tsoa quin hen mato rahima yohinon nincanahue —jato jaquin.

²Jaton joinbi jan yohuanai nincacax hashoan sca netecani. Pablo yohuanparihi:

—Hea ta judio qui, Cilicia mai Tarso janinhax cainni joni. Nea jema janinxon ta maton haxemanicahbaan hea haxemapahonishqui. Gamaliel ta heen haxemanica hihxon hea haxemaquin sirijanishqui. Noquen xenibaan yohini quescabijaquin hen hahnon ta hea haxemanishqui. Man hihqui quescarihibi tah hen noquen Papan joi hihti jenipahichai. ⁴Hean rahma nincacoinai joi nincacoinaibo tah hen retenoxon caman jato chibapanahonihqui. Cadenanen nexaxon tah hen haiboya bebo jato sipojapahoniqui. ⁵Hean jascajapahoni ta

sacerdotebaan hapon, jatihibi noquen hani hapobaan rihbi mato yohitihiqui. Jaabaan ta hea jayaxon jato bihti quirica hinannishqui, Damasco janinha noquen huetsabo hen hinantannon hihxon. Jaya caxon janoo jaibo cadenanen nexaxon casticannoxon sca neno Jerusalen janin jato hihuehi tah hen caniqui.

**Noquen Hihbo qui tah
hinamehniqui hihqui Pablo
(Hahnibo 9.1-19; 26.12-18)**

⁶Barin manan tsacahiya ta Damasco hochoma bahin cahiton naihohxon sca hani xabapan hea xabajanishqui. ⁷Main paquexon sca hea yohihi joi hean nincaquin: Saulon, Saulon, ejahua copi min hea tiromajaquin chibana? hea jaquin. ⁸¿Tsoa min quin, Hihbon? hahquin hean. Hea ta Jesus Nazareno qui, min hea tiromajaquin chibana, hea jaquin. ⁹Hehbetan cahibaan ta jaa xaba jisxon bi hehbetan yohuanai joi nincayamanishqui. ¹⁰Hean hen jahuejati jain Hihbon, hean jaah ta Huenihue. Damasco janin catanhue. Jano ta mian hea hahxonti jai mia yohinoxihcanihqui hah ta hea noquen Hihbaan janishqui. ¹¹Hoa xabapan bechaxah tah hen jisti hahtipahyamascaax hehbe cahibaan mehuetanxon hiohah sca Damasco jema janin noconihqui.

¹²Jano ta Ananías janeya joni janishqui, Moisesnín joi nincanica. Jano jihuetai judiobaan ta jatihxonbi jahan shinannishqui. ¹³Hea janin nocoxon ta hea pataxxon sca, Heen huetsa Saulon, jise, hea janishqui. Jaatianbi tah hen jisresscaxon jaa meranishqui. ¹⁴Noquen papabaan Papa Diosen ta mia caisihqui, mian jaa hahxonti jan shinanai min honannon hihxon. Jahuen nincanica baque min jisnon, jan yohuanai min nincaribinon ta mia caisihqui. ¹⁵Min jisibo, min nincacaibo rihbi tah min

jatihibi jonibo yohiyaxihqui.
¹⁶¿Jahuejahi sca min basitihin? Mia nashimanon huenihue. Noquen Hihbo yocaxon miin hohcha sohuamascahue, hea jaquin.

**Noquen nahuabo yohinon ta noquen
Hihbaan hea raannishqui hih Pablo jai**

¹⁷Jerusalen janin nocorihbixon tah hen Papan xobohoxon Papa yocaxon namaquen hahcajaquin noquen Hihbo jisniqui. ¹⁸Histon Jerusalen janinhx carihue. Hean hen jato hahxonai min jato yohihah ta nincayamaxihcanihqui, hea jaquin. ¹⁹Hihbon, noquen tsinquitii xoboboho hihcoxon mia nincacoinaibo meraxon hean sipojaxon jato rishqui rishquipahoni ta honancaniqui. ²⁰Miin joi yohinica Esteban retehibus rihbi tah hen jano rihbi nihxon jascajanahue hihxon jaa retehibaan chopas hean coiranxonnihqui, hahquin hean. ²¹Catanhue, hocho tah hen mia raantihi nahuabo janin, hea noquen Hihbaan jaquin —nihqui Pablo.

Hapon Pablo bichi

²²Jano caman res nincacanquin. Jaton nahuabo yohihi Pablo catihi nincacax coshin sca sai saihihcani:

—Jascapa joni main yamascanon retenahue. Jascapah ta jihuetai mahiqui —nihcani. ²³Jaton chopas pecaxon mai poto rihbi bochiqui potahihnicanquin. ²⁴Jascabajibio jisxon Xoboho botannahue hapon jahuen sontarobo hahquin. Jahua copi jonibo hahqui jatihi sinatiquin hihxon sca rishqui rishquixon hisinjanon jato yohirihbiquin. ²⁵Yohihah rishquixon nexacanquin. Jano jai capitán sca Pablonec yocaquin:

—¿Jahuen hohcha honanxonma romano joni rishquiti joi man jain? ²⁶Jan yocacai nincacax hapo janin caxon capitán yohiquin:

—¿Jahueja min jacatsihquin? Jaa ta romano joni qui —hahquin. ²⁷Hahqui caxon sca hapon yocaquin:

—¿Mia min romano quin?

—Hea rahan —hahquin.

²⁸—Hea tah hen hicha copijahax romanoscaniqui —hahquin hapon.

—Hea tah hen romano cainnihqui —hahquin Pablonen.

²⁹Histon sca jaa hisinjacatsihquibo picoti bocani. Romano que bi jan cadenanen jaa nexahi copi hapo rihibi raquescái.

Judiobo hapobo bebon Pablo nichí

³⁰Jascjahipí huestí nete sca jahua hahqui yohuan jacoинiquin hihxon Pablo pecaxon sacerdotebaan hapobo, judiobaan hanibó jatihibi betan tsinquinon yohiquin. Jato qui hioxon sca jato bebonbi Pablo nichinquín.

23 ¹Tsinquitai hapobojisanañ Pablonen jato yohiquin:

—Hea huetsabaan, shinanquin sirijahax, tiromahxma jihuapeharonish tah hen rahma caman jascarai, Papan hea jisi honanax.

²Pablonen jascjahiyá jaa pataxaibaan Pablo copasnon sacerdotebaan hapon jato yohiquin.

³—Papa Diosen ta miabi rishquiayihqui qui, maoxen sicaha chiquepan. ⁴Jascjatima Moisesnín yohiní que bi min hea jato copasmahin? ⁵Jascjaquin min hea Moisesnín yohini quescajaquin min hea pontecatsihquin? —hahquin Pablonen.

⁴Jaa pataxaibaan sca:

—¿Papa Diosen sacerdote hapo min jascajaquin tiromajaquin yohihin? —hahcanquin.

⁵—Sacerdotebaan hapo tah hen honanyamahahqui, hea huetsabaan. Maton hapo tah man tiromajaquin yohitimahi hah ta huishani joi jaiqui —hahquin Pablonen.

⁶Jaatian caibo fariseobo caibo rihibi saduceobo honanscaxon hapobaan nincacahbo coshin sca yohuani:

—Hea ta fariseo qui, hea huetsabaan. Fariseobaan baque ta hea qui. Mahuanibó ta Papan hahquiribí teehihmayaxihqui qui hen jai copi ta hea casticancanahqui.

⁷Jan jascaraiya fariseobo betan saduceobo join bahchinanscái. Jaa copi caibaan Pablo casticancatsihqui bi caibo queenyamascái. ⁸Mahuanibó ta Papan teehihmaribitimahi qui. Papan naihoh queha yonotibo ta yamahihqui, yoshin rihibi ta yamahihqui, hih saduceobo jai bi ta Hah ta jatihiqui, jaf rahan, jaf rahan, fariseobo jaiqui. ⁹Join bahchinani corotaiboya fariseo huishani honanbo nihrenenxon hani join coshin jato yohiquin:

—Noquen jisi ta nea joni hohcha yamahihqui. Yoshiman jaa yohuanquihnaia jaa hihiyamahiya Papan yonotinin jaa yohuanquihnaia mato jahua hihtihin? —hahcanquin.

¹⁰Hashoan sca rainyamacani. Nininanquin Pablo huaxabahincanmis hihxon, Jato bichinnahue hapon jahuen sontarobo jaquin. Mehuetani caxon bichinxon coshin nimbehnantanxon jaton xoboho sontarobaan Pablo boresscaquin.

¹¹Jascjahipí huestí neten sca yame Pablo janin noquen Hihbo sanarenenxon:

—Raquemahue. Neno Jerusalén jema janinxon min hehqui jato yohicoinai quescajariquin tah min Roma jema janinxon jatihi —hahquin.

Pablo rehteti shinanaibo

¹²Xaba paquescaya Pablo rehteti shinancanquin judiobaan.

—Non jaa rehtenoxon caman tah non pitimahi, xehatimarihbibi. Non jaa rehteyamahiya noque sca Papan rehtenon —hahcanquin. ¹³Cuarenta joni hihxon

jascajacanquin. ¹⁴Jascajahax janosacerdote hapobo betan jaton hanibojaiton bocani. Nocoxon:

—Non yohihi quescabijaquin non hahyamahiya Papan noque rehtenon hihxon tah non yohihahqui, Pablo rehtenoxon caman tah non jahuabi piti nohuejatimahi. ¹⁵Tsinquitai hapobo yocaxon sontaro hapo rihbi yocanahue jan neno mato janin jaa bexonnon. Pablo yohuanai man sirijaquin sca nincacatsihqui janahue. Janin noconon tah non rehtetih, non tah non manascai —hahcanquin.

¹⁶Rehteti shinanaibo honanax Pabloneisha pishca cahi sontarobaan xoboho caxon Pablo yohiquin. ¹⁷Jaan sca capitán quenaquin. Jahuiton:

—Nea beronan miin hapo janin hioxonhue jan nincabehnanai jan yohitannan —hahquin.

¹⁸Jahuen hapo janin sca capitán hioquin.

—Non bichipi Pablonen ta hea quenaxon nea beronan mihqui hihuexonnon hea yocacaxqui. Mia roqui nincamacatsihqui qui.

¹⁹Jascajaha mehuetanxon hahmebi hiohax sca yocacahti:

—¿Jahua min hea yohicatsihquin?

²⁰—Heen caibaan ta hashoan sirijaquin honancatsihquin hahcajaquin mia nescajaquin yocati shinanihqui. Non Pablo yocanon hapobo tsinquitai janin bahquish Pablo hioxonyaxahnhue hih ta jacanihqui.

²¹Jaabo hihcoinai shinanyamahue. Cuarenta hihxon hashoan hicharihbixon ta jaa rehtenoxon caman pitimahi, xehatimahi yohicaniqui, rehteyamahiboya jaabo sca Papan rehtenon hihxon. Rahma ta quexescacanihqui rehtecatsihquin. Min jeenhahnon res ta manacaniqui —hahquin beronanen.

²²—Hea min jascajahi tsoabi yohiyamatihin min. Caresscatanhue —hahquin hapon.

Gobernador Félix janin sca Pablo raanaibo

²³Rabe capitán sca quenaxon jato yohiquin:

—Doscientos sontaro tsinquinahue. Cabachonen nichibo rihbi setenta sontaro. Jashiyahpabo rihbi doscientos sontaro. Yame sca jaiya Cesarea jema janin caman Pablo botannon jato raannahue. ²⁴Hahan Pablo rihbi cati cabacho bexonnahue, gobernador Félix janin caman sirijaquin hionoxon. ²⁵Jato jascajaxon quirica sca nescajaquin huishaquin:

²⁶Hea Claudio Lisias hihxon tah hen mia noquen gobernador Félix mihqui joi raanai. ¿Min jascabi jayamahin? ²⁷Hen mihqui raanai joni judiobaan rehtepanan tah hen sontaroya nocoxon romano joni honanaxon jato bichinipiqui. ²⁸Jahua tiroma jaiquin hihxon hen jaton hapobo jano tsinquitaiton hiohipiqui. ²⁹Jaton xenibaan joi jan nincayamarai copi res jaabaan sinajahi bi ta jahua copi rehteti yama qui. Jahua copi sipojati yamarilbihibi tah hen honanscaipiqui.

³⁰Jaa rehtenoxon caman piyamaxihquibo jai chanihad tah hen histon res mihqui raanti shinanscaipiqui. Hahqui yohuaniba rihbi tah hen yohihipiqui, hahqui yohuanti joi jaxon mia hihbaan yohuantanon, hahquin huishaquin.

³¹Hapon yohiha quescabijaquin cahen Pablo bihxon nihshinaxon Antípatris jema janin caman sontarobaan hioquin.

³²Bariyahpan sca cabachonen nichibo hahbetan catannon texe sontarobo jaton xobon caribhi. ³³Hiotanxon Cesarea jema janin nocoxon cabachonen nichibaan janoha gobernador qui jaa quirica hinanquin. Hinanxon Pablo rihbi hahqui hihuecanquin. ³⁴Jaa quirica jisxon jahuerahnoha mai meha mia quin hihxon Pablo yocascaquin. Cilicia mai meha rahan jan hihnon:

³⁵—Min yohihi tah hen nincatihi mihqui yohuanabo nocotaiya —hahxon Herodesnin quiquin hapo xobohoxon coiranahbo hihxon jahuen sontarobo yohiquin.

Felixnin quenamaha Pablo yohuanai

24 ¹Jan jan oco tipi pichca neten sca sacerdotebaa hapo Ananías nocoti jahui. Hahbetan rihbi caibo jaton haniboo. Yohuanxon yanapannicah rihbi Tértulo janeya. Jaa rahsi jahui. Pablo qui jaabo yohuantí jai joi jaton gobernador nincamacanquin. ²Pablo quenamaha noco sca jaiya hahqui yohuani Tértulo pari yohuani:

³—Mia copi ta noquen caibo siripi jihuethqui, Félix hapon. Mia tah min hihi siri qui. Mian yohihih ta pontejaquin sca shinaxxon nea noquen caibo coirancaniqui. Jatihibi janinxon tah non jatihibijaquin, Min tah min noque hahxonai, hahcai, mia yohiquin. ⁴Jaabi tah hen mia hashoan jatsanjacatsihyamaxon hen mia pishca yohicatsihqui. Siri joni hihxon min hahcai quescajaquin hea nincarohahue, hen mia yohinon. ⁵Nea joni ta hisin pahe quescapah qui. Non tah non honanscái. Jatihibi main jihuetai noquen caibo ta jaan rainyamamahiqui, noquen quiquin hapobo non potanon hihxon. Jaa ta nazareno joi chibanaibaan hapo qui. ⁶Noquen Papa Díos xobo rishtajahiton tah non jaa bichipiqui. ⁷Noquen xenibaan yohini quescajaquin non jaa japanan ta sontaro hapo Lisias joxon coshin noque bichinipishqui. Mia hihbaan sca non demandani jonon ta noque yohihipishqui. ⁸Queenax miabi jaa yocacahhue. Jascaxon tah min non mia yohihi joibo jaa yohuanmaribitihu —hihqui.

⁹—Jascacoin tah qui —hihcáni hahbetan jahui judiobo.

¹⁰Jaa sca yohuannon gobernadoren mequen sanahiya Pablo yohuani:

—Hicha bari sca min noquen caibo pontehi honanxon tah hen sirijaquin shinanhahnan mia yohihi, jahuea hen Jain min honannon hihxon. ¹¹Doce nete res sca tah qui, hen Jerusalen janin Papahon shinani cahipi. Yocacahxon tah min hea hihcoinai hea honantihu.

¹²Jahuenbi ta hea jonibo betan yohinanaiton merayamahipicanaxqui ni Papa Díos xoboho, ni jaton tsinquitxi xoboboho, ni jema bahinbi. Jonibo sinamaxon coromahiton ta hea jahuenbi merayamahipicanaxqui. ¹³Hehqui rahma yohuanai joi rihbi ta jenquetahaxon bi jan hihcoinai mia honanmatimahiqui. ¹⁴Min honannon hihxon tah hen mia yohihi. Heen papabaan Papa Díos tah hen shinancoinai. Moisesnin huishani joi jatihibi, Papan joi yohinicabaan huishani joi jatihibi rihbi tah hen nincacoinai. Criston bahin caxon tah hen nincacoinai, jaa bahi cahen nazareno joi neabaan yohihi. ¹⁵Siriboya tiromabo Papan huénirihbiyaxihqui jaabaan shinanai quescajaquin tah hen shinanai. ¹⁶Jaa copi tah hen hea tiromayamahi Papan jisnon hihxon, jonibaan rihbi jascajaquin jisnon hihxon, pontejaquin shinanax hea jihuetai.

¹⁷Hicha bari cayamanish tah hen jahuajomabo heen caibo yanapannoxon coriquiya cahipiqui, Papa Díos rihbi pishca hinani tah hen cahipiqui.

¹⁸Jaatian ta nashihax Papa Díos xoboho nichiton hea merahipicanaxqui, noque janin tsamajaquetaibo yama, noque jahuabi coroyamahi. ¹⁹Asia mai mehax jahui judiobaan ta neno jahuex hehqui yohuantí jaiqui, hehqui yohuantí jaax. ²⁰¿Jaabo joyamahiya, jaton hapobo tsinquitai tocan hea nichiton jahua hen tiromajahi jaton hapobaan merahipishquin? Neabobi yohimahue. ²¹Nea res tah hen jato tocanxon coshin yohihipiqui: Muhanbihbo Papan

huenirihbyaxihqui hen shinanai copi ta hea casticancatsihcaniqui. Jascajaresquin —hahquin Pablonen.

²²Jan yohihi bahi ta Felixnín honanquin sirijanishqui. Honanxon bi ta jaa netenbi jato nincacatsihyamanishqui.

—Sontaro hapo Lisias jahuiya pari tah hen mato jisyaxihqui —jato jaquin.

²³Jascajaxon capitán sca yohiquin Pablo coirannon. Jan xoboho nihnon, jahuen amicobo rihbi pitibo hinani hihcocratsihquiya jato hihcomanon capitán yohiquin.

²⁴Felixnín haibo cahen judío, Drusila janeya. Jato jascajahipish jahuentihi nete ra jahuen haibo betan joxon Pablo quenamáquin. Quenamaxón non Cristo nincacoinai joi Pablo yohimaquín. ²⁵Non ponte jihuetai jai, non coirameti jai, Papan casticanyaxihqui joibo rihbi Pablonen yohihiya Félix rahte rahteti. Nincaxon:

—Caresscahue. Hen tee hichayamahiya tah hen mia hahquirihbi quenamatih —hahquin.

²⁶Jaa pecaho coriqui Pablonen hinannón hihxon quenamaricahtíxon yohuanquihñquin. ²⁷Rabe bari huinoscaya Porcio Festo sca Félix xahbanen haposcaí. Judiobo jenimanon hihxon jaan rihbi haho sipojati xoboho Pablo banemaquín.

Feston Pablo quenamahi

25 ¹Jaa mai janin Festo nocoscái. Nocotipish quimisha neten hihquish Cesarea janinhax Jerusalén janin cahi. ²Janoxon sca sacerdote hapobo betan judiobaan hanibaan Pablo qui yohuanti joi jaa yohiquin. ³Bahin jahuiton quexeson rehteti shinanaxón Jerusalén janin Pablo hihuexonnon Festo yocacanquin.

⁴—Jaa ta Cesarea janinbi xehpó qui. Hea rihbi tah hen jano caresscatih basihaxma. ⁵Jaa copi hahqui yohuanti

jaax maton hanibo hehbetanbi canon janohax yohuannoxon —jato jaquin Feston.

⁶Ocho neten hiyamahiya choncha neten jato janin hihquish Cesarea janin caresscái. Nocotipish mohiyahxon janoxon jonibo ponteti xoboho tsahoxon Pablo quenamaquín. ⁷Quenamaha nocotaiya Jerusalén janinhax nocotipi judiobo jaa nihaquehtancahuani. Hicha hahqui yohuancani. Jaa ta hihti tiroma qui, hihcane. Jascaxon bi hihcoinaibо jismati hahtipahyamacanquin. ⁸Jaatian:

—Noquen xenibaan joi qui tah hen hohchayamahi. Papa Diósen xobo qui rihbi tah hen hohchayamahi. Cesaro qui rihbi tah hen tiromayamabiresai —Pablonen jaa jaquin.

⁹Judiobo jenimanon hihxon sca Feston Pablo yocaquin:

—¿Jaabo mihqui yohuanai jatihibi hen nincaquin sirijanón min Jerusalén janin cacatsihyamahin? Janoxon hen nincanon —hahquin.

¹⁰—Quiquin hapon pontexonnica bebon tah hen nichí. Nenoxonbi hea pontehue. Judiobo qui tah hen jahuabi tiromayamahi. Min tah min honanai.

¹¹Hen tiromahi copi hea rehteti jaiya tah hen Hen tah hen mahuacatsihyamahi, hen hihtimahi. Huetsa joni hen tiromajani copi hea rehteti jaiya tah hen jascaribitimihi. Hehqui yohuanaibo quesahiya ta tsoanbi jato hea hinantimahi. Cesarónen sca hea jisón hahqui hea raanhue —Pablonen jaquin.

¹²Feston sca jahuen yanapannicahbo betan yohuantahxon:

—Cesaro qui hea raanhue hah tah min jai. Hahqui sca tah min catihi —hahquin Feston.

Quiquin hapo Agripánen Pablo quenamahi

¹³Jan jascajahipí pecaho Berenice betan quiquin hapo Agripa jano nocoti jahui

Festo jisi Cesarea jema janin.¹⁴ Jano jahuentihi ra neten hih jan jaresscayia Pablo cahehipibo Feston yohiscaquin:

—Felixnin xehpobahinni joni ta neno jaiqui.¹⁵ Jerusalen janin hea cahiya ta sacerdote hapobo betan judiobaan hanibaan hahqui yohuanxon Pablo rehteti yocaquipicanaxqui.¹⁶ Hahqui yohuanaibaan nincanon bi jan jato joi bichinon hihxon yohimayamaxon tah non noque romanobaan hahqui yohuanaiboya jascajaquin rehteresyamahi, hah ta hen jato jaipiqui.¹⁷ Jaa copi ta hehbetan behipicanaxqui. Non nocotipi mohiyahtax tah hen janoxon jonibo ponteti janin tsahoscaxon jaa joni quenamahipiqui.¹⁸ Hahqui yohuanaibo nincaxon bi tah hen hean shinani pi quespara tiroma hean merayamahipiqui.¹⁹ Jaton dios hahxonti joibo copi res ta yohinanipicanaxqui. Huesti Jesus yamanicaton joi copi rihbi. Jihue ta jaiqui, hih ta Pablo jaiqui, jaa yohihi.²⁰ Jenquetsahaxon jato sirijaquin nincatihin, honanyamaxon tah hen Pablo yocaquipiqui: ¿Jerusalen janinxon hen mia jisnon min jano cacatsihyamahin?²¹ Hen jascajaha bi ta queenyamahipishqui. Cesaronen sca jaa jisnon hihxon hen xehpotahxon raanyaxahnnon hea yocacah tah hen xehpomahipiqui Cesaro qui raanti hahtipahnoxon caman —hahquin Feston.

²²—Jaa joni tah hen nincacatsihqui heanbi —Festo jaquin Agripanen.

—Bahquish tah min jaa nincanoxihqui —hahquin.

²³Hoxashinahax mohiyahtax sca Agripa betan Berenice jaton quiquin hapo chopasahuehax jaton jomiboya joribibi. Jaton sontaro hapobo betan jaa jema janinha hapobo betan rihbi janoxon nincati xoboho mapecani. Janoxon sca Feston Pablo quenamaquin.²⁴ Quenamaha nocotaiya sca Festo yohuani:

—Agripa quiquin hapon, noque betan tsinuitaibaan, nea tah qui. Jerusalen janinxon hea yocaxon ta neno xon rihbi jatihibi judiobaan hea coshin yocaquipishqui nea hen muhamascanon.²⁵ Jaabi tah hen jahua copi casticanxon rehteti merayamahipiqui. Cesaro janin hen raannon hihxon hea yocacah tah hen raanti sca shinani piqui.²⁶ Huishaxon joi raantihbi bi tah hen hahqui hihcoini yohuanaibo shinanyamahipiqui. Jaa copi tah hen man nincanon hihxon quenamaribhaqui. Mian nincaxon hashoan honanxon min hea yohiha jaa sca huishanxon tah hen mia jaa nincamahi, Agripa quiquin hapon.²⁷ Hahan caheti joi huishaxonma bi sipojaxon joni raanah ta tiroma qui hean jisi —jato jaquin.

Hapo Agripa janin Pablo yohuani

26 ¹—Queenxon jato joi bichinhue —Pablo jaquin Agripanen. Jaatian nincacahbo mequen sanahihnxon:

²—Jahuerohajaquin tah hen mia nincamati hahtipahi, Agripa quiquin hapon. Heen caibo hehqui yohuanai joi bichinquin tah hen mia nincamahi.

³Jenquetsih noque judiobo jihuetain, mian tah min honanquin sirijahi. Non yohinanai joi tah min hashoan honanai. Jaa copi hea tenexon hen mia yohihi nincarohahue.

Noquen Hihbo qui hinamehriyamaxon tah hen jato hihti tiromajapahonihqui hih Pablo jai

⁴Beronanax tah hen Jerusalen janin haninbihqui heen caibo tocan. Jatihixonbi ta heen caibaan jaa honanbihqui.⁵ Hihcoini yohuancatsihxon ta mia yohixihcanihqui. Fariseohax tah hen fariseobaan shinananai quespari hen basi jihuenehqui. Moisesnini yohini quespari caibo judiobo jihuetai bi

ta fariseobaan hihti nincacoinax jihuemicabo qui. ⁶Noquen Papa Diosen noquen xenibo hahxonijanixon jan jato hahxoncoinscái hen shinanai copi ta hea demandancaniqui. ⁷Jan noque hahxonnon ta noquen caibaan bariyahpan yame rihbi hahan shinanihqui. Jaa ta hihti manacaniqui. Jan noque hahxonscái hen shinanai copi ta hea demandancaniqui, quiquin hapon. ⁸¿Mahuanihbo Papa Diosen huenicointima shinan man Jain?

Noquen huetsabo Pablonen tiromajapahoni

⁹Jesus Nazareno joi nincayamahahbo hihxon hen jato hihti tiromajati ta Papa queenihqui hihxon tah hen Jerusalen janinxon jascajapahoniqui. ¹⁰Jano tah hen hicha jahuen baquebo sipo xoboho tsahonnihqui. Hen jascajati joi ta noquen hapobaan, noquen quiquin sacerdotebaan rihbi hea huishaxon hinancannishqui. Jaa jonibo rehtehiboya tah hen Jascajanahue hihpahoniqui. ¹¹Jatihibi tsinquití xoboboho hihquixon tah hen hicha bihxon Cristo qui jato tiromahi yohuanmanoxon hihxon jato rishqui rishquipahonihqui. Jato qui hihti rainyamahi tehuehixon tah hen hocho queha nahuabaan jemabo janin caman hen jato chibapanhonihqui.

Noquen Hihbo qui jan hinamehni Pablonen yohirihibi

(Hahnibo 9.1-19; 22.6-16)

¹²Jato jascajanoxon tah hen noquen hapobaan quirica hinanah Damasco jema janin cahi caniqui. ¹³Barin manan tsacahiya tah hen bahin caquin naihoh quehax xabatai jisniqui, quiquin hapon. Bari mentan hashoan coshin xabatai. Hea, hehbetan cahibo rihbi xabajaquin. ¹⁴Noque jascajaquin xabajaha jatihibi racareneni. Noquen join yohuanai sca hea quenahi hean nincaquin: Saulon, Saulon, ¿jahua copi min hea tiromajaquin

chibanan? Hahan toro chichachiti tahuah cahchihohri jamaquihcamahi tah min hisinai. ¹⁵Jaatian: Tsoa min quin Hihbon, hahquin hean. Hea ta hen Jesus qui, min hea tiromajaquin chibana. ¹⁶Huenitax nihresscahue. Mia caisnoxon tah hen mihqui cainai. Min hea teexonnon tah hen mia caisai. Min hea jisresscái tah min jonibo yohiyaxihqui, hen mia jismayaxihquibo min yohicoinnon hihxon tah hen mia caisai. ¹⁷Miin caibaan mia rehtecatsihqui bi tah hen mia rehtematinamahi. Jato qui tah hen mia raanyaxihqui. Miin caibomabaan rihbi mia rehtecatsihqui bi tah hen mia rehtemayamayaxihqui. ¹⁸Min jato xabajaxonnon hihxon tah hen mia raantihi bahquish chian jaabo nichish bi xabapan sca nihnon hihxon. Satanasnen jato hihbojani bi Papa sca jato hihbojamanon hihxon tah hen mia raantihi. Papan jaton hohcha sohuaxonah hea nincacoinaibó tocan jaabo jihueyaxihnon hihxon ta hen mia raantihi hea jaquin.

Noquen Hihbaan yohini Pablonen nincacoinai

¹⁹Papan hea jismaxon yohini quescabijaquin tah hen yohiquin pishinmayamaniqui, Agripa quiquin hapon. ²⁰Damasco janinxon pari yohixon Jerusalen janinhahbo sca yohixon Judea mai mehabo jatihibi yohixon judiomabo rihbi sca tah hen jato yohiniqui. Shinan pontexon Papa Dios sca nincaxon behnajaquin shinanxon quescabijaquin sca hahcabo hihxon tah hean jato yohiniqui. ²¹Jaa copi res ta Papan xoboho hea bihxon heen caibaanbi hea rehtecatsihquicicanaxqui. ²²Papan yanapano tah hen rahma caman jaa joi yohiquin jeneyamahi, hamibo yohixon jahuarajomabo rihbi yohiquin. Papan yohinicabo betan Moisesnin ta jayaxihquibo yohinishqui. Jaa joi res tah hen jato honanmahi huetsa joima. ²³Papan caisai

joni tiromajayaxihquibo ta yohicannishqui Moises, jaabaan. Hihquipish bi jaa pari huenixon noquen caibo jan xabajaxyaxihqui noquen nahuabo rihbi jan xabajaxyaxihqui ta yohicannishqui. Jaa joibi tah hen yohihi, huetsama —jato jaquin Pablonen.

**Noquen Hihbo qui Agripa hinamehnnon
nihquish Pablo yohuanai**

²⁴Jascajaquin joi bichinaiton Feston coshin yohiquin:

—Min tah min tehquehihqui, Pablón. Hashoa hicha quirica honanax tah min mapo masascai —hahquin.

²⁵Tehquehihyma tah hen jai, Festo hapon. Hen yohihi ta hihcoinai yohuanti qui, shinanquin sirijahaz yohuanti.

²⁶Noquen quiquin hapo hihxon tah min hen yohuanai min honanquin sirijahi. Jaa copi tah hen shinanquin sirijahanan yohuanai. Hen yohuanai tah min honanscái. Hen tah hen honanai. Hen mia rahma yohihi tah hen jonéxon hahyamaniqui. ²⁷Epapan yohinicabaan huishaxon yohini joi min nincacain, Agripa quiquin hapon? Ninca tah min jai. Hen tah hen honanai —hahquin Pablonen.

²⁸Hicha tahma res ta pishinlhqui, min hea Cristo qui hinamehmáti —Pablo jaquin Agripanen.

²⁹Hicha tahma pishinyamahax hicha pishinai bi tah hen Mian nincacoinpahinon hen jai. Mia huestima bi hea rahma nincacaibo jatihibi hea hihqui quescari japhahinon. Nea cadenabó res man yamanon —hahquin Pablonen.

³⁰Pablo jascaraiya quiquin hapo, gobernador, Berenice, jato betan tsahotaibo jatihibi nihrenenscái, canoxon.

³¹Picoscaibo yohinaní:

—Nea jonin ta jahua copi casticanxon rehteti hahyamahiqui, jahuabi. Jahua copi sipojatima ta jaiqui —hahcaní.

³²Cesaro qui raanti yocayamahipiyo tah non jaa picoquehahnai —Festo jaquin Agripanen.

Roma qui Pablo raanahbo cahi

27 ¹Italia mai janin sca non nontin canon ta hapobaan yohnishqui. Yohihiya ta Pablo, jahuen hahbe sipojanibo rihbi Julio janeya capitánan jato coirannishqui, jato coiraní cahue hapon jaah. Jaa capitán cahen Augusto janeya tsama quiha. ²Adramitio mai meha nontin tah non nanerihqui Asia mai meha jemabó janin nihuen xotonah taxnatni cahiya. Huesti Macedonia mai meha joni tah non hionihqui, Aristarco, Tesalónica janinha joni. ³Janohax cahax nihshinahax nihbahinahax Sidon jema janin taxnatni. Hahan shinanxon ta Julionen Pablo mapemanishqui jano jan honanai jan jistannon, jato jisxon jan pishinaibo rihbi jan maronon. ⁴Janohax cahax tah non nihuen noque behchihiyá Chipre mai quexa caniqui, jano jaa main nihue pantehiton. ⁵Cilicia, Panfilia, jaa maibo ponte sca quebijistima hian pohquejaquetax Licia mai quiri Mira jema janin taxnatni.

⁶Jano ta Alejandría janinha nonti noquen sontaro capitán meranishqui. Italia mai janin jaa nonti cacatsihquiya hahqui sca noque nanebohanquin. ⁷Janohax cahax tah non jahuentihi ra neten honahax bi caniqui. Huina huinabonahax Gnido ponte nocoscaí. Nihuen noque behchirihbibiya cahen janohax Creta main cahi Salmon hochoma. ⁸Jano honahaxbi quexa cahax Puerto Bueno hahcaibo janin nocoti. Jaa hochoma ta Lasea jema jaiqui.

⁹Non basihi jisxon bari tian huinoscaí bi nontin cahax reocohtax non jene meran camis hihxon Pablonen jato yohiquin:

¹⁰Jisanahue, amicobaan. Nontin cahax non querabequemis. Behchoman ta noque tsahcatihiqui, man bohi jahuabora

manoscanon, nea nonti rihbi manoscanon, noque rihbi hihquiscanon —jato jaquin.

¹¹Pablonen yohihah bi ta capitanen nincayamanishqui. Jaabi canon cahue nonti hihbo jaiya, nonti chibinica rihbi jascaraiya ta capitanen jato nincanishqui.

¹²Behchoman nonti tiromajatihi hihxon cahen janoxon jene tian huinomatima nonti hihbaan shinanquin. Janohax cati shinancanquin, hashoan hichaxon. Fenice jema janin nocoxon pari jene tian huinomatia shinanquin. Fenice ta noa hani qui, ramiho quexa bari hihquihi chipon hori, ramiho quexa bari hihquihi rebo hori naxba qui.

**Quebijistima hiaman caxon
nihuenhuan behchihibo**

¹³Jaatian hian reboquihax nihue siri pishca jahuiya, cati siri sca ta jaiqui hihquiboa, mai potabahinax Creta mai quexa cahi. ¹⁴Non quexa cahi bi jari bari cainai chiponhohrihax nihue coshin nocoreneni. ¹⁵Mai quirihax joxon jaa nihuen noquen nonti hueranbohanquin. Jaa behchihahnan huinacasquimaxon, noque xotonresnon noquen jenequin. ¹⁶Clauda janeya mai pishcaton nihue pantehiton sca caxon tee teexon noquen nonti pishca noquen hani nontin nanequin noquen. ¹⁷Hahan nihuen xotonti chiarihbixon nonti caxquemis hihxon noquen nonti rahnexcanquin. Jaatian sca Sirte janin mai chahchimis hihxon, hahan nihuen xotonti sebixon sca, nihuen noque xotonnon jenerihbiquin. ¹⁸Jascajahipish nihshinahax cahi bi behchoman noque coshin tsahca tsahcahya nonti hihueyamanon hihxon texe jaton jahuabora jenenencanya potascacanquin. ¹⁹Jahuen quimisha neten sca jaabaambi jaton nonti jahuabora sca potacanquin. ²⁰Jahuentihi ra neten bari jisyamascaxon, huishi jisyamascaxon, nihuen rihbi jascabi coshin tsahcaha jihueta shinanscaquin noquen.

²¹Basi piyamahipiboya jato qui caxon Pablonen jato yohiquin. Hen yohihipi man niincacax tah man hashoan siri jaquehahnai, amicobaan. Creta non potabehnanyamahipish tah non nescari tiromayamaquehahnai. Non tah non jahuab manomayamaquehahnai. ²²Jaabi raque potanahue. Nonti huesti ta tiromathiqui. Tsoabi tah non mahuatimahi. ²³Hea ta Papa Diosen joni qui. Hean tah hen jaa teexonai. Nea yamebi tah hen jahuen naihoh queha yonoti jisiqui. ²⁴Raqueyamahue, Pablon. Cesaro janin tah min nihyaxihqui. Mihbetan cahibo jatihibi ta Papan mia hinanihqui, hah ta hea jaaxqui. ²⁵Jaa copi raqueyamanahue, amicobaan. Papan hea yohihi quescabi ta jatihihi. Hen tah hen honanai. ²⁶Mai pishca janin rah tah non nocoti cahi —jato jaquin.

²⁷Rabe semana huinotax yame sca Adria quebijistima hian janin nihuen noque jascabi nontan nontanaiya yame pochinicon sca mai hochoma sca jai shinancanquin nonti mehax teenicabaan.

²⁸Jahuentihi nemin hin hihxon topolah ta veinte brasa janishqui. Caribixon toponrihbicanquin. Quince brasa sca jai. ²⁹Jene bemacanya macan chahchimis hihxon nonti chishqui quiri chosco hahan mai mespoti nexaxon potacanquin. Xaba paquepahinon hihxon manaquin. ³⁰Nonti potabahinti shinanxon nonti rexo qui huetsa hahan mai mespoti nexahihcamaxon nontin teenicabaan jaton nonti pishca jenenencanya paquequin.

³¹—Hoa jonibo nea hani nontin baneyamahiya tah man jihuetaimahi —sontaroboya capitan Pablonen jaquin.

³²Jascajaha ta sontarobaan risbibo xatenishqui, nonti pishca jabascanon.

³³Xaba paquescai bi piti pinon hihxon Pablonen jatihibi yohiquin:

—Rabe semanan sca tenehahnan tah non pihaxma nonotai. Jahuabi tah non piyamarasihi. ³⁴Piti piresscanahue hah

tah hen mato jai, hahan coshihax man jihuuenon. Tsoabi tah man mahuatinahi, jahuabi tiromayamahi.

³⁵Jato jascajaxon jatihixonbi nincanobni Papa yocaxon piti tehcaxon piresscaquin.
³⁶Piti shinanscaxon jatihibichin sca picanquin. ³⁷Noque jaa nontin cahibo rahsi cahen doscientos setenta y seis. ³⁸Pihi yaniscaxon nonti hihueyamanon hihxon trigo sca jenenencanya potacanquin.

Jaton nonti hihquihi

³⁹Xaba paque sca jaiya mai meraxon bi jahua mai hin honanyamacanquin. Mashiyahpa hani noa jisxon hahtipahxon jano nonti taxnacatsihcani.
⁴⁰Jenenencanya banenon hahan mai mespotibo pecacanquin. Hahan chibiti nexahipibo pecaxon jahan niuhuen xotonti chiahihnicanquin. Niuhuen xotonah sca mashihohipi cahi. ⁴¹Caquin bi bemacanya mashi chachihax nonti peracahti. Jahuuen rexo mashi peracahrenenax tsequetimahi bi jahuen chishqui behchoman caxque caxquequin. ⁴²Nonahax jabacanmis hihxon sontarobaan jaton sipojanibo rehtecatsihscrai. ⁴³Rehtecatsihscraibaan bi Pablo jihuemacatsihxon capitaneen jeenhyahyamaquin. Nonati honanaibo pari jenenencanya cayahax nona nonahi mai qui canon sca jaan yohiquin. ⁴⁴Caibo sca jihui caxque xecoyamaxon nonti quexe xecohax canon yohiquin. Jaschahax mai qui nococani jatihibi.

Malta mai pishca qui Pablo nocotai

28 ¹Main sca nihxon tah non jaa mai jane Malta honannihqui.
²Janohahbaan ta noque sirijaquin bihnishqui. Hoiyahpa matsu jahuiya sca chihi requenjaxon non jatihibi pehchihi canon noque quenacanquin. ³Pablonen ta caro bihxon chihi janin tsamanhihni bi xanahax caro mehax rono picoxon mequen qui jaa pinishqui. ⁴Jahuuen

mequen qui rono hueotai jisish janohahbo yohuani:

—Jaa rah ta joni rehtemis qui. Hiaman retequin bi cahnehah bi ta ponte yoshiman jihuematimahiqui —hihcani.

⁵Mequen qui ronon piha hueotai bi cahen meshbishcohquin chihi qui potaquin. Jahuabi hisinyamahi.

⁶—Rahmabi ta soohihquish mahuati sca paquexihqui —hihcani. Basi manaxon jahuabi yamahi jisxon shinan huetsajascacanquin.

—Jaa rah ta dios qui —hihsacacani.

⁷Jaa hochoma ta jaa mai patoronen maibo janishqui Publio Janeja patoro. Noque bihquin sirijaxon quimisha neten jahuen xoboho noque jihuemaquin.

⁸Publion papa bachihio hisinax racati yonati, chixoti. Hahqui caxon Papa yocaxon Pablonen mehequin. Jascajaha rohascái.
⁹Jaa jisish jaa mai janinha hisinaibo sca becani. Jaabo rihbi rohajaquin. ¹⁰Jaabaan rihbi sca noque hicha hinanresquin. Noque janohax caresscacatsihquiya non pishinaibo jatihibi noque hinancanquin.

Roma jema qui Pablo nocotai

¹¹Quimisha hoxne huinohax tah non Alejandría janinhax joho nontin noque nanenihqui. Jaa nonti cahen jene tian huinon caman jano taxnani. Jahuuen cahen Rabe nane. Jahuuen rexo janin jaa Jane jai, hahan jaa nonti honanti. ¹²Cahax Siracusa jema janin taxnatax jano sca quimisha neten hihqui. ¹³Janohax cahi quexa cahax Regio jeman nocoti. Nocotipish mohiyahxon jisi bi reboquihax nihue siri jaresscái. Jaan xotonah tah non jahuen rabe neten sca Puteoli jema janin nocotax mapenihqui. ¹⁴Jano tah non noque huetsabo meranihqui. Banenahue hahcabó tah non jato betan siete neten rihbi hihni qui. Janohax Roma jeman sca cahi cahi, main sca. ¹⁵Non cahi joi honanax ta Roma meha noque huetsabaan noque

behchihi becannishqui, Foro de Apio hahcaibo jema janin noque behchinonoxon. Tres Tabernas hahcaibo jema janin sca caibaan rihbi noque behchiquin. Jato meraxon, Hahxon tah min hea jai Papan, hahxon sirijaquin sca Pablones shinanquin.¹⁶ Roma janin non nocotaiya ta hahmibi Pablo jihuemacannishqui jahuen coirannica sontaro betan.

Roma janinxon Pablones yohihi

¹⁷ Jan nocotipi quimisha neten sca judiobaan hamibo Pablones quenamaquin. Tsinquitaiton sca jato yohiquin:

—Noquen caibo qui tah hen jahuabi tiromajayamaniqui, hea huetsabaan. Noquen papabaan joi qui tah hen jahuabi tiromajayamaribhi. ¹⁸ Jerusalen janin heabihxon ta nahua hea hinancannishqui. Jaabaan sca ta hea yoca yocaxon jahua copi hea rehteti merayamaxon hen catannon hea jeneti shinannishqui.¹⁹ Jaabaan hea jenecatsihqui bi ta noquen caibo queenyamanishqui. Jaa copi tah hen Cesaronen sca hea jisnon hea hahqui raanmaniqui. Heen caibo qui tah hen jahuabi demandanti yamahi. ²⁰ Jaa copi tah hen mato jiscatsihquipiqui, mato yohuanquihncatsihquin. Noquen caibo jan yohini quescabijaquin Papan noque hahxonai hen shinanai copi res tah hen nea cadenayahpa qui —jato jaquin.

²¹—Judea mai mehax mihqui yohuanai ta noque qui joi nocoyamahihqui. Mihqui yohuanai noquen huetsabo rihbi ta tsoabi nocoyamahihqui. ²² Jaa Jesusya joihibo qui ta jatihibi janin tiromahi yohuancaniqui. Jaa tah non honanai. Jaa copi tah non miabi yohuanmacatsihqui —hahcanquin.

²³ Jaa netenbi tah non joribiyaxihqui hihquish bocani. Cahipish hicha sca

jahuen xoboho mapeti becani. Papan noque jihuemayaxihqui joi ta Pablones jato yohinishqui. Yamequiribi yohixon, yohibahinaxon yame caman Moisesnin joi jismaxon Papan joi yohinicabaan huishani joi rihbi jismaxon Jesus joi jato honanmaquin. ²⁴ Jan yohihi caibaan nincacoinquin. Caibo nincacatsihyamahi. ²⁵ Jan shinanai quescajayaquin shinanax boresscacani. Cahiton Pablones jato yohiquin:

—Hihcoinjaquin ta Papan joi yohinica betan Dios Yoshiman noquen papabo yohihi nescajanishqui:

²⁶ Nea jonibo yohitanhue: Maton pabinquinin tah man nincaxon bi honanyamayaxihqui. Jisquin tah man jisxon bi meratimahi.

²⁷ Nea jonibaan jointi ta xehpo qui. Jaton pabinquinin nincapanan ta nincayosmabo qui. Jaton bero ta beracocanihqui, jisxon honamnis hihxon, pabinquinin nincamis hihxon, jointinin honamnis hihxon. Shinan pontehiton hean jato rohajamis hihxon ta jascajacaniqui

hiih ta jaiqui huishani joi.

²⁸ Jaa copi honannahue. Noquen caibomabo qui ta nea hahan Papan noque teehihmah i joi Papan raanscaiqui. Jaabaan ta nincatihiqui.

²⁹ Jato jascajahiya judiobo sca bocani. Joi bichinnannani bocani.

³⁰ Copijaha hinantahni xoboho ta Pablo jihuemahihqui rabe bari. Jano jihuexon ta jaa jisi jahuibo jaan jisnishqui. ³¹ Jato jisanan Papan jihuemah i joi yohixon tsoanbi chihtehahma jato honanmaquin. Jahuatohonbi pantehahma noquen Hihbo Jesucristo joi honanmaquin.